
This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>





A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation


Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.


Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>





Bibliophile las ! ne puis :
Par trop me faut l'expérience,
Plus encor la docte science ;
Hins moult bibliomane suis.

Edouard Moura

Librairie





S. d. (vers 1600).

Très rare.

Exemplaire de Lignevilles,
n° 1524 du cat. de sa vente.

Patience de Job

20-111

24525

axxx
L

Res 811534

1

LA 814534

PATIENCE DE

IOB SELON L'HISTOIRE

DE LA BIBLE.



Comment il perdit tous ses biens par
guerre, & par fortune: & la grand
pauvreté qu'il eut.

*Et comment tout luy fut rendu par la grace
de Dieu. Et est à quarante neuf
personnages.*



A L Y O N,

Par les heritiers de François Didier,
à l'enſeigne du Fœnix.



LES PERSONNAGES

de ce present liure.

* *

<i>Le rustique.</i>	<i>Le Roy.</i>
<i>Gason.</i>	<i>Le Chambrelan.</i>
<i>Iob.</i>	<i>Le mar-schal.</i>
<i>La femme de Iob.</i>	<i>Le capitaine.</i>
<i>La premiere fille.</i>	<i>Le premier armé.</i>
<i>La seconde fille.</i>	<i>Le second armé.</i>
<i>La tierce fille.</i>	<i>Le tiers armé.</i>
<i>Le premier filz.</i>	<i>Moradus.</i>
<i>Le second filz.</i>	<i>Karados.</i>
<i>Le tiers filz.</i>	<i>Mabaioth.</i>
<i>Le quatriesme filz.</i>	<i>Dronalus.</i>
<i>Le cinquieme filz.</i>	<i>Corbatham.</i>
<i>Le sixiesme filz.</i>	<i>Eliphat.</i>
<i>Le septiesme filz.</i>	<i>Balduche.</i>
<i>Marotte bergiere.</i>	<i>Sophar.</i>
<i>Robin Pasteur.</i>	<i>Patience.</i>
<i>Le cultivateur de terre.</i>	<i>Foy.</i>
<i>Le pasteur des chameaux.</i>	<i>Esperance.</i>
<i>Sathan.</i>	<i>Michel.</i>
<i>Lucifer.</i>	<i>Gabriel.</i>
<i>Berith.</i>	<i>Raphael.</i>
<i>Belzebub.</i>	<i>Le frere de Iob.</i>
<i>Lemathan.</i>	<i>Le cousin de Iob.</i>
<i>Dieu.</i>	<i>La seur de Iob.</i>
<i>Le messager.</i>	

La

LA PATIENCE D³E

Iob selon l'hystoire de la Bible: cō-
ment il perdit tous ses biens par
guerre & par fortune: & la grand
pauureté qu'il eut:

*Et cōment tout luy fut rendu par la gra-
ce de Dieu. Et est à quarante neuf
Personnages.*

PROLOGVE.

Sit nomen Domini benedictum.



Heres gens au commencement
Nous prions tous treshumble-
ment

Nostre Seigneur en ceste place
Qui nous doit à tretsous la grace
A moy sur tous premierement
Et puis à vous seconement
A moy qui me vueille conduire
Si bien que ie vous puisse dire
Chose pourquoy pourrez acquerre
L'amour de Dieu ça bas en terre,
A vous qui vous doit tellement
Retenir bien entierement
Ce qui sera faict & dict
Que ce soit à vostre profit
De Dieu nostre pere & Seigneur

A 2



4 LA PATIENCE

Que ce soit à sa gloire & honneur
 Et nous doint tellement paifaire
 Cest hystoire cest exemplaire
 Que ce soit à la gloire & honneur
 De Dieu nostre pere & Seigneur
 Et de ceux qui le faict feront
 Deuant tous ceux qui y seront
 Et pour auoir plus briefuement
 Sans faire long arrestement
 La chose que nous desirons
 Vers la dame de grace yrons
 A la douce vierge Marie
 Qui le doux fruit porta de vie
 A fin qu'elle vueille prier
 Son filz qu'il nous vueille octroyer
 Sans aucune dilation
 La dicte supplication
 Et à fin que plustost nous oye
 Nous luy dirons tous par grand ioye
 De Gabriel le beau salut
 Quand au temple luy apparut
 Et luy dit & denoncia
 Humblement Aue Maria.

Sit nomen Domini benedictum.

Les paroles que i'ay cy dictes
 Dedans le Psautier sont escrites
 Au Pseume qui est cent & dixieme :
 Selon l'ordre de saint Hierosme
 Et selon le sens de la lettre

En

D E I O B.

En François le puis aussi mettre
 Le nom de Dieu omnipotens
 Soit benoist & loué tous temps.
 Sur les paroles proposées
 Nous sont deux choses demonstrees
 La premiere est patience
 Et la seconde obedience
 Et sont les paroles en somme
 Que disoit Iob le bon preud'homme
 Duquel Iob au plaisir de Dieu
 Nous vous monstrerons en ce lieu
 Toute la vie & l'histoire
 A fin qu'il ayez en memoire
 Car selon le temps qui est present
 C'est vn histoire moult plaisant
 A toutes gens & confortable
 Et à l'ame moult profitable
 Et pource veuillez bien entendre
 Car grans biens y pourrez apprendre
 Vous pouuez bien aujourd'huy voir
 Et clerement appercevoir
 Comment dessus toute la terre
 Generalement nous auons guerre
 Et pillerie qui ne fine
 Et auons bien souuent famine
 Maladies mortalitez
 Avec plusieurs aduersitez
 Et souffrons en plusieurs manieres
 Tribulations & miseres

6 LA PATIENCE

Pour les grans maux & les pechez
 Donnous sommes tous entachez
 Mais Dieu qui voit toutes les choses
 Les visibles & les encloses
 Qui en nul temps les siens n'oublie
 En plusieurs guises les chastie
 A fin de voir & approuuer
 Si iustes les pourra trouuer
 Parce doncques chacun peut croire
 Que c'est nostre droit purgatoire.
 Et si deuons auoir grand ioye
 Des grans maux que Dieu nous enuoye
 Comme, depuis xv. ou xvj. ans
 On a veu tant de pauures gens
 Du mal du bon Iob entachez
 Dont plusieurs si sont trespassez.
 Car si comme saint Paul l'Apostre
 En son epistre nous demonstre
 Toutes les tribulations
 Les douleurs & les passions
 Qu'en ce monde nous faut souffrir
 Ne sont pas dignes de venir
 A la gloire qui tant est belle
 Ou Dieu nous attend & appelle.
 Laquelle ia il a promis
 A tous ceux qui sont ses amis.
 Et qui voudront bien endurer
 Sans mal dire ne murmurer
 Les aduerfitez de ce monde

Qui

ui n'est qu'un abyſme profonde
 temple vous demonſtreronſ
 l'hiſtoire que nous feronſ
 e Iob qui fut tant patient,
 r le plus riche d'Orient
 eſtoit ſelon l'eſcriture
 : perdit tout en vn peu d'heure.
 auoit trois mille chameaux
 : cinq cens couples de bœufs beaux
 : cinq cens aſneſſes par compte
 omme l'eſcriture racompte,
 : des brebis auoit ſept mille
 rec ſoy grande famille
 e ſeruiteurs & d'autres gens
 : ſi auoit dix beaux enfans
 pt maſles & trois belles filles
 r tous eſtats beaux & habilles
 r & argent à grand planté
 eſtoit ſimple & debonnaire
 ns mal penſer ne ſans mal faire
 ais nonobſtant ſa bonne vie
 r ſaincteté ſa preud'hommeie
 ie u ſi luy voulut enuoyer
 es maux affin de l'eſſayer
 r luy fit tollir tous ſes biens
 ant qu'il ne luy demoura riens
 t qu'il fut iuſques au pain querre
 r mortalité ou par guerre.
 t pour plus le deſconforter

8 LA PATIENCE

Vindrent vn iour luy apporter
 Les nouuelles quatre messaiges
 Comment ses biens ses heritages
 Toutes ses brebis & ses veaulx
 Ses aneſſes & ses chameaulx
 Tous perdus & tous ars estoient
 Et que ceux qui les gardoyent
 Auoyent estez tous mis à mort.
 Encores qui estoit plus fort
 Luy dirent dont ce fut pitié
 Que ses enfans par verité
 Estoient tous mors à douleur
 Qui luy fist muer la couleur
 Car tout luy aduint à vn coup
 Adonc le preud'homme Iob
 Quant il ouyt tout cecy dire
 Si mercy a Dieu nostre sire
 En rendant graces humblement
 Se mist à genoulx doucement
 En disant en ceste maniere
 Je naquis du ventre ma mere
 Tout nud & si n'auoye riens
 Et tout nud sans emporter riens
 M'en iray apres ceste vie
 Dieu soit loué ie le mercye
 I'auoye des biens à grant planté
 Dieu en a faict sa volenté
 Il les m'a donnez & tolu
 Faict en a ce qu'il a voulu

Le

D E I O B.

Le nom de Dieu omnipotens
 Soit beneist & loué tous temps
 Or regarde la patiesse
 La bonne foy & esperance
 Que ce preud'homme voulut auoir
 Car ie vous asseure pour voir
 Que onques n'yssit de sa bouche
 Encontre Dieu vn seul reproche
 Et inssi chascun de nous doit faire
 Et prendre à Iob exemplaire
 Encores plus fort luy aduint
 Que le diable à luy s'en vint
 Et le batit par telle maniere
 Que sur luy n'auoit peau entiere
 Des les piedz iusques à la teste
 Fust destrompu par grand tempeste
 Tant qu'il n'auoit ne cher ne nerfz
 Que tout ne fut mangé de vers
 En vn fumier ou il gisoit,
 Et en louant Dieu il disoit
 Le nom de Dieu omnipotens
 Soit beneist & loué tout temps
 Oncques pour riens que puisse faire
 Le faux Sathan nostre aduersaire
 Il ne voulut faire peché
 Qui luy peust estre reproché
 Mais quant plus il estoit tempté
 Et plus batu & tourmenté
 Et plus louoit Dieu doucement

A 35

En le merciant humblement
 Et quand il veit sa patience:
 Sa foy & sa bonne esperance
 Du ciel luy enuoya sa grace
 Et le guerit en peu d'espace
 Et le fit plus sain & haïté
 Que par auant n'auoir esté.
 Et fut plus riche & puissant
 Pour vn denier il en eut cent
 Et les biens qu'il auoit perdus
 Luy furent au double rendus
 Et si eut autant d'enfans
 Et vesquit cent & quarante ans
 En bonne prosperité
 Apres tout son aduersité.
 Et est maintenant en la gloire
 De paradis grant victoire
 Pource vous pri mes chers freres
 Des les moindres iusques aux meres
 Que vous preniez trestous exemple:
 Au preud'homme Iob vostre exemple.
 Je ne vueil si long sermon faire
 Pour Dieu plaise vous à vous taire
 Car moult de biens pourrez apprendre
 Si de bon cœur voulez entendre
 Escoutez & faïetes silence
 Qui deura commencer commence:

*Icy commence le Rustique & Gason
 seruisours de Iob.*

Le

DE IOB.

Le Rustique.

11

r auant, que Dieu y puisse estre,
est bien temps que ie laboure:
neques vilain qui porta guesstre
e fut engendré de bonne heure:
ar celuy Dieu que lon adore,
me repens trop mallement,
ue ie ne fuz à l'aducutur
n grand Seigneur premierement.
uis ie bien fait propicement,
t patronné de belle taille,
t si suis par mon serment,
t fust ores vn faix de paille,
t il conuient que ie trauaille,
ue le grand diable y ait part,
omme ces autres vilenaille,
oucher matin, & leuer tard,
incores me font ils ma part:
De mon trauail & labourage,
Et si ne mange que du lard,
Un peu de laict & de fourmage.
Et puis s'en vient vn cariage,
Un grand tas de larrons sergens:
Vrayement à peu que ie n'enrage
De veoir tels manieres de gens:
Tousiours leur faut blé ou argent,
Chacun me crie & me demande,
Et si ie ne suis diligent
De bailler, ie payeray l'amende:

Et

Et puis me fault payer la rente
 Aux sergens & au Capitaine
 Et aux paillardz deffoubz sa bande
 Faut donner froment & auoyne
 Et au lieutenant pour sa peine
 A l'eschauguette & au portier
 Que Dieu leur doint la malle estraine
 Tant ilz me font deconforter
 Et me conuient au soir trotter
 Au guet à la pluye & au vent
 Si ie dors lon me vient froter
 D'un baston derriere & deuant
 Et faut hucher comme chat-huant
 Tant comme la nuyt durera
 Tout cecy m'enuuyt & bien souuent
 Ie n'en dys plus, &c.

Gafon.

Oncques ne fut ne ia ne sera
 Des qu'Adam mordit la pomme
 Iamais pource homme bien n'aura
 Ne ne dormira de bon somme
 Si poureté estoit à Rome
 Voire dela soleil leuant
 Si viendra elle à vn pource homme
 Tous les coups de luy approchant
 Pource tousiours seras meschant
 Et villain plein de villennie
 Ie ne scay que tu vas preschant
 Iamais n'auras bien en ta vie,

Car

Car certes Dieu ne te fit mie
 Toy ne les autres vilains,
 Il prie à Dieu qu'il te maudie:
 Car pour neant tu te plains.
 Et par ce iamais n'auras riens
 Fors que rongne, toux & froidure,
 Et la forte goutte en tes reins,
 Et tousiours la malle aduanture.

Le Rustique.

Tu dis voir Robin ture lure,
 Que le mal iour te soit donné,
 Comment me dis tu tel'iniure,
 Paillard, pouilleux, rataconné?
 Dy moy paillard mal engrongné,
 Aumoins si tu te peux congnoistre,
 Suis ie pas bien affaçoné
 Pour deuenir vn tresgrand maistre?
 Par le sang bieu nous deussions estre
 Du monde le gouuernement:
 Car Dieu ne feroit iamais naistre
 Les bleds, le seigle & le froment,
 Si entre nous premierement
 Ne les semions en la terre,
 Nous feismes le commencement
 Ia n'est mestier de s'en enquerre:
 Mais tout le monde est si tricherre,
 Que nous n'auons point d'auantage,
 Qui puisse meschoir a la guerre,
 Tant elle nous a fait grant dommage.

Nous.

Nous faisons tout le labouirage
 Dequoy se nourrist tout le monde,
 Et nourrissons le bestiage,
 Dont tant de bien vient & abonde.
 Et encores chacun nous gronde:
 Chacun paillard si nous rechine,
 Ils m'ont batu, Dieu les confonde,
 Aucunefois bien mon eschine:
 Nous labourons aussi la vigne,
 Et plantons le sep & la treigle:
 Par ce deuons par droicte ligne
 Boire souuent, comment qu'il aille:
 Aussi nourrissons la poulaille,
 Les gras cheureaux & les oysons,
 Porceaux, truues, & gorretaille,
 Et les brebis à nos maisons,
 Et sommes en routes faisons
 Matin & soir à labourer
 N'est il pas doncques bien raison
 Que lon nous doyue honorer?
 Si est vrayement, mais endurer
 Nous faut, & prendre l'aduenture,
 Qui te fait doncques murmurer
 Et nous dire si grand'iniure?
 Car ie te promets & assure
 Que Dieu nous aime tendrement,
 Plus que nulle autre creature
 Qui soit dessouz le firmament.

Gaston.

Tu

Tu as menty mauuaisement,
Oncques Dieu n'aima vilennie.
Ie cuide par mon serment
Que tu sois en melancolie:
Mais puis que tu comptes la vie
Des vilains, de leur grand puissance,
Ie t'en diray, Dieu te maudie,
La pauureté & la meschance.
Ie sçay trop bien que sans doutance
Entre vous vilains de villages
Faites les blez & la semence,
Et tous les autres labourages:
Et couchez la nuit és bocages,
Par les buyssons, où vous tremblez,
Pour garder les bestes sauuages
Qu'elles ne viennent manger vos blez:
Mais quand les auez assembles
A grand labour, & à martyre,
Ils vous sont tolus & amblez,
Et si n'en auez que du pire.
Quant est du vin, ie puis bien dire,
Qu'en nul temps gueres n'en auez,
Fors que du buffet que l'on tire,
Encore' à grand peine en auez:
Ainsi estes tousiours greués,
Et au regard de vostre ouaille,
Rien n'en mangés, bien le sçauiez,
Fors la merde & la tripaille
Si hardy de manger poulaille,

Vil

Villains: car vous n'oseriez,
 Et aussi vous ne pourriez
 Fournir à payer la taille,
 Si au marché ne portiez
 Pour vendre vostre vicennée.
 Vous ne mangez que chair salee,
 Et de là pourree puante,
 Et si estes toute l'année
 Au mal temps & à la tormente.
 Et pource vous aurez de rente
 Pour vostre labourage & peine
 Le froid au cul, quand bize vente,
 Par chacun iour de la sepmaine.

Le Rustique

Et Dieu te doint la malle estraine,
 Tant tu es mauuais langager,
 Ie te mettray en malle esloine
 Si tu m'hastes faulx losenger.
 Tais-toy, tu puisses enrager,
 Ribaud, truand, gardeur d'anesses:
 Pa: D'eu ie suis en grand danger
 De te battre, si plu. m'engresses,
 N'en parle plus, & si me laisses,
 Ou t'en va, & me donne paix:
 Car par Dieu si tu ne te cesses
 Ie te battra bien vne fois.

Gaçon.

He vilain, foireux plain de peuz,
 Si tu en fais semblant ne chere

Ie

Je te batray bien les boullez,
 Qu'il n'y demeure peau entiere,
 Vilain, que la fieure te fiere,
 Ie te metray en malle perde,
 Et batray par telle maniere
 Que tu me rendras sang & merde.

Le Rustique.

Haribaud, l'as tu dit à certe,
 Tu ne me puis plus eschapper:
 Car ie te rendray ta deslierte
 Tantost si te puis attrapper.

Gafon.

Ie voy bien que c'est à frapper,
 Deffens toy, ce coup sera tien,
 Et cestuy cy, & seront per,
 Batu seras comme vn vilain.

Il le bat.

Le Rustique.

Tu as menty, fils de putain,
 Rens toy tantost, ou tu mourras.

Gafon.

Vilain, ie t'en garderay bien,
 Et fay du pis que tu pourras.

Le Rustique.

Et par Dieu tu t'en dediras,
 Crie mercy, ou tu es mort.

Gafon.

Par la chair bieu tu mentiras:
 Car au dernier tu auras tort.

Icy bas le Rustique, & chet à terre, & dit,

B

Le Rustique.

Hau Gason, mon amy accort,
 Ie me rens, que maugré ma vie,
 Tu fais diable de frapper fort,
 Ce n'est pas bonne compagnie.

Gason.

Oncques ne feis si grand folie.
 De me commencer icy guerre,
 Ie ne t'espargneray mie,
 Par ma foy faulx vilain tricherre.

Le Rustique.

Mon amy, ie te vucil requerre,
 Que toy & moy soyons amis.

Gason.

Il n'est pas bon de trop enquerre,
 Ie le t'auoye bien promis.

Le Rustique.

Tu m'as trop vilainement mis
 A terre, dont ie suis marry.

Gason.

Tout passera par vn tamis
 Ne te chaille tu es guery,

Le Rustique.

Par bieu Gason i'ay vn barry,
 Auquel toy & moy tasterons:
 Et si le vin n'y est failly,
 Par le sang breu nous en boirons;
 Et ainssi nous accorderons,
 Et par le saint Soleil qui raye.

Ic.

Ie l'aime plus, ou enuiron,
Que parauant ie ne faisoie.

Gaſon.

Ie te pardonne, ne t'eſmoye,
Quant que ie t'ay meſfait ſans doute:
Mais parlons bas, qu'on ne nous oye,
Nous ne ſçauons qui nous eſcoute.

Le Ruſſique.

Tu m'as épouſſeté ma corte,
Si bien que ne fut oncques mieux:
Mais en deſpit de la riotte
Nous boirons par accord tous deux.

Icy ſe vont ſeoir, & Iob à genoux humblement dit.

Vray Dieu qui feis le firmament,
Le ciel, la terre, mer & onde,
Et de ton ſainct commandement
As enluminé tout le monde:
Tu es celuy certainement,
Duquel tout bien vient & abonde:
Par cete requiers humblement,
Que me faces de peché munde:
A toy mon Dieu mon eſperance
De bon cœur me rens, & te prie,
Garde moy par ta grand puiffance,
Tant que viuray en ceste vie,
De peché par outrecuidance
Encontre ta grand ſeigneurie:

B. 22

Car tu m'as fait à ta semblance,
 Mon createur ie t'en mercie,
 Mon Dieu, mon confort, & ma ioye,
 Mon corps, m'ame te recommande,
 Enseigne moy sente & voye,
 De faire tes commandemens,
 Ta benediction m'ottroye,
 Et me deffens des tentemens
 De l'ennemy qui me guerroye
 Nui& & iour par les argumens.
 Pour mes enfans te fais priere,
 Garde les par ta sainte grace
 De pecher en nulle maniere
 Deuant ta glorieuse face,
 A fin que dessous sa banniere
 Mal esperit ne les enlance,
 Et que ta loy ferme & entiere
 Puissent maintenir sans fallace.

Icy se leue, & dit à sa femme.

Ma chere amie entendez ça,
 Nous ne veismes ceans pieça
 Tous noz enfans manger ensemble:
 Ce seroit bien faict se me semble,
 Que tous les fissions conuier.
 Je vous en voudroye bien prier,
 Pour venir en ceste iournee
 Diner en nostre compagnie,
 En louant Dieu nostre Seigneur,
 Des grans graces & de l'honneur

Qu'il

Qu'il nous a fait pour son plaisir.

La femme de Iob.

Mon Seigneur c'est tout mon desir
Et mon confort que de les veoir:
Car c'est nostre sang, nostre chair
Mon espoir, & nostre liesse,
Le baston de nostre vieillesse,
Vostre vouloir i'accompliray,
Et tous appeller les feray,
Pour ceans venir quand il vous plaist,
Le disner sera tantost prest
Au plaisir de Dieu que nous secoure.

Icy parle à ses filles.

Or sus filles en la bonne heure,
Allez conuoyer vos seurs & freres,
Dés les moindres iusques aux meres,
Et leur dites bien sagement,
Que leur pere premierement,
Et moy empres, si leur mandons,
Et expressement commandons,
Qu'en nostre hostel vueillent venir,
Pour compagnie nous tenir,
Et pour disner à nostre table.

La premiere fille.

La dame c'est bien raisonnable,
Que ie face vostre vouloir,
Car ne m'en deuerois douloir,
Mieux y vueil tant que ie puis,
Que me tarde que i'en y suis,

B ;

Je voys à eux presentement.

La femme de Iob qui dit à ses filles.

Sus mes filles apertement
 Pensés tantost sans arrester
 De la table bien apprester
 De pain de vin & de viande
 Car vostre pere le commande
 Qui veult que voz freres viennent
 Et compaignie luy tiennent
 A disner en ceste maison
 Puis qu'il luy plaist c'est bien raison
 Qu'aujourd'huy soient festoyez.

La seconde fille.

Madame ne vous esmoyez
 Autre chose nē desiroye
 Que de les voir tous à grand ioye.
 La table sera tantost mise
 Et seruie & de bonne guise
 Au mieux que faire se pourra.

La tierce fille.

Par moy certes ne demourra
 Car certes pour vous dire veoir
 C'est tout mon desir & vouloir
 Que Dieu les gard de vilennie
 Et leur doint tousiours bonne vie
 Je mettray tout mon labeur
 A les seruir de tresbon cuer
 Car c'est la chose que plus i'ayme

La premiere fille dit à ses freres.

Celuy qui fit homme & femme
Mes freres vous doint bonne vie.

Tous les freres.

Nostre seul Dieu vous benie
Et vous croisse honneur & ioye.

La premiere fille.

Mon pere deuers vous m'enuoye
Lequel à vous se recommande
Et à tous de par nous vous mande
Qu'auccques luy venés disner
En present sans plus eslongner
Puis qu'il luy plaist c'est bien raison
Qu'a luy veigniez en sa maison
Car le disner y est tout prest.

Le premier filz.

C'est bien raison puis qu'il luy plaist
D'obeyr à sa volonté.

Le second filz.

Je prie à Dieu qui luy doint santé
Et viure longuement sur terre.

Le tiers filz.

Puis qu'il luy plaist nous mander querre
Vous l'en deuons bien mercier.

Le quatriesme filz.

Chascun de nous sans varier
Luy doit honneur & reuerence.

Le cinquiesme filz.

Or nous mettons en ordonnance

Et y allons sans demourer.

Le sixiesme fils.

Trestous le deuons honorer
Il nous ayme d'amour parfaicte.

Le septiesme fils.

Ie veux que chascun se mette
En chemin pour aller à luy.

Le premier fils.

Or allons, Dieu nous gard d'ennuy
Et nous doit accomplir & faire
Chose pourquoy luy puissions plaire
Ie me mets deuant, suiuez moy.

La premiere fille.

Ie vous prendray parmy le doy
Et yrons les premiers tous deux.

Le premier fils.

Volontiers ma sœur ie le veux.

*Icy vont à la maison de
Iob, & puis il dit.*

Monseigneur la bonne aduerture
Vous enuoye le Dieu de nature
Et à vous madame si face.

Iob.

Mes enfans Dieu vous doit la grace
Et à toute la compagnie.

La femme.

Benoist soit ceste assemblee
Dieu la gard de mal faire & dire
Aussi vrayement comme desire

Vous

Vous doit planté de tous biens.

Iob.

Or pensons de lauer noz mains
Car la viande est route preste
Pour amour de vous faire feste
Que soyez les bien venuz.

Le second fils.

Nous vous sommes tous bien tenuz
Monseigneur nous vous mercions:
Iamais pour rien ne deurions
Vous courroucer par nulle guise.

La seconde fille.

Voyez vous l'eaue que i'ay quise
A la fohtaine toute nette.

La troisieme fille.

Et voyez la blanche seruiette
Venez vous lauer de par Dieu.

*Ici se lauent tous, & puis
dit Iob.*

Chascun de vous prenne son lieu
Sans faire pause ne clamour
Et vous soyez par bonne amour
Tous empres moy l'un deuant l'autre.

La femme.

Filles n'espargnez rien du nostre
Pain ne vin ne autre pitaue
Et mettez peine & diligence
A nous seruir honestement,

B s

La seconde fille.

Nous le ferons ioyeusement
De bon cueur ma dame tantost.

*Icy sonnent les instrumens & portent les
viandes à la table.*

Regardez voyez bouilly & rost
Et viandes à grand planté
Or mangés Dieu vous doint santé
Et faictes trestous bonne chere.

La troisieme fille.

Benoist soit il de Dieu le pere
Cil qui bonne chere fera
Et qui boira & mangera
A ce disner tout à son ayse.

Le premier p^{er}.

Monseigneur pour Dieu qu'il vous plaife
Faire soir nos seurs comme nous.

Job.

Bien me plaist filles soyés vous
Pour amour de la compaignie.

La premiere fille.

Monseigneur puis qu'il vous agree
Nous le ferons sans contredire.

*Icy parle la femme de Job & le messagier
obeyt à la femme de Job.*

Bien doy louer Dieu nostre sire
Et mercier toute ma vie
Quant ie regarde ma lignee
Icy deuant moy tous ensemble

Je.

Je puis bien dire que ie semble
Maintenant la bonne geline
Qui dessus ses poussins s'encline
Et les abrie de ses ailles
Pour paour des buvais & des aigles
Qui maintefois les empoignent
Quand de leur mere esloignent
Pource gardes vous mes enfans
De malice ie vous deffens
A fin que le mauuais buffain
Ne vous empoigne sous sa main
Priés Dieu pensés de bien faire
Quant l'ennemy vostre aduersaire
Nuit & iour ne cesse d'entendre
Comment il vous pourra surprendre
Tant comme estes en ieunesse
Pensés quand viendra la vieillesse
Que vous aurés la blanche barbe
Exemple prenés à vn arbre
Qui par force de la gelee
A tantost la couleur muee
Et deuient seche comme vne souche
Et quand le temps d'esté s'approuche
Et qu'il ne sent plus la froidure
Adonc il reprend la verdure
Et mue du tout sa couleur
Et se remplit de belles fleurs
Vous ressembles à l'arbre vert
Qui de belles fleurs est couuert

Et

Et vous estes ieunes iolis
 Bien vestuz ioveux & poliz,
 Et auez soucy & pensee
 Mais gardez vous de la brouee
 Que vous ne perdez vostre fleur
 Auant que le fruit soit meur
 Car si la belle fleur ne cuist
 L'arbre portera noble fruit
 Bel & plaisant & amoureux
 Et à manger moult sauoureux
 Et aussi par experience
 Gouvernez vous par ordonnance
 Et vous rendrez sans nulle doutance
 Noble fruit à grand abondance
 C'est à dire deuotions
 Prieres & oblations.
 Et quand l'arbre bon fruit ne rend
 L'on le coupe & puis le prent
 Et est mis au feu pour ardoir
 Aussi sera pour dire veoir
 De ceux qui bon fruit ne rendront
 Car les ennemis les prendront
 Et si les getteront au feu.
 D'enfer ou ils auront leur lieu.
 Duquel Dieu nous vueille deffendre.

Le premier filz.

Amen & nous doit tel fruit rendre
 Qu'avecques luy puissions tous estre
 Lassus en la ioye celeste.

Ou

Ou noz sainctz peres anciens
Et nous garde de cheoir és liens
Du faulx buffain plein de malice.

Iob.

Mes enfans i'ay faict sacrifice
Maintefois & oblation
Pour vous en grand deuotion
En priant Dieu deuotement
Qu'il vous gardast de temptement
De Sarhan la mauuaise beste
Et par ce ie vous admonneste
De seruir Dieu qui tout nous donne
De fin cueur de pensee bonne.
Ayez vous comme vostre proesme
Payez loyaument vostre desme
Comme fit Abel en sa vie
Qui Cayn occist par enuie
A nul qui soit ne faictes chose
Desplaisant ne embaigeuse
Faictes à tous communement
Comme voudriez proprement
Que lon vous fit ne plus ne moins
Si ainsi faictes soyez certains
Que vous accomplirez la loy
De Dieu nostre souuerain roy
Et gagnerez son paradis
Lequel il a promis iadis
A ceux qui bien le seruiron.

Le second filz.

Bien

Bien heureux sont ceux & seront
 Qui viuront en ceste guise
 Ainsi que Dieu dit à Moÿse
 Quant luy bailla la loy nouuelle
 En la montaigne qui s'appelle
 Thabor autrement Sinay
 Dont Israël fut esbahy
 Quant le veirent venir à terre
 Et nous ordonna ceste terre
 Et nous deliura du seruaige
 De Pharaon & son bernaige
 Qui submergit dedans la mer.

Le tiers filz.

C'est le Dieu que deuons aymer
 Honnorer & seruir & craindre
 Sans son commandement enfreindre
 Quant les bestes de leur nature
 A l'honnorer mettent leur cure
 Chascune selon sa naissance
 Luy faiçt honneur & reuerence
 Selon le temps & la saison
 Doncques par plus forte raison
 Nous qui auons entendement
 Et viuons naturellement
 Non pas comme les bestes mues
 De la terre iusques es nues
 Luy deuons bien gloire & honneur.

Le quart filz.

Loué soit Dieu nostre Seigneur

Nostre.

Nostre vray pere roy celeste
 Qui nous a faict de femme naistre
 Et nous a là vie donné
 Et tant de biens abandonné
 Nous luy deuons bien rendre graces
 En tous lieux & en toutes places
 Qu'il nous a donné cognoissance
 De bien & de mal sans doubtrance.
 Et a faict & formé le monde
 Et tout ce qui dedans abonde
 Pour nous seruir & honorer.

Iob.

Mes enfans vueillés labourer
 En bonnes operations
 Et vous aurés prouisions
 Tousiours de manger & de boire
 Et de vestir ce deués croire
 Regardés les petits oyseaux
 Qui sont si gracieux & beaux
 Et ne cueillent ne sement
 Mais au matin premierement
 Quant ils sentent le iour venir
 Ils ne se veulent plus tenir
 A chanter mettent leur entente
 Auant qu'ils mangent de viande
 En l'honneur Dieu nostre Seigneur
 Luy rendent louenge & honneur
 Et Dieu le pere qui tout voit
 De manger & boire les pouruoit.

Mes

Mes enfans ainſi devez faire
Au matin quand le iour eſclere
Que le ſoleil la terre cueure
Premierement auant toute œure
Adorez Dieu à ioinctes mains
Et le merciant de ſes biens
Et Dieu ſi vous aydera
Et ſa grace vous donnera
Remembrez vous ie vous en prie
Qu'il vous a faiſts & donné vie
Et tous formez à ſa ſemblance
Et ſi vous a donné puiffance
Sur toutes les choſes qui ſont
En ce monde qui eſt rour rond
Et premierement ſur les beſtes
Pour vous ſeruir à voz requestes
Les bœufs pour labourer la terre
Les cheuaux pour aller grant erre
Les oyſeau qui en diuers chants
Chantent & vollent par lair
Par le pays & par les champs
Et vous a donné pain & chair
Et pluſieurs ſortes de poiſſons
Selon le temps & les ſaiſons
Et a voulu & ordonné
Que tout vous fuſt abandonné
Ce qui eſt en terre & en mer
Par ce le devons bien aymer
Craindre ſeruir ſans fiction

De

De cœur de corps d'affection
Comme vray Dieu omnipotent.

Le cinquiesme fils.

O Dieu ne me doint viure tant
Qu'en cestuy monde ie face
Nulle chose qui luy desplaise
Par vrayement c'est vne grant chose
Et grand vertu & merueilleuse
Comment vn bœuf & vn chamel
Se laisse à vn homme seul
Subiuguer & humilier
Et se laisse prendre & lier
Par les cornes & par la teste.

Le sixiesme fils.

Oire qui est si forte beste
Et aussi le chameau s'encline
Quant on luy veut charger l'eschine
Et se met en subiection
Sans nulle contradiction
Pour obeïr à vn seul homme
Ou à vn enfant aussi comme
Nous serions l'vn de nous deux.

Le septiesme fils.

Est par la grace au roy des cieux
Qui nous a faict si grand honneur
Ennuyment nous a dit monseigneur
Sur toutes bestes par nature
Sont subiectes à creature
Sur les servir sans contredire.

C.

Ainsi le croy bien fermement.

La femme de Iob.

Beau filz vous parlez saigement
 Je requiers à Dieu qu'il luy plaise
 A tous vous enuoyer sa grace
 Or mangez tous ie vous en prie
 Par amour & par compagnie
 Car ie vous promets & octroye
 Vostre pere & moy auons grant ioye
 De vous voir tous ensemble icy.

Le premier filz.

Madame la vostre mercy.
 Nous y auons mangé & beu
 Bien grandement la mercy Dieu
 Tout a loyr la vostre grace.

La femme Iob.

Sus mes filles sans plus d'espace
 Je ne voy plus qui face chere
 De manger en nulle maniere
 Ostez tout ce qui est sur table.

La seconde fille si liene.

Voulontiers madame honnotable
 Nous le ferons sans demourance.

Iob.

Prenez en gré la patience
 Vne autre fois vous aurez mieux
 Rendons graces au Dieu des cieux
 De ses biens qu'il nous a donné.

Icy se lieuent de la table & dient graces.

Dieu

Dieu tout puissant roy couronné
 Createur de toutes personnes
 De tous les biens que tu nous donnes
 Tous ensemble te mercions.

Le premier filz.

Monseigneur nous vous grations
 Vous & toutes plus de cent fois
 Les biens que vous nous avez faictz
 Et enseigné en cestuy iour.

Le second filz.

Ardonnés nous mon cher Seigneur
 Nous auons à ceste feste
 Et ne faict chose dehonneste
 Qui aucunement vous deplaise.

Job.

Les chiers enfans Dieu par sa grace
 Vous doint sa benediction
 Et vous garde de tentation
 Car d'autre chose ie ne doute
 Fors que l'ennemy vous deboute
 Tant que vous delaiïës la Loy
 De Dieu qui est Souuerain Roy
 Qu'entesfois est en espie
 Pour vous cuydetrollir la vie
 Et vous mener à dampnement
 Pour ce ie vous prie cherement
 Et retenés vous par amitié
 Parfaicte fraternité

Et vous tenez tousiours ensemble:
 Car en ce monde ce me semble
 N'est nulle chose si ioyeuse
 Si plaisant ne si gratieuse
 Que de veoir freres & sears
 Qui cauent chascun de voz cœurs.
 Sans penser mal ne vilennie
 Au monde n'est si belle vie
 Ne qui tant puisse à Dieu plaire.

Le tiers. filz.

Monseigneur doux & debonnaire:
 Benoit soit il qui vous crea
 Commandez ce qu'il vous plaira
 Et volentiers vous seruions.

Le quart filz.

Quant vous plaira nous en yrons
 A vostre congé monseigneur
 Et grant mercis de vostre honneur
 Et de voz beaux enseignemens.

Job.

Mes enfans à Dieu vous commans
 Qui vous vueille garder de mal

Icy s'en vont à leurs maisons.

Le Rustique.

Hau Gason mon amy feal
 Il fut tantost temps de repaistre
 Gar i'entens que Job nostre maistre
 A fait auourd'huy feste grande
 Grand planté y a de viande.

Tous.

Tous ses enfans o luy dinant
 le te requiers en rechenant
 Tant que ie puis que tu y aille
 Pour nous querir de la vitaille
 En fleur de bonne compaignie
 Et ie meneray la charrue
 Et la mettray deuant les bœufz.

Gaiſon.

C'est bien raifon quant tu le veux
 Mais auant me conuient ſcauoir
 Quel' viande tu veux auoir
 Et quel' ſaulce pourras manger ,
 De te bailler telles viandes
 Ce n'eſt pas ce que tu demandes.
 Et maintenant cheureaux oyſons
 Je ſont il pas en leurs ſaiſons
 Mais pigeons & petis poulez
 Se ſeroyent ſains & friquelez
 Et ne t'empêcheroyent point la gorge
 Si tu veux que ie t'en apporte
 Dy moy ſi en pourras vſer.

Le Roſtique.

Tu ne te fais que abuſer
 ſais ce n'eſt pas à tes deſpens
 Pres par dieu ie m'en repens
 Dont ie t'ayme tant que ie foy
 Toutefois ie me fie en toy.
 Et tu n'as cure ſi le laiffes
 Y de toy & de tes aneſſes.

C 3

Tu as tant de mauuais langaige
 Aucunes fois que c'est laraige
 Puis qu'il faut que ie le te die.

Gafon.

Ne te marris pas ie t'en prie
 Car le pays seroit gasté
 Demande ce que tu voudras
 A l'aduanture tu l'auras
 Tu es digne d'auoir du bien.

Le Rustique.

Ie suis digne d'un pet de chien
 Tu ne te fais que friuoler
 Car autre mestier tu ne scais
 Et me laisse trestout le fais
 De noz bœufz & de la charme
 Tu fusses mieux à flaioler
 Et puis t'en vois ou ta massue
 Courant par les champs comme vn foul
 Et il me conuient trestout foul
 Charroyer & que ie labeure
 Toutesfois tu scais tresbien l'heure
 Quant nous auons riens à manger
 Car le premier t'y viens ranger
 Et deliurer nostre barry
 Dont encores suis plus marry
 C'est outraige qui te surmonte
 Ie mesmerueille que tu n'as honte
 Que si tu sçauois vraiment
 Comme ie t'aime loyaument

Tu

Tu ne t'en pourrois louer.

Gafon.

Testoy tu verras bien iouer
 Tu sçais bien que quant ie voudroye
 Certes tant de bien te feroye
 Que tu ne sçaras ou le mettre
 Mais que tu me vuieilles promettre
 La foy du corps sans mot sonner
 Que ie seray ton personnier
 Si tu puis deuenir grant maistre.

Le Rustique.

Par mon serment s'il pouuoit estre
 Que l'on me fist vn grant Seigneur
 Tu serois bon gouuerneur
 Et si ie deuenoye Roy
 Tu seroys auecques moy
 Et par le sang bieu i'auroye
 Vnes giestres de fine foye
 Et vn chapperon fretaillé
 Mon fac seroit encornaillé
 Tout à l'entour de fin argent
 Cuides tu que tu seroys gent
 Sang bieu que ie seroye gauuain.

Gafon.

Tu serois vn gentil villain
 Par m'ame il te feroit beau veoir
 Mais il te conuiendrois auoir
 Vne gentille coqueluche
 Et sembleroys maistre pantoufle

Le bourreau d'une bonne ville.

Le Rustique.

Ie seroye le plus habile
 Qui fut en trestout le pays
 Les gens seroyent tous esbahis
 Les villains d'ici enuiron
 Osteroyent tous leur chapperon
 Deuant moy pour me faire honneur
 Et m'appelleroient monseigneur
 Et deuiendray le gentillès
 Et feray du coq en pas
 Par mon serment tu tremblerois
 Toutes les fois que me verrois
 Tant seroye beau papelart.

Gaçon.

Tu serois la sanglante hart
 A ton col non pas gentil-homme
 Car d'icy aux portes de Rome
 N'a nul si villain comme toy
 Tu me ressembles par ma foy
 Des yeux du nez & du visage
 Vn vieil singe qui est sauuaige
 Tu es contrefaict & bossu
 Tu as le cul aussi moussu
 Comme vn fourreau de cornemuse.

Le Rustique.

Ha meschant tu t'en abuses
 Tu ne peux oublier ta Guise
 Par le sang bieu quant ie m'aduise

Je ne voudrois pas estre mort
 Car ie sçay bien s'il vient au fort
 Qu'encores ie verray le temps
 Au moins selon que ie m'attens
 Que ie seray homme notable
 Ou de par Dieu ou par le diable
 Vne fois en toute ma vie.

Gafon.

Quant tu as si grand enuie
 Il conuient sans plus long aller
 Que tu soyes faict cheualier
 Adoncques seras gentil'homme.

Le Rustique.

Or me dy doncques mon amy comme
 Je pourray cheualier estre
 Par Dieu ie te feisse grand maistre
 Si le cas pouuoit aduenir.

Gafon.

Si tu te veux bien contenir
 Cheualier seras en peu d'heure.

Le Rustique.

Ce seroit mout grand aduanture.

Gafon.

Par Dieu i'en ay faict puis n'agueres
 De mes mains plus de cent milliers.

Le Rustique.

Veux tu dire de cheualliers?
 Tu me fais enrager de rire.

Gafon.

C 5

Si tu veux il te doit suffire
Tu le feras n'en doute mie.

Le Rustique.

Or me dis Gascon ie t'en prie
Faut il faire grand mistere?

Gascon.

Nenny il n'y faut que maniere
Et endurer vn peu de coups.

Le Rustique.

Et seroyent ils gueres grous
Toutesfois ie le veux sçauoir
Et s'il me faudra point auoir
De baïfnet dessus ma teste.

Gascon.

Nenny dea il n'est pas honneste
Tu te tiendras saigement
Et ie te frapperay doucement
De ce baston ou les deux mains.

Le Rustique.

Veux tu dire que les villains
M'appelleront bien mon Seigneur?

Gascon.

Ouy dea, & referont honneur
Quant ilz sçauront ce qui sera.

Le Rustique.

Et qui diable le leur dira
Que ie soye vn si grant Seigneur?

Gascon.

Moy mesmes ie leur iray dire

A tous

A tous de maison en maison.

Le Rustique.

Par mon serment tu as raison,
Je veil ce que tu voudras,
Et fay du mieux que tu pourras,
Et vrayement i'en suis bien d'accord.

Gason.

Or me pardonne donc ta mort,
Et crie fort cheualerie.

Le Rustique.

Ma mort, en despit de ma vie,
Et me veux tu faire mourir?

Gason.

Nenny, mais ie te veux ferir
Cinq ou six coups, car c'est la guise.

Le Rustique.

Or ça doncques, à ta deuise,
De tout mon corps entierement.

Gason.

Crie doncques apertement
A haute voix cheualerie.

*Icy Gason doit frapper le Rustique: & il
doit crier cheualerie.*

Le Rustique.

Au Gason, hau, il suffit.

Gason le frappe.

Attens vn peu, c'est ton prouffit,
Endure, mon amy, endure.

Le

Le Rustique.

De cheualerie n'ay cure
 Ie m'en repens i'en suis lassé.

Gaſon.

Il te ſera tantost paſſé
 Tu ne te dois point remuer.

*Il le bat**Le Rustique.*

Au meurtre tu me veux tuer
 Ie renonce à gentilleſſe.

*Il chet à terre.**Gaſon.*

Ie cuide que le bas te bleſſe
 Ou tu as le dos eſchauffé
 Si tu n'eſt cheualier paſſé
 Par mon ſerment ie n'en puis mais.

Le Rustique.

Pour Dieu ne m'en parles iamais
 Au dyable la cheualerie
 Iamais ie n'en auray enuie
 I'en dis ſi, i'amerois trop mieux
 De la moytié garder les bœufz
 Tu es vn maïſtre par ma foy
 Iamais n'auray fiance en toy
 Car tu me l'auois conſeillé.

Gaſon.

Tu eſtois tant eſueillé
 Que nul ne te pouoit tenir.

Le Rustique.

I'ayme mieux villain deuenir

Et

Et manger du lard & des pois,
 Que de mener le gentilois:
 Car par bieu il m'en souviendra,
 Mais que le bout de l'an viendra.
 Tu m'as si bien aulné mes bôces
 Incques mais ne fuz à tels nopces,
 Et pour maintenir la coustume
 Tu m'as si bien cherpy ma plume
 Que souuent me le faut sentir.

Gafon:

Tu t'en cuides repentir,
 Et ma foy compains c'est à tart.

Le Rustique:

Tu dis voir, le diable y ait part
 La belle cheualerie,
 En parlons plus, ie t'en supplie,
 Face chacun son mestier.

Ici se taisent, & les pasteurs parlent.

Marote

Robin touchons sans arrester
 Nos brebis, & les menons paistre
 En champs, car il y fait bel estre,
 Les mettrons pres de la haye,
 A l'ombre du Soleil qui raye,
 Et autres bestes sont aux champs.

Robin:

Marote bien serois meschant
 Si vous refuser nullement:

Tou

Touchons doncques apertement
 Nos brebis, en ceste vallee,
 Et serons en la compagnie
 De ceux qui gardent les chameaux.

Marote.

C'est raison, Robin, ie le veux,
 Ie voi^s filant ma quenouillette
 Deuant bion, deuant biette,
 Apres aussi beste beline,
 Robin par ta foy deuine,
 Et me dis: car tu es sçauant,
 Pourquoi les cheures vont deuant
 Tousiours, & les brebis derriere.

Robin.

Les cheures sont de telle maniere,
 Car elles ont tousiours l'auantage,
 Elles portent barbe au visage,
 Et les brebis n'en portent point:
 Pource ie respons à ce point,
 Que les hommes, sans doutance,
 Si doyuent auoir la puissance
 Sur leurs femmes toute leur vie.

Marote.

Or me dy Robin, ie te prie,
 De deux choses l'une des deux,
 Laquelle tu aimerois le mieux
 Auoir dedans ton cul la teste
 d'une cheure, cornue beste,
 Ou que ta teste fust boutee

Au

Au cul d'une cheure crotée,
Lequel meilleur te sembleroit,
Si faire le te convenoit,
Quer'en semble-il par ta foy?

Robin.

Je serois en grand esmoy,
Qui m'auroit la teste boutée
En vn si vilain cul croté
Je serois digne de mourir.

Marote.

Tu n'aurois garde de courir,
Bien serois embureliquoqué
Mais tu serois mieux mocqué,
Si en ton cul, plus noir que lieure,
Estoit la teste d'une cheure,
Tu aurois au cul la corne.

Robin.

Le cornet en seroit bien morne,
Quant est de ma part, i'en dy fy.

Marote.

Veux tu que nous donnons dessus,
A ceux qui gardent les chameaux,
Toy & moy billerons contr'eux,
Si tu veux ie les gaignerons,

Robin.

Allons à eux, & iouerons,
En gardant nos brebis a paistre.

Le cultivateur.

Icyle voit venir, & dit.

Ha

48 LA PATIENCE
Ha Robin tu es le maistre
De Marote, ie le voy bien.

Robin.

Pour vous n'en demourra rien,
Car ainsi la meine qui l'a.

Le pasteur des chameaux.

Le gentil Robin es tu là?
Dieu gard Robin aussi Marote.

Marote.

Dieu gard la compagnie route,
Et saulue les brebis des loups.

Robin.

Vous en parlez comme ialoux
De Marote, si crov beau sire:
Mais si vous en voulez rien dire,
Deux contre deux, voicy dequoy.

Le cultivateur.

I'en suis d'accord, quant est de moy,
Et mon compagnon ensuyuant,
Nous deux irons certainement
Contre toy & contre Marote.

Le pasteur.

Or sus doncques sans faire riote,
A qui le champ en demourra,
Et frappe qui frapper pourra,
Et puis mangerons reffions.

Marote.

Par ma foy nous vous deffions,
Robin & moy, sans plus attendre:

Pource:

Surce pensez de vous deffendre,
 Car nous en aurons l'avantage

Il le frappe. Le cultivateur.

En ietteray auant mon gage,
 Qu'ainsi tost, fusle ravalé:
 Vance toy Matusalé,
 Et luy dourons chacun son cop.

Le pasteur.

Frappe bien roidement Iacob,
 Robin est desia esbahi.

Il la bat Robin.

Ha ma Marote ie suis trahy,
 Aide moy, car ie t'en prie.

Marote.

Frappe fort, ne t'esbahis mie,
 Tiens toy roide, nous les auons.

Le cultivateur.

Au meurtre, ils gaigneront,
 Si autrement vous ne frappez.

Le pasteur.

Vous serez tantost attrapez,
 Par l'ame qui au corps me balle,
 J'ay frappé de bonne sonale,
 Reculle toy Robin, reculle.
 Mais toy-mesme, si te bulle,
 Tu fais merueilles de crier.

Robin.

Le cultivateur.

Il nous est venu deffier.
 Je croy qu'il s'en repentira.

D

Le pasteur.

Je ne sçay comment en ma vie
De Robin qui est si gaillard,

Robin.

Ha ha i'ay rompu mon billard,
Je n'ay ne billard ne riboulle,
De quoy puisse frapper la boule,
Que luy meschee qui le fit.

Le cultivateur.

Par ma foy tu es desconfit
A ce coup Robin te rens tu?

Robin.

Je seroye bien malostre:
Car ie n'ay cause de me rendre.

Marote.

Quand il n'a dequoy se deffendre,
Il en doit estre excusé:
Mon billard m'a bien abusé,
Qui luy a failly au besoing.

Le laboureur.

Vous estes venus de bien loing,
Entre vous deux nous assaillir,
Et ne cuidiez pas faillir
A nous gagner certainement.

Le pasteur.

Parlons d'un autre esbatement,
C'est assez ioué pour cest'heure
Robin or me dis sans demeure,
As tu rien en ta panetiere?

Re

DE IOB.

55

Robin.

T'ay vne miche toute entiere,
Et vn gros trigoton de lart.

Le cultivateur.

Il suffit assez pour ta part,
Et i'ay aussi du matignon,
Pour moy, & pour mon compagnon,
Manger souuent, si me fair viure:
Car i'ay le ventre si debile,
Qu'il sonne comme vieil tabour:
Et entre nous gens de labour,
Qui sommes tousiours à la peine,
Si nous n'auons la pance pleine,
Certes nous ne pouuons rien faire.

Le pasteur.

En cest abrit à beau repaire,
Seyons nous tous en ceste place,
Et mangerons sans plus d'espace
De ce petit que nous aurons.

Robin.

Et apres manger, que boirons?
Pleust or à Dieu le Roy diuin,
Que nous eussions du meilleur vin,
Qui soit en l'hostel & en l'estre
Maintenant de Iob nostre maistre,
Chacun de nous vn plein picher.

Le cultivateur.

Ha Robinet, mon amy cher,
Nous autres qui faisons les vignes,

D 2

De boire vin sommes peu dignes,
A grand peine auons de la laine,
Que mourir puisse-il de glaive,
Qui telle ordonnance amene:
Pauures laboureurs n'ont que peine,
Nous gardons les bœufs & les vaches
Et les cheureaux, que bien le sçachez,
Et nourrissons cheures, cheureaux,
Et ne mangeons nuls bons morceaux,
Nous ne mangeons rien qui vaille,
Fors que la merde de la paille.
Encores pour nous anniller
Nous donnent le boyau cuiller,
Et sommes appelez vilains.
De tout cela fut bien du moins:
Mais chacun nous bat & nous pille,
Nous labourons froment & seigle,
Et si ne mangeons que pain d'orge,
Qui escorche toute la gorge,
C'est vne tresmauuaise guise.
Et quand fait froid, & vent de bise,
Nous n'osons approcher du feu:
Cestapeseures ont le lieu,
Et les mal vestus sont au vent.
Cecy arriue bien souuent,
Ceux qui ont le meilleur appetit
A manger, ont le plus petit,
C'est grand pitié & desconfort.

Le pasteur.

L'on

L'on dit que Dieu ne fit onc tort,
 Et qu'il fit tout par sapience:
 Mais cil qui fit tell'ordonnance
 N'en deuroit pas estre loué.
 Tous fusmes de l'arche Noé,
 Et cuide, selon mon sçauoir,
 Que chacun homme doit auoir
 Autant de bien l'un comme l'autre.
 Nous n'auons rien qui soit nostre,
 Les grans Seigneurs ont tous les biens,
 Et nous le pauvre peuple n'a riens,
 Fors que peine & aduersité.
 Par mon serment c'est grand pitié,
 Ceux qui ne font nul labourage,
 Des biens mondains ont l'auantage:
 L'or, l'argent, le vin & le pain,
 Et nous autres mourons de faim,
 Qui amassons les biens sur terre.
 Tout le monde nous meine guerre,
 Et sommes batus, qui qu'en gronde:
 Iamais n'aurons bien en ce monde,
 Car il n'y a qui nous secoure.

Robin.

Nous naquistmes en mauuaise heure,
 En pauvreté, & en meschance:
 Dieu ne vult pas qu'ayons puissance,
 N'en parlons plus, ie vous en prie:
 Ainsi faut vser nostre vie,
 Toujours a esté & sera,

D 3

54 LA PATIENCE
Jamais pauvre homme bien n'aura.
Laiſſons telles paroles eſter
Et parlons d'un autre meſtier
Mangeons fort & nous donnons ſoye
C'eſt tout le meilleur que ie voye
Et prenons tout en patience.

Le cultivateur.

C'eſt bien dit par ma conſcience
Autre choſe ne pouuons faire
Mangeons fort penſons de nous taire
Car il eſt bien fol qui s'eſmoye
De pauvreté par nulle voye.

Icy chascun s'en va en ſon lieu.

Et Sathan commence.

Sathan.

Harau harau ie ſuis venu
Le pas le trot le ſault menu
Grand beſoin m'a faiſt y venir
Ie ne m'en pourroye plus tenir
Ie viens d'environner le monde
Ou tout mal & peché abonde
Maintes gens ay fait eſbahys
I'ay paſſé par tout le pays
Par les royaumes & prouinces
Ou i'ay faiſt maint courroux à princes
Il n'y a ville ne cité
Que ie n'aye bien viſité
Chateau ne maiſon ne village
Ou ie n'aye laiſſé mon gage.

Tout

Tout le pays i'ay conquesté
 Mais vn peu me suis arresté
 Sur les parties d'Orient.
 Pour aduiser qu'ils faisoient
 Mais oncques ny ay peu veoir
 Nul homme ny apperceuoir
 Que tous ne soyent entachez
 De mauuistié & de pechez
 Fors seulement vn faux vilain
 Ou ie n'ay peu mettre la main
 Lequel se faict appeller Iob
 De la lignee de Iacob.
 Contre luy n'ay sceu tant faire
 Qu'a nul peché le puisse traire
 Car il ayme Dieu & le craint
 Et Dieu en sa garde le tient.
 Entour luy i'ay perdu ma peine
 Que Dieu luy doit la male estraine
 Pour ceste cause seulement
 Suis cy venu hastiuement
 Par deuers vous ay de requerre
 Contre ce faux vilain trichierre
 Car qui viure le laissera
 Grand dommage nous portera
 Pensons y chascun de sa part

Lucifer.

Or sus le diable y ayt part
 Tous les diables deçà la mer
 Sur quand que me pouuez aymer

Venez auant sans contredire
Et entendez ce que vueil dire
Vous voyez que Sathan racompte
Le m'esbahis que n'avez honte
Vous ne faictes chose qui vaille
Ceans n'a que luy qui traueille
A nostre maison auancer
Chascun de nous y doit penser
A peu certes que ie n'enrage
Quand ie regarde le lignaige
D'Adam qui fut le premier pere
Car Dieu de sa grace planiere
Leur a promis son Paradis
Duquel nous cheumes iadis
Ou nous estions à grand ioye
Plus clers que le Soleil qui raye
Et estions lassus en gloire
Mais maintenant c'est le contraire
Car nous en sommes deiettez
Du hault en bas à grand villetes
En perdurable damnement
Sans auoir iamais sauuement.
Dieu le pere nous a faict tort
Pource pensons de mettre à mort
Tous ceux qui sont de la lignée
D'Adam & de sa compaignie
Car nous auons possession
De les mettre à damnation
Et par expres ie vous commande

Que

Que tous ceux qui sont de la bande
 D'Israël & de Beniamin
 De Jacob & de Neptalin
 Et qui sont signez en leur frond
 Frappez les au cœur si parfond
 Que i'amaïs ne puissent guerir
 Et qu'il leur conuienne mourir
 De la mort qui est eternelle
 O nous en la peine infernelle
 Sans auoir i'amaïs bien ne ioye.

Berith.

Hau maistre maistre ne t'esmoye
 Ne te desconforte pour rien
 Noz besongnes se portent bien
 Car tu auras n'en doubte mie
 Par tout le monde seigneurie
 Ie viens de diuerses contrees
 Ou i'ay passé mons. & valles
 A trauers champs à trauers hayes
 Par bois par buyssons & par voyes
 Sans auoir repos ne seiour
 Et si ay veillé nuit & iour
 Mais ie te foy bien assauoir
 Car oncques ie n'ay peu veoir
 En tous ceux que i'ay aduisé
 Par qui tout ne soit diuisé
 Par guerres par dissentions
 Par fauces machinations
 Le fils meine guerre à son pere.

D 5

Et la fille contre la mere,
 L'un frere si veut tuer l'autre
 Et pource trestout sera nostre
 Oncques puis le deluge Noé
 Ne fut si faulx peuple trouué
 Si desloyal ne si cruel
 Comme le peup e d'Israël
 Lequel Dieu si auoit esleu
 Mais il s'en trouuera deceu
 Ils viendront en noz repaires
 Tant les peres comme les meres
 En enfer à damnation
 Pource que leur intention
 Est tousiours & toute leur cure
 A faire peché & ordure
 C'est leur mestier, c'est leur office.

Belzebuth.

Lucifer prince de malice
 Escoute ouure tes oreilles
 Je gouerne les orgueilleux
 Les ireux & les enuieux
 Auourd'huy orgueil & enuie
 Bara traison & tricherie
 Tiennent du tout entierement
 Le monde en leur gouuernement
 Je les gouerne & enseigne
 Chascun d'eux porte mon enseigne
 Larrons meurtriers pilleurs de gens
 Aduocats procureurs sergens

Et

Et tous les vsuriers du monde
 Nul n'y a qui ne me rebonde
 Car i'ay deuers moy parescrit
 Tout ce qu'ils ont fait & dit
 Les memoire les protocollés
 Les informations les rolles
 Dequoy ie les accuseray
 Et tous leurs peche z monstrey
 Quant le iuge venu sera
 Qui bons & mauuais iugera
 Par ce point en enfer viendront
 Et compaignie noustiendront
 A iamais sans autre refuge
 Du Dieu ne sera pas vray iuge
 Au grand iour de son iugement.

Leuiathan.

Escoutez mon gouuernement
 Dire vous vueil sans arrester
 Dont ie sers & de quel mestier
 Suis le prince des fauteurs
 Et de ces faux fornicateurs
 Et de ces faux putains trichereſſes
 Qui de plaiſirs ſont lichereſſes
 Corrompent leurs mariages
 Dequoy viennent pluſieurs dommages
 Et les baſtars les piſſechiens
 Ont aujourd'huy tous les biens
 Et ceux de loyal mariage
 Et forclus de leur heritage.

C'eſt

C'est le droict ieu de la cuiere
 Quant le deuant s'en va derriere.
 Encores en y a d'autre guise
 Qui me seruent à ma deuise
 Ce sont les putains macquerelles
 Qui vendent les ieunes pucelles.
 Elles sont bien d'une autre sorte
 Que ceux qui vendent la chair morte
 La chair toute viue vendent
 Pour le gain qu'il y attendent
 Pource celles auront pour leur peine
 Le feu d'enfer à leur demaine
 Les mauuaises vieilles houlieres
 D'autres en y a qui sont forcieres
 A qui i'ay aprins la science
 Et trestout l'art de Nigromance
 Qui font les gens estre malades
 Par leurs charois par leurs balades
 Et les font du tout assiecher
 Sans nullement les atoucher
 Auecques elles me suis tenu
 Depuis quen'estoye venu
 Et si n'ay gueres demouré.

Lucifer.

Tu as noblement labouré
 Seigneurs diables entendez moy
 Je suis entré en grand esmoy
 De ce faux vilain enragé
 Dont Sathan nous a langagé.

C'est

C'est celuy le quel chascun nomme
 Par son droit nom Iob le prend d'homme.
 Il nous conuient trouuer maniere
 Ou par deuant ou par derriere
 Comment nous le puissions auoir
 Briefuement & le deceuoir
 Et du tout en tout le deffaire
 Puis qu'il est à noz faiçts contraire
 Pensons à luy faire greuance.

Berith

Il est bien en nostre puissance
 Certes il ne peut eschapper
 La tant ne se pourra taper
 Ceans viendra quel qu'il attende
 Et tous ceux qui sont de la bande
 D'Adam qui mordit en la pomme.
 Pourquoy toute femme & tout homme
 Qui sont & furent d'Adam ne
 Seront auecques moy damnez
 Mais moy vous en pouuez tenir
 Ceans ie les feray venir
 Briefuement ne vous en doutez.

Belzebuth

Je vous pry que vous m'escoutez
 Car si m'en voulez laisser faire
 Ceans viendra sans tarder guere
 Fin de tenir compaignie
 A Adam & à sa lignee
 Pharaon & à Iacob

Puis

62 LA PATIENCE

Puis qu'il se faiet appeller Iob
En enfer sera sa maison
Es limbes & obscure prison
Qui est sans clarté tenebreuse

Leuiathan.

Sathan fera trop mieax la chose
Puis qu'il a le faiet entrepris
Car il est saige & bien aprins
Et a faiet le commencement
Ce fut luy qui premierement
Trouua la guise & la maniere
Comme Eue la premiere mere
Fit Adam contre Dieu pecher
Quant la pomme luy fit lecher
Pourquoy luy & tout son lignaige
Sont & seront en nostre oultraige
En enfer trestout descendu.

Sathan.

Il y a long temps que i'ay rendu
Pour le cuyder prendre en ma tente
Mais i'ay failly en mon attente
Car il craint Dieu si fermement
Et l'aime si parfaictement
Que de luy ne puis approcher
Mais si ie le puis acrocher
Et mettre ma patte sur luy
Souffrir luy feray tant d'ennuy
Que son Dieu il reniera
Et iamais ne s'y fiera

Et

Et luy donray tant de martyre
Que ie luy feray Dieu maudire
Par maintefois i'ay mis grand peine
A le cuyder prendre en laine
Mais non pourtant si i'ay failly
Encores sera assailly
Et qui s'aymera si se garde.

Lucifer.

athan ie t'en baille la charge
Tu as faict le commencement.
ense bien de l'acheuement
onte te sera & dommage
tu n'as sur luy l'auantaige
ant que meure de male mort
si tu veux aucun effort
ens yne legion de Diables
Quels te seront aydables
ntre luy & contre tous ceux
i veullent monter sur les cieux
ix que trouuerez en la voye
opéz les au cœur dure playe
ort qu'ils laissent leur chemin
u'ils viennent à malle fin
ques nous par compaignie
n doncques sans demouree
y du pris que tu poultas.

Sathan.

en vois & tu demourras
y quant reuiendray arriere

Que

Que tu me feras bonne chere
 Vous autres qui ceans demourez
 Si ie le faux si me secourez
 Puis que Lucifer le commande
 Aller m'en vœux sans plus attendre
 Berith tiens roy aupres de moy.

Berith.

Va deuant ie vois apres toy
 Quant toy & moy serons ensemble
 Il n'y aura rien qui ne tremble
 Garde soy qui garder pourra
 Car tel s'en rit qui plorera
 Ie me mets premier à la voye.

Lucifer.

Allez le diable vous conuoøye.

*Icy s'en vont à l'entour de la terre: & se faic
 pause & les Anges chantent & son-
 nent les instrumens.*

Dieu.

Dont viens tu maintenant Sathan
 Dont viens tu ne que viens tu querre?
 A moult mal esesmeu Sathan.

Sathan.

Ie viens d'environner la terre
 Et l'ay compassee en corne
 Pour veoir comme chascun se gouuerne
 Bien ou mal i'ay tout aduise.

Dieu.

Or me dis n'as tu pas vise.

Iob

Iob mon bon seruiteur loyal
 Sur tous autres le plus feal
 En terre n'a point son semblable :
 Car il est doux & amiable :
 Simple patient de bonnaire
 Et qui craint moult à me desplaire :
 Iamais ne vouldroit estre en place
 Ou nul mal & peché se face
 Qui puisse à son escient.

Sathan...

Fv fv de luy c'est pour neant :
 Si Iob t'ayme & te craint
 Tel amour ie ne prise point :
 Car tu le gardes & deffens
 Ses biens sa femme & ses enfans
 Et luy as donné la puïssance
 De tous biens en grande abondance :
 Toutes ses operations
 Ses terres & possessions
 Et ce qui dedans naît & croist
 Tu l'as de ta bouche benoist
 Et ses heritages quel'onques
 Pourquoy ne t'aymeroit il donques ?
 Mais si tu veux lascher ta main
 Un petit tu cognoistras bien
 'il t'aymeroit parfaitement
 Si tu le touches asprement
 Tu le chastiant par rigueur
 Il perdra toute sa vigueur.

E

66 LA PATIENCE
Et s'il pert ses bœufz & ses vaches
Et ses biens ie veux que tu saches
Que du tout te reniera
Tu ne le dois ia tant louer.

Dieu.

Puis qu'ainfi est pour approuuer
De luy sa vraye patience
Sathan ie te donne puissance
En tous ses biens qui sont sur terre.
Ie vueil que tu luy faces guerre
Ie t'abandonne tous ses biens
Et le te baille en tes mains
Et sa femme & ses enfans
Mais toutesfois ie te deffens
Par expres que tu ne luy touches
Et que de son corps tu n'atouches
Garde toy d'y mettre la main.

Sathan.

Ie croy qu'auant qu'il soit demain
Sans autre terme ne respit
Ie luy feray tant de despit
Qu'il maudira Dieu & ses Anges
N'y demourra maison ne granges
Possessions ny heritage
Ou ie ne face beau mesnage
Ie le rendray si esbahy
Qu'il dira que Dieu l'a trahy
Et pourra bien crier hélas.

Dieu.

Dieu.

Sathan ie sçay bien que tu as
 La pieça sur luy grant enuie
 Pour luy cuider tollir la vie
 Mais ie croy que tu pers ta peine
 Car il m'ayme d'amour certaine
 Parce ie te donne peuuoir
 Sur tous ses biens à fin de veoir
 L'amour & la parfaicte foy
 Qu'il a tousiours auecques moy
 Pour le purger & netoyer
 Comme la precieuse perle.

Sathan.

C'est le plus faux vilain rebelle
 Qu'onques en ma vie ie vy
 Mieux luy fut estre mort que vy
 Car s'il sçauoit ce que ie pense
 Iamais en moy n'auroit fiance
 A ce coup i'en seray vengé
 Car tu m'en as donné congé
 Autre chose ne demandoye.

Dieu.

Or t'en va donc la malle voye
 Car autre chemin ne te faut.

Sathan.

De grand ioye feray vn saut.

*Icy faict vn sault en
 s'en allant.*

Ou es tu Berith as tu ouy?

E 2

I'av le cœur trestout refiouy
N'auons nous pa. bonnes nouuelles?

Barish.

Point ne seront bonnes ne belles :
A celuy qui s'appelle Iob
Il luy est mescheu à ce coup
Puis que Dieu ou est sa fiance
Nous a donné sur luy puissance
Allons doncques sans plus tarder
Pou aduifer & regarder
La maniere quant ne comment
Auoir le puissions briefuement
Dedans nostre enfer prisonnier.

Sathan.

C'est bien dit: allons luy donner
Tribulation & meschances.

*Icy s'en va impetueusement & menant
grand bruit.*

Le premier filz.

Pour maintenir les ordonnances
De mon pere sans varier
Ie vueil aujourd'huy conuier
Tous mes freres sans nul desloy
Et mes sœurs à disner ou moy
Et si leur tiendray table ronde
Car sur toutes choses du monde
La meilleure par verité
G'est maintenir fraternité
Fieres & sœurs par compaignie.

Am

Au monde n'a si douce vie
 Je voys à eux & leur diray
 Mais premierement si rui ray
 A mon pere: car c'est raison.

Icy dit au messagier en commandant.

Or pensez doncq' de la maison
 Dressez les tables prestement
 Et que nous ayons largement
 Bon vin & planté de viande
 Car ie le vueil & le commande
 Au iourd'huy veux faire ma feste
 Pour l'amour d'eux grant & honnestes
 Et qu'ilz soyent bien festoyez.

Le messagier.

De cela ne vous esmoyez
 Tout sera fait en bonne guise
 La table sera tantost mise
 Et par dessus blanche touaille
 Pain vin & planté de vitouaille
 Fiez vous en du tout en nous.

Le premier filz.

Monseigneur ie viens deuers vous
 En vous suppliant qu'il vous plaise
 Venir chez moy prendre vostre aise
 Et dîner en la compagnie
 De voz enfans ie vous en prie
 Et vous me ferez grand honneur.

Iob.

Leau filz ie prie nostre seigneur.

Qu'il vous doint à tous si bien faire
 Que voz œuures luy puissent plaire
 Mais aller n'y puis pour cest heure
 Pardonnez moy si ie demeure
 Vne autre fois ie iray à loysir.

Le premier filz

Vostre volonte & plaisir
 Monseigneur accomplir voudroye
 S'il vous pleust cassiez grant ioye
 Car ie fois ennuit mon disner
 Pour demonstrier & enseigner
 Vostre vouloir & ordonnance.

Iob.

Ie pry Dieu qu'il vous doint puissance
 De maintenir fraternité
 Tous ensemble par amitié
 Car autre chose ne desire
 Pource ie vous ay vblu dire
 Comment vous deuez coatenir.

Le premier filz.

Puis qu'il ne vous plaist y venir
 S'il vous plaist mes sœurs y viendront
 Et compagnie nous tiendront
 A leurs six freres & à moy.

Iob.

Ie le veux & le vous octroy
 Sus filles puis qu'il luy agree
 Allez avec luy par compagnie
 Et vous gouuernez sagement,

La premiere fille.

Vostre vouloir entierement
 Monseigneur nous accomplirons
 Et là où vous plaira yrons
 Car d'y aller auons grand ioye.

La seconde fille.

Mettons nous doncques en la voye
 Que Dieu nous mait à la maison.

La troisieme fille.

Allez deuant: car c'est raison
 Puis qu'il vous plaist en la bonne heure.

Le premier filz.

Or allons que Dieu nous sequeure
 Et appellerons tous noz freres
 La compagnie en sera maires
 Et plus honnestes si me semble.

La premiere fille.

Dieu nous a trestous mis ensemble
 Pour s'amour & grace conquerre.

Icy va à ses freres & dit. Le premier filz.

Celuy Dieu qui fit ciel & terre
 Mes freres vous doint bonne vie.

Le second filz.

Dieu gard la belle compagnie
 De mal faire & de mal auoir.

Le premier filz.

e viens pour vous faire assauioir
 Que mon disner est tantost prest
 Et que vous veniez s'il vous plaist.
 Disner avec moy la table est mise.

E 4

Le second filz

Mes freres ruis que c'est la guise
 Et l'ordonnance nostre
 Allons y tous en bonne chere
 Pour maintenir fraternité.

Le quart filz

C'est tresbien dit en verité
 Allons luy tenir compagnie
 En maintenant ioyeuse vie
 Que Dieu nous enuoye paix & ioye.

Le cinquieme filz dit au premier.

Or allons que Dieu nous conuoye
 Beau frere mettez vous deuant
 Car vous estes le plus sçauant
 Et le plus aîné de la feste.

Le premier filz.

Voulontiers a vostre requeste
 Suyuez moy. Dieu vous doint sa grace
 Et faire chose qu'il luy plaise
 Car i'ay grand ioye vrayement.
 De vous veoir assemblement.

*En entrant dedans.**Le premier filz.*

Freres & leurs grands & menus
 Vous soyez les tresbiens venus
 Je vous abandonne mes biens.
 Ils sont vostres & non pas miens:
 Or nous seyons par bonne amour
 A table sans faire clamour

Tous

Tous comme bons freres & sœurs
En louant Dieu de tous noz cœurs
De ses grans graces & merites.

Le second filz.

C'est bien raison quant vous le dictes.
Or ça mes freres de par Dieu
Chacun de nous prene son lieu
A table sans nul arrest.

Le tiers filz.

Or sus doncques puis qu'il vous plaist
Seyons nous tous sans nulle attente.

Icy s'asurent tous à table.

Le meffager

Messeigneurs voicy la viande
Que ie vous apporte a planté
Mangez que Dieu vous doint santé
Et sa benediction
Vous doint fructification
Et viure ensemble longuement.

Le premier filz.

Ie vous supplie tres-humblement
Mes freres faictes bonne chere.
Car vrayement c'est ma ioye entiere
Que de veoir ceste compagnie.

Le quart filz.

Chacun de nous vous en mercie
De cœur de corps d'affection
Car nous auons prouision
Largement à grand abondance

E s

Dieu nous vueille donner puissance
De le vous rendre briefuement.

Le cinquiesme filz.

Nous sommes aises grandement
Mon frere la vostre mercy.

Icy mangent, & les instrumens sonnent.

Icy s'en va Sathan au roy de Sabee &

le tente en disant.

Hau roy de Sabee que fais tu cy?
Dors tu reueille toy refueille
Entens moy ouure tes oreilles
Ie viens pour te dire vn message
Escoute tu feras que sage
Les Dieux si m'enuoyent à toy
Lesquelz te mandent de par moy
Que tu perdras toute ta terre
Briefuement si tu ne fais guerre
A trestous ceux qui maintiennent
La loy de Moysé & la tiennent
Ce sont les enfans d'Abraham
De la terre de Canaam
En Orient empres Egypte
Si leur nation n'est destruiete
Ton royaume va a neant
Car les grans Dieux si m'enuoyent
Pource lieue to / & te aduise
Et ie t'enseigneray la guise
Et te diray que tu feras
Tes gendarmes enuoyeras

Des demain sans attendre plus,
 Tout fin droict en la terre d'Vs,
 Là demeure vn puissant homme,
 Lequel par son nom Iob se nomme,
 Qui est le plus riche du pays:
 Les dieux sont trestous esbahys
 Comment tu le laisses tant viure:
 Resueille toy, & te deliure,
 Tu gaigneras vaches & veaux,
 Brebis, anesses & chameaux,
 Cheuaux, iumens, or & argent
 Pour enrichir toute ta gent,
 Et si feras au Dieu seruice,
 Croy moy, ou tu feras que nice,
 Et pense tantost de luy nuire:
 Car c'est celuy qui veut destruire
 Toute la foy que nous croyons.

Le Roy.

En ensuyuant les dieux,
 Iupiter, Apollo, Mahom,
 Chanu, Diane, Belial,
 Qui sont de la cour celestial
 à sus en vostre grand conuenir
 aires fouldres, pluyes & vent,
 et faites les arbres flourir,
 et l'eau sur terre courir:
 Jercy vous cry humblement,
 j'ay mespiins aucunement,
 : louant vostre grand puissance,

De

De la tresbelle demonstrence
 Que i'ay veu quant ie me dormoye
 Auis m'estoit que ie veoye
 Vostre sainct Ange qui estoit
 Deuant moy & m'amonnestoit
 Que tantost ie me releuasse
 Et mes gendarmes enuoyasse
 Pour piller en la terre d'Vs
 Tous les biens d'un vilain reclus
 Qui veut nostre loy auiller
 Pource ie veux sans plus taider
 A voz commandemens entendre.

Icy parle à son Chambrelan.

Chambrelan descendez à val
 Et m'appellez mon mareschal
 Et mes capitaines de guerre
 Descendez & les allez querre
 Et leur vueillez de par moy dire
 Que tous viennent sans contredire
 Car i'ay avec eux affaire.

Le Chambrelan.

Cher sire sans le contredire
 Vostre vouloir accompliray
 Et tantost venir le feray
 Je vois à eux sans plus attendre.

*Il s'en va querre le mareschal & le capitaine
 avec les dix armex.*

Mes seigneurs le Roy vous salue
 Lequel de par moy vous mande

Qu'à

Qu'à luy venez tous d'une bande,
Et mande par especial,
Vous monseigneur le Marechal,
Et tous les autres Capitaines,
Pour aucunes choses certaines,
Lesquelles il a à vous dire.

Le Marechal.

Nous y allons, sans contredire,
Puis qu'il luy plaist le commander:
Mais que nous veult il demander?
Il a sceu quelques nouvelles.

Le Chambrelan.

Ouy, mais ie ne sçay pas quelles:
Aussi tost qu'il s'est esueillé
De dormir, il m'a appelé,
Et si m'a transmis deuers vous.

Le Capitaine.

Or sus doncques auançons nous,
Allons sçauoir qu'il nous dira:
Vostre faict trop mieux en ira,
Si nous le seruons loyaument.

Le premier armé.

Or me dites premierement,
S'il rien mal, que vous sçachez?
Vous pry point ne le celez,
Le Roy n'est il pas en bon point?

Le Chambrelan.

Ouy certes, n'en coutez point,
Il est la sus en la grand salle,

Où

Où il se iouë, & se galle
En attendant qu'allez à luy.

Le second armé

Mahom le gard que c'est celuy
Par qui sommes doutez & crains,
Et duquel nous auons les biens,
Et les richesses & honneurs.

Le premier armé.

Je vous pry doncques mes Seigneurs
Allons y tous sans demourance,
Tous ensemble d'une alliance,
Puis qu'il luy plaist nous mander querre.

Le Marechal.

Allons, ie vois deuant grand erre.

Il parle au Roy.

Noble Roy de tresgrand puissance,
Honneur & toute reuerence
Vous soit à tousiours-mais donné

Le Roy

Bien vienne ceste compagnie,
Seigneurs, c'est raison que ie die
De mes secrets vne partie,
Ou autrement ie pers mon sens,
Et deuiendroye hors du sens,
Je suis entré en grand pensee,
D'une chose que i'ay songee,
Ie ne sçay pas si c'est mensonge,
Ennuyt m'est aduenü en songe,
Que iestoye admonnesté

De

De par les dieux de maïesté,
A peine de perdre ma terre,
Que i'enuoyasse faire guerre
A ceux du pays de Iudee,
Qui ont nostre loy abaissée.
Rien ne prisent le dieu Mahon,
Oncques puis le regne Pharaon
Ils se furent tant esleuez,
Dont tantost seront bien greuez
Et menez à destruction,
Qui n'y mettra prouision:
Et m'estoit aduis proprement
Qu'on me faisoit commandement
De par Mahom & par Iupin,
Et aussi de par Apollin,
Que ie vousisse enuoyer
Les gens d'armes pour guerroyer,
Pour destruire & deffaïre
Un vilain qui leur est contraire,
Lequel par son nom Iob se nomme,
Orient le plus puissant homme.
Tout cecy ie veis en dormant,
Où suis esbahy grandement,
Un songe m'a fait resueïller,
Orce vueillez-moy conseiller,
Vous pry qu'en cestuy pensons:
Il est temps que nous armons
Et tout ce que voloye dire,
A de appaiser l'ire

De

80. LA PATIENCE
De nos dieux qui sont courroucez...

Le Marfchal.

Sire vous trouuerez assez
De gens d'armes & gens de trait,
Pour enuoyer a cestuy fait,
Qui sont prests à vous obeyr:
Veez Sarraus en presence,
Et d'autres de son alliance,
Tous armez & appareillez,
Qui sont moult forts & bien taillez,
Pour faire ce qu'il vous plaira.

Le Capitaine.

Par Mahomet, qui m'en croira,
Nous irons sans plus d'espace:
Car les dieux par leur sainte grace,
Cher Sire, le vous ont mandé,
Et expressement commandé,
C'est d'amour grand signifiace,
Qu'ils ont avec vous, sans doutance,
Bien en deuons estre ioyeux.
Car vous estes amy de ceux,
Qui ont fait & formé le monde.

Le premier armé.

Si ie trouue vilain qui gronde
En tout le pays de Iudee,
Ie lui donray tel coup d'espee,
Si ie l'attrappe sur la teste,
Qu'il cherra mort comme vne beste,
Ie leur feray si forte guerre,

Que:

Que dormir leur faudra sur terre,
 Il n'y demourra maison ne lieu,
 Où par tout ne mette le feu,
 Je le vous promets & affie.

Le second armé.

Je leur touldray du corps la vie,
 Tous ceux que pourray attraper,
 N'auront garde de meschapper:
 De ceste espee esmoullue
 Leur sera la teste fendue,
 Si grand ioye ay de la nouvelle,
 Que trestout le cœur me sautelle:
 Car il y a long temps pour certain,
 Qu'en guerre ie ne gaignis rien,
 Trop me tarde que ie n'y suis.

Le troisieme armé.

Par mon Dieu Mahom si ie puis
 Trouuer nul vilain de Iudee,
 Je luy donray de mon espee
 Sur la teste telle quoquasse
 Qu'il cherra mort en la place.
 Cher Sire, fiez vous en moy:
 Car par la foy que ie vous doy,
 Je sçay bien le lieu où repaire
 Tout l'auoir, & le bestiaire
 Et celui Iob dont vous parlez.

Le Roy.

vous pri que vous y allez,
 prenez tout, ne laissez riens,

F

Je vous abandonne ses biens,
 Trêstout ce que vous trouueriez
 Sera vostre, riches serez,
 Et acquerrez l'amour des dieux,
 Lesquels si vous vueillent conduire.

Le Capitaine.

Vostre commandement cher Sire,
 Puis que vous l'avez commandé,
 Nous le ferons sans contredire,
 Puis que les dieux si l'ont mandé.

Pause. Icy arriuent en la terre d'Vs.

Le Marechal.

Il a pleu aux dieux nous conduire
 Par maint & tresfort passage,
 Tant que nous sommes à vray dire
 Au pays de Iob ce faulx vilain.

Le Capitaine.

Que chacun si mette la main
 A ce rustique de village.

Le premier armé.

Sus faulx paillard, laisse l'ourrage,
 Mourir te feray de ma main,
 Je cognois bien à ton visage
 Tu es vn tresmauuais vilain.

Le Rustique.

Dea vous me congnoissez tresbien,
 Comment auez vous nom mon maistre?
 Or par dieu ie voudroye estre
 Aussi beau varlet comme vous.

Le Marefchal.

Ce vilain ſe mocque de nous,
 Frappons deſſus, plus n'attendons,
 C'eſt de ceux que nous attendons,
 Fauls vilain, tu auras cecy.

Le Ruſtique.

Ha monſeigneur pour Dieu mercy,
 Las ie ſuis mort, bien dire l'oſe,
 Helas ie ne ſeïs oncq' la choſe
 Parquoy ie deuſſe ainſi mourir:
 He Dieu vueille moy ſecourir,
 Mourir me faut, ie le voy bien.

Le Capitaine.

Il vous eſt meſcheux, faux vilain,
 Vous pouuez bien crouler la teſte:
 Oncques ne fuſtes à telle feſte,
 Au premier bien ie le vous dis.

Le Ruſtique.

Hee tresdoux Dieu de paradis.
 Mon eſperit te recomant.

*Il chet à terre mort.**Le Mareſchal.*

Il en eſt faiſt, certainement:
 Car il ſ'en va en l'autre monde,
 S'il y a plus vilain qui gronde,
 Il a trouué à qui parler:
 Seigneurs, il nous faut en aller,
 Emmenons ces beſtes courant,
 Et retournons au demourant.

F 2

84 LA PATIENCE
Au iour de demain bien matin.

Le capitaine.

Nous auons gaigné bon butin,
Sans trouuer qui nous contredie:
Ie m'attens que ie feray riche
Vne fois le temps qui viendra.

Le premier armé.

Ie ne sçay comment m'en prendra,
Mais pour mieux deliurer la presse,
Ie monteray sur ceste anesse,
Or fus doncques hary auant.

Le Marechal.

Il nous faut passer par deuant
Le chasteau des Caldeens,
Quand ils nous verront tant de biens,
Ils voudront faire comme nous.

*Icy s'en vont ceux de Sabee avecques la proye, par
deuant vn chasteau de Caldee, & parlent ceste
dudit chasteau.*

Moradas.

Sau volencombres que sont vous,
Dont vient ceste compaignade.

Le Marechal.

Hau Seigneurs, certes de l'estrade,
Dessus le pays de conqueste.

Carados.

Qu'auons trouué ceste beste
Vacques & egox celia,

Le

Le Capitaine.

Encores d'autres en y a,
Si vous les voulez aller querre:
Nous les auons prins en la terre
D'un payfant qui a nom Iob.

Nabarroth.

A qui pya stay bien trop,
Lequace demouche roppin.

Le Marechal.

Sçachez que nostre Dieu Iupin,
Et Mahomet l'hont commandé
A nostre Roy, & l'ont mandé:
Pource venons d'y faire cource,
Et auons bien fourré la bource,
Allez y, vous ferez que sages.

Dronalm.

En dar aquin orinc del gotages,
En mens castres hardement,
Amigo non estat priment,
Puis que fauluez des horions.

Le Capitaine.

Beaux seigneurs nous vous mercions,
Car avec vous ne pourrions boire,
Mais certes si vous voulez croire,
Vous ferez comme nous auons taié.

Ils s'en recourent.

Corbathan

Ay pert comendo saliper
qui iouan nous volentiers

36 LA PATIENCE

Pour amasser daques deniers
Et les mouglieres & carrillés.

Moradas.

Cabres & vaques amenal
Spec commy la carbonade
Bay truchon bifac caillade
Ou la cornuda cabriaude.

Carados.

Thounac thonac bigamy saule
Rasibus pigaueratis
Puis qu'auetz trouat tel gentis
Rich estat si bene pigalo..

Nabaroth:

Moy bien trouat le camelo
La denare du vieillenat
Thau bel & baut amestat
Sur le cap vne restandore.

Dronalus.

En dare redare solin sorre
Dring pharaol mingar tantouft
Coq ou ielin ou hac ou rouft
Quant & à quo pars daquestat.

Corbathan.

A cy moy donc plus narrestat
Ego nugo bagy tay.

Icy descendent du chasteau & vont prendre les Chameaux & les ammenent.

Ga

Gason qui s'enfuyt.

Hee Dieu & moult suis esbahy
 Las que pourray ie deuenir
 Quel chemin pourray ie tenir?
 Car par le Dieu qui me fait naistre
 Ie ne sçay que dire à mon maistre.
 Par quelle chose n'raison.
 Car perdus sont entierement
 Ses brebis & aneſſes vrayement
 Ce sont les larrons de la terre
 De Sabee qui luy meinent guerre
 Ils ont tout prins rien n'ont laiſſé
 Et ont mon compaignon blecé
 Et ne sçay pas bien s'il est mort
 Mais ie vueil aller voir au fort
 Comment luy va ſans plus attendre
 Hau compaings compaings par ta foy.
 Si tu puis parle avecques moy.

Icy trouue ſon compaignon mort.

Helas helas veez cy pitié
 Il eſt tout roide en verité
 Ils l'ont occis à grand diffame
 Dieu luy face pardon à l'ame
 Or ne ſçay ie plus que ie face
 Fors que m'oſter de ceſte place
 Helas nous eſtions tous deux
 Encores n'agueres ioyeux
 Point ne doubtions l'auanture
 Qu'eſt ſur nous venue ſi dure

88 LA PATIENCE

Iamais au cœur ioye n'auray
 Helas chetif & que feray
 Car grand dueil à son cœur aura
 Mon maistre quand il le sçaura
 Puis qu'il conuient que ie le die
 Je vois à luy Dieu me conduye
 Et si luy crieray mercy.

*Icy s'en reuont peu à peu sans mot sonner &
 les Caldeens disent Moradus va
 au Cultineur & frappe
 sur luy.*

Dont estat tu vilain poucy
 Da moy ta burcia daquest.

Le cultineur.

Pour Dieu monsieur que vous plaist
 Je n'entend pas bien que vous dictes..

Carados.

In Iudia la terre habités
 O Iob le grand Seigneur doux
 De mahommet est contrarious
 Da quo causat fineras cy.

Nabaroeth.

Pren à quo iudec traicy
 En despec de la tua garcil.

Le cultineur.

Ha tresdoux Dieu à vous me rens
 Je suis nauré iusqu'à la mort
 Helas ie ne fis oncques tort
 A celuy qui m'a cecy faict

Rien

Rien ne cuide auoir meffaiſt
 Ma vie me conuient finir
 Sur terre ne me puis tenir
 Adieu Iob mon ſeigneur mon maïſtre
 Plus ne meneray voz chameaux païſtre
 Car ie meurs en voſtre ſervice
 Dieu me vueille eſtre propice
 Au iour de ſon grand iugement.

Il chet mort.

Dronalus.

Pigalot pigot hardement
 En caldee la contre noſtre.

Corbathan.

Bahy datumach hu bouſtre
 Cort finaſt en heure malle.

Morndus.

A qui biot ſalle luy ſalle
 Tout eſt gaignant quand qu'il y a
 Et n'ya qui rebellia
 Fourra de burcia parmy.

Carados.

Rich & bigot donc bigamy
 Deſto camello girando
 En terra daqueſt trando
 En noſtre caſtres de caldee.

Nabareth.

Tout eſt noſtre habea
 Donc ſeignoure c'eſt pro nobis
 Nabareth ramina gros bis
 Inducar tout le beſtial.

F s.

*Ils s'en vont avec les chameaux & avec les
despouilles. Le second armé.*

Ca freres ça entendez cy
Vous capitaine qui auez
Et plusieurs choses vous sçauetz
Qu'aler nous faut deuers le Roy
Pour luy compter le grand desroy
Les meschiefs les oppressions
Les maux & les extorcions
Qu'auons faict & les grans dommages
Louez en serons tenurz à sages
Et guerdon nous en donnera

Le Capitaine.

Par Iupin qui m'en croira
Nostre butin departirons
Mareschal, car cestuy larrons
Nous emblera ce qu'il pourra
Ne ia bon compte ne fera
Ne des bestes ne de l'argent.

Le premier armé.

Par Taruagant qui fit la gent
Capitaine ie ne degneroye
Vous en mettre hors de la voye
Qui vaulsit vn petit bouton:

Le second armé.

Hee capitaine il est bon
Le croire puis qu'il s'en pariure
C'est vne vaillante creature
Mon compaignon qu'en dictes vous?

Le

Le troisieme armé.

C'est le plus preud'homme de nous
 Que ~~maudit~~ en soit le meilleur
 Mais i'entendois que monseigneur
 Le mareschal si nous disoit
 Que allissions au Roy tout droict
 Luy dire sans attendre plus
 Que venons de la terre d'Vs
 Bonne chere il nous fera
 Et grandement nous remerciera
 Et nous donra de sa fumance.
 Et vous donra de sa finance.

Le Mareschal.

Allons y donc d'une alliance
 Il nous fera chere tresgrant
 Et si sçay bien certainement
 Que tel honneur il nous fera
 Que par nous se gouvernera
 Tout son royaume & quant qu'il a
 Gouvernerons n'en doutez ia
 Capitaine à l'estandart
 Vous autres tirez vous à part
 Et aussi tout le cariage.

Icy va devant le Roy.

Trescher sire voyez le bernaige
 De Iob aussi de sa famille
 Vous auons mis tout a la pille.
 Il n'y est rien demouré
 Qui vaille vne seule coquille

Que

Que nous auons tout amené
 Il fut bien en malle heure né
 D'aucun fait aux dieux desplaisance
 Encores y auons enuoyé
 Les Caldeens sans doubtrance

Le capitaine

Il n'y a maison ne grange
 Brebis ne vaches ne moutons
 Qui vaille pa deux boutons
 Que tout ne soit allé au diable.

Le premier armé.

Trestous ses gens sont morts à table
 Nous l'auons si bien pourmené
 Qu'il ne luy est rien demouré
 Voulez vous mieux?

Le second armé.

Je vous iure certes les dieux
 Iupin Taruagant nostre vray pere
 Que i'ay faict de mort amere
 Mouir les pasteurs qui gardoient
 Les chameaux quand ils païssoient
 Ne suis ie pas bon soudoyer?

Le tiers armé

Pourtant si ie suis le dernier
 Je vous requiers tres humblement
 Si vous leur donnez point d'argent
 Que ie ne soye pas oblié.

Le Roy.

Puis que de lob m'auuez vengé

De

De mes soudoyers vous retiens
 A estre de l'ostel de ceans
 Et gouuerneurs de mon royaume
 Et vovez cy plein pot d'or iaine
 Que vous donne tout d'auantage
 Et aussi veulx que ce pillage
 Qu'avez apporté avec vous
 Departez le pour entre vous
 Loyaument comme bons larrons.

Le mareschal.

Cher sire nous vous mercions
 Dieu Iupin le vous vueille rendre.

*Icy s'en va deuant le roy & dit en
 ceste maniere.*

Je vueil de ce butin cy prendre
 Ma part car ie suis le grigneur
 Et aussi le plus grand Seigneur
 D'entre vous, vous le sçauiez bien.

Le Capitaine.

Vous dictes comme homme de bien
 Et moy qui suis ie que pensez
 Suis ie paletoc ne archier
 Dictes frere le mareschal
 Il n'y a beste ne cheual
 Brebis mouton oy ne argent
 Qu'en'ay gaigné moy & ma gent
 Vous autres qui ne faïsiez rien.

Le premier armé.

Par dieu Iupin il n'en est rien

Ces

Ces deux compaignons & moy
 Feusmes les premiers au desroy
 Et gaignasmes tout le pillage.

Le second armé.

Il dit vray d'euz le cariage
 Et gaigné le meilleur butin
 Je renie mon Dieu Iupin
 Capitaine ne mareschal
 Ne monteront ia sur cheual
 Ne sul asne que ie le sçache.

Le troisieme armé.

Ne n'auront ia ne bœuf ne vache
 Ne pour mourir de mort amere.

Le premier armé.

Ils auront la heure quartaine
 Quel bel mareschal mais quel lettre
 Et quel capitaine de guerre
 Il me semble vn chat qui mangeast
 Du poisson qui le luy peschast.
 Par Taruagant c'est grand despit.

Le Mareschal en frappant.

Sanglant truant l'avez vous dit
 Que mahon en ayt malle feste
 Je vous donray sur vostre teste
 Vn tel horion ie m'en vant
 Quel' sera molle comme vn gant
 Dictes vous ainsi au grand maistre?

Le second armé.

Il m'a rompu toute la teste

Mes

Mes compaignons secourez moy.

Le second & le troisieme ensemble.

Maistre mareschal il est vray
Qu'ainsi nous voulez abuser.

Le second armé

Nous voulez vous si abuser
Et que n'aurons riens de la pille
Je vous donray vn coup de quille
Si que iamais ne vous cherera.

Ils frappent sur luy.

Le second armé en frappant.

A eux à eux qui en aura.

Icy le frappe sur la teste.

A la pille larrons à la pille
Je ne donroys vne coquille
De la vie de cestuy cy.

*Icy chet le Capitaine à terre presque
mort, & dit ainsi.*

Mon Dieu Iupin & mon amy
Tarugant aussi mahomet
Soyez à payer le sommet
De la mort ie ne puis plus viure.

Le second armé.

Mareschal sus or te deliure
Ou est l'or que tu nous as donné
Present le roy & ordonné
Veux tu donc retenir noz gaiges?

Le Mareschal.

Ha traistre sont ce les faiges

De

De tuer ainsi les gens de bien
 Enrager puisse comme vn chien
 S'il ne te sera cher vendu
 Et de brief iours sera rendu. *Percusſie.*

Ferragus ie vengeray
 A celle fois ou ie mourray
 Que le diable y puisse aduenir
 Veez cy pour vous en souuenir
 Traistre qui auez fait le coup. *Percusſie.*
 Ie t'en vengeray à ce coup
 Faux larron mauuais deputaire
 Maintenant ie vous feray taire
 Par Taruagant qui est mon chef
 Oncques ne fut si grand meschef
 Que d'auoir mis cest homme à mort.

Le troisieme armé

Rien n'a faict qui ne faict plus fort
 Ce n'est pas ce que demandoye
 Il s'en va tout la droicte voye
 Ou nostre capitaine est allé.

Le premier armé

Il est mort n'en soit plus parlé
 Allons d'icy avec nostre pille
 Assez bien loing de ceste ville
 Que le Roy n'en sache nouuelle.

Le pasteur en fuyant.

Dieu me vueille garder de mal
 Et de ceste gens me deffendre
 Las quel chemin pourray ie prendre

Tref

Tresdoux Dieu que pourray ie faire.
 Je ne sçay plus ou me retraire
 Mes compagnons sont morts en place.
 Helas ie ne sçay que ie face.
 Si ne me fusse renué
 Aucc eux eusse esté tué,
 Que pourray ie dire à mon maistre
 Dont ce vient, ne que ce peut estre
 Par mon ame ie ne sçauroye
 Iamais à mon cœur n'auray ioye.
 Auant par deuers luy feray.

*Icy va à la maison de: ob & deuant qu'il
 parle il voit le feu descendre sur
 les ouailles.*

Robin en regardant le feu.

Helas tresdoux Dieu que feray
 Ne que pourray ie deuenir
 Le monde ce croy veut finir
 Par feu, ou c'est de Dieu vengeance.
 Je ne sçay par ma conscience
 Que ie face ou que ie die
 Au teu bonne gens à l'aide
 Je voy mes compagnons mourir
 Et si ne les pui secourir
 Et mes brebis del'autre part
 Que le feu si brusle & arr
 Helas & que pourray ie dire
 A mon maistre Iob mon bon sire
 Je ne sçay fors que m'aller rendre

G

Par deuers luy sans plus attendre
Autre remede ie n'y voy.

*Il vient à Iob tout estonné en plourant &
s'incline en disant*

Ha monseigneur pardonnez moy
Car ie vous apporte nouuelles
Qui ne sont ne bonnes ne belles
Il est vray qu'en ceste iournee
Voz bœufs estoient en lairee
En vn champ, où ils aroyent
Et les anesses qui paisloyent
Aupres d'eux & les gardions
Et de riens ne nous doutions
Les Sabeyens sont arriuez
Soudainement tous effroyez
Et du premier qu'ilz sont venuz
Leurs glaiuez auoyent tous nudz
Et ont mis de pleine arriuee
Tous mes compaignons à l'espee
Et meurtris moult piteusement
Il sont tous morts certainement
Et ont emmené tous voz bœufz
Et voz anesses auant eux
A peu qu'ilz ne mont attrappé
Mais trestout seul suis eschappé
A grant peur & à grant martyre
Et suis venu pour le vous dire
Et pour le vous faire assauoir

Robin tout esbahy.

Mon

Monseigneur sachez de voir
 Qu'en ceste propre iournee
 Sus voz brebis est arriuee
 En peu d'heure la plus grant chose
 La plus terrible & merueilleuse
 Dequoy l'on ouit onc parler
 Ia n'est mestier de le celer
 Le feu du ciel est descendu
 Et par tout le parc espandu
 Qui a voz ouailles tuees
 Et toutes arses & bruslees
 Et les pastours trestous estains
 Ils sont morts i'en suis bien certains
 Trestout seul ie m'en suis souy
 Tout transsi & esuanouy
 Bien apparoint à ma couleur
 Rendu me suis à grand douleur.

A vous pour le vous noncier. *Le Pasteur.*

Il entre la teste blessée, & dit en tremblant.

Pour Dieu mercy monseigneur cher
 Las regardez comme ie seigne
 Bien pouuez voir en mon enseigne
 Que i'ay aujourd'huy eu affaire
 Pour Dieu ne vous vueille desplaire
 Car tous voz chameaux sont perdus
 Iamais ne vous seront rendus
 Les faux larrons Caldeyens
 Lesquelz l'on entent moins que chiens
 Les ont aujourd'huy emmenez

G 2



Les faux traistrez forcenez
 Et encores ont faict plus fort
 Mon compagnon ont mis à mort
 Et tué ennuit deuant moy
 Dont i'ay à mon cœur grand effroy
 Ilz auoient fait trois batailles
 Contre moy les fauces canailles
 Et m'ont villainement frappé
 Dieu mercy ie suis eschappé
 Et venu suis hastiement
 A grant douleur certainement
 Pour le vous dire de certain..

Iob les mains ioinctes.

Quant ie nasquis ie n'auois riens.
 Au monde Dieu onnipotens.
 Soit benist & loué en tout temps
 Des biens & des maux qu'il nous donne.
 A son plaisir ie m'abandonne
 Sa volonté soit accomplie..

Le messagier.

*Icy la maison du premier filz chet sur les enfans
 de Iob, & le messagier s'enfuit en la regar-
 dant, & frappant sa poitrine..*
 Helas mes bonnes gens à l'aide
 Au meurtre que pourray ie faire?
*Il court à Iob, & quant il est deuant il ne
 peut parler pour sa douleur.*
 Ha mon cher seigneur debonnaire
 Oncques mais n'aduint tel' pitié
 En ce monde par verité...

Tout

Tout le cœur de peur me tremble
 Tous voz enfans sont morts ensemble
 Chez leur frere aîné estoient,
 Et mangeoyent & aussi beuuoyent,
 Trestous par bonne compaignie
 Sans penser mal ne villenie
 Aduenue est soudainement
 Vn grant vent mout terriblement
 Diuers la region de ferte
 Qui a la maison descouuerte
 Et rompu les quatre cornieres
 Qui estoient fortes & entieres
 Et sur voz enfans est cheuë
 Onc tel' pitié ne fut veuë
 Trestous morts ie les ay laissez
 Et tous estains & oppressez
 Je suis eschappé trestout seul
 A grant courroux & grant dueil
 Et suis par deuers vous venu
 Pour ce cy qui est aduenu
 Toute la guise & la maniere.

Job.

*Jcy coupe sa robe & se met à genoux &
 dit en adorant.*

Je naisquis du ventre ma mere
 Tout nud & si n'auoye rien
 Et tout nud en ceste maniere
 M'en iray i'en suis tout certain
 Dieu qui m'auoit donné les biens

G 3

Les a prins par ce bien paroist
 Que siens estoient & non pas miens
 Le nom de Dieu en soit benoist
 Dieu les m'a donnez & tollu
 Ie n'ay plus riens fors que la vie
 Ainsi luy plaist & l'a voulu
 Treshumblement ie l'en mercie:
 Car ie sçay bien sans douter mie
 Que de luy tout bien naist & croist.
 Si de mes pechez me chastie
 Le nom de Dieu en soit benoist
 Dieu me doint bonne patience
 Encontre toute aduersité
 Bien voy que toute la plaissance
 Du monde n'est que vanité
 De grant richesse en poureté
 En peu de temps suis du tout cheut
 Et en grande necessité
 Le nom de Dieu en soit benoist.

La femme de Iob.

He lassé bien nous est mescheut
 Tresdoux Dieu que pourray ie faire
 De toute part douleur me croist
 Et angosse qu'est trop amere
 Or n'ay-ie plus ou me retraire
 Lassé que pourray deuenir
 Sus toutes douleurs ay la mere
 De dueil me conuiendra finir
 De pleurer ne me puis tenir

Car

Car i'ay perdu entierement
 Ma ioye & mon souuenir
 Mon confort mon esbarement
 Mes beaux enfans que tendrement
 Auois nourriz de mes mamelles
 Qui sont morts si piteusement
 Veez cy bien piteuses nouuelles
 He lasse qui les veit onc telles
 I'aymassé mieux n'estre ia née
 Que voir la mort de ceux & celles
 Ou estoit mon cœur ma pensée
 Lasse pouure deconfortée
 Sur toutes la plus douloureuse
 La plus dolente & esgaree
 Qui oncques fut bien direi'ose
 La mort est en mon cœur enclose
 Qu'en puis ie mais si ie m'esmoie
 Car ie sçay bien que nulle voye
 Iamais en mon cœur n'auray ioye
 Fortune tresfort me guerroye
 Beau tresdoux Dieu confortez moy
 S'il vous plaist mourir ie vendroye
 Sans viure plus en tel esnoy
 Lasse dolente que feray
 Quant i'ay perdu ma nourriture
 Et tous mes biens dequoy viuoie
 Je me plains de toute nature
 Je m'en iray à l'auanture
 Avec la poche le pain querant

Et les bonnes gens par droicteure
Leur aumosne me donneront
Quant ma grant poureté sçauront
Il leur prendra de moy pitié
Aucunes fois bien me feront
Par amour & par charité.

Job.

Je vous supplie par amitié
Confortez vous ma douce amie
Vous faictes mal en verité
De plourer menant telle vie
Mercions Dieu ie vous en prie
Et prenon tout en patience
Car c'est celuy qui point n'oublie
Tous ceux qui ont en luy fiance
Il nous ayme bien sans doutance
Puis qu'il luy plaist nous chastier.
S'il nous enuoie pestilence
Nous l'en deuons bien mercier
Et honorer craindre & doubter
Car de luy, tous les biens auons
Tollir nous les peut & oster
Quant il luy plaist bien le sçauons
Pource mercier le deuons
En noz douleurs en noz miseres
Vous sçauiez que rien n'auons
Quant nous nasquismes de noz meres
Pensons en noz anciens peres
Qui aymeient Dieu fermement
Et Dieu en diuerses manieres

Les

Les approuua certainement
 Comme Abraham qui promptement
 Voulut son propre filz occire
 Pour obeyr au mandement
 De Dieu nostre souverain sire
 Car Dieu par l'Ange luy fit dire
 Que tantost sans demourer guere
 Tuast son filz sans contredire
 Pour sacrifice luy en faire
 Adonc Abraham qui desplaire
 Nullement ne voulut a Dieu
 Print son filz sans dire contraire
 Et li luy fit porter du feu
 Sur vne montagne en vn lieu
 Où il faisoit son sacrifice
 De obédience pourueu
 Voulant a Dieu faire service
 Son filz qui estoit si propice
 Bel & plaisant & gracieux
 D'alum. il le feu print l'office
 Et le pere par les cheueux
 Le print à fin de frapper mieux
 Et luy voulut trancher la teste
 Mais l'Ange descendit de cieus
 Qui le print au bras & l'arreste
 Et luy dit De toy sera feste
 Deuant Dieu en paradis faict
 Je cognois bien que sans moleste
 Tu aymes Dieu de cœur parfaict

Qui as voulu tuer de faict
 Ton filz Ysaac sans faintise
 Sachez qu'à bon droict
 Multipliera ta lignee
 Or regardez doncques m'amie
 Ce bon pieud'homme qui n'auoit
 Qu'un enfant ne l'espargna mie
 Qui sacrifier le vouloit
 Deuant Dieu le pere qui tout voit
 Veut accomplir sa volonte
 Desplaire point ne vous en doit
 Que tout ne vous a que presté
 Si noz enfans nous a osté
 En ce monde & tous noz biens
 Il nous en donra grant planté
 Quant luy plaira i'en suis certains
 Je remercie à ioinctes mains
 Mon Dieu mon pere en qui ie croy
 Mamie nous n'auions riens
 Quant nous naquismes vous & moy.

La femme.

Lasse ie suis desconfortee
 Toutes les fois qu'il m'en souuient
 Amour dit que faire le doy
 Et nature si me contraint
 Mon cœur sospire & se plaint
 Et me fait grant douleur sentir
 Le sang & la chair m'espoint
 Car nature ne peut mentir.

Le cœur de moy si est martyr,
 Las qu'en puis-ie mais si ie pleure,
 Qui voit la mort, & departir,
 Et rien qui soit ne me demeure.
 Viure nous conuient à grand honte,
 Nous n'auons plus qui nous secoure,
 Ne qui plus de nous face compte:
 C'est la guise de cestuy monde,
 Que quand vn homme n'a plus rien
 Chacun le rechine & gronde,
 Soit parent ou amy prochain:
 Chacun si le reniera,
 Tel nous fouloit tendre la main,
 Qui l'eschine nous tournera,
 D'oiesmauant ainsi fera,
 Et viurons en grand de honneur:
 Car tel de nous se mocquera,
 Qui nous fouloit porter honneur.

Iob. Loué soit Dieu, nostre Seigneur,
 De tout ce qu'il nous fait & donne,
 Roy des Roys sur tous le greigneur,
 A le seruir ie m'abandonne,
 De fin cœur, de pensée bonne:
 Car c'est mon Dieu, mon esperance,
 Qui a promis noble couronne
 A tous ceux qui en patience
 Prendront le mal & pestilence
 De ce monde en bonne maniere,
 Où il n'y a que deceuance,

Tri

Tribulation trop amere
 C'est la valee de misere
 De douleur & de desconfort
 Qui plus v vit plus y empire
 Et plus s'approche de sa mort
 Il n'y a ne foible ne fort
 Qui en ce monde mer sa cure
 Ne le Roy ne route sa court
 Car il conuient que chacun meure
 Et n'auons ne temps ne heure
 Pour ce ie dis qu'il n'est pas sage
 Qui en ce monde met si peu e
 Car c'est vn dangereux passage
 C'est nostre droit pelerinage
 Ou toutes gens grans & menus
 Mettent leur peine & labourage
 A tourner la cont'stant venus.

La femme.

Nous sou lions estre tenus
 Les plus riches de cest terre
 Or sommes pauures deuenus
 Tant qu'il nous fault d'a l'mone querre
 Par mortalité ou par guerre
 Ay perdu la ioye mondaine
 Tresfoix Dieu te veuil requerre
 Que tu m'ostes de cest te peine
 Toy qui es de pitié fontaine
 Je te requier & te supplie
 Puis que de mourir suis certaine

Que

Que tu m'ostes de ceste vie,
 Je vueil mourir par compagnie
 Avec mes enfans qui sont esteins,
 Et fusse hors de melancolie,
 Puis que i'ay perdu tous mes biens.

Job à genoux.

Hau beau tresdoux Dieu, qui soustiens
 Tout le monde, par ta puissance,
 Je te requier a iointes mains,
 Donne-moy bonne patience,
 Ne regarde pas l'ignorance
 De moy, ne la fragilité:
 Si i'ay peché par non sçauance,
 Pardonne moy par charité:
 Aussi prenez de moy pitié,
 Si i'ay mespris aucunement
 Contre ta sainte deité,
 Je t'en supplie tres humblement.
 A toy me rends entierement,
 De cœur, de corps, de quant que i'ay:
 Fais de moy ton commandement,
 Car pour rien ne t'oublieray:
 Mais loyaument te seruiray,
 En me soumettant a ta grace,
 Garde moy tant que ie viuray
 De faire rien quite de splanse. *Sathan.*

Haro, ie ne sçay que te face,
 Je vois mourir, ie pers ma peine,
 Mourir puillè de mort vilaine.

Ce tresfaulx vilain enragé
Oncques n'a dit ne l'angagé
Parolle qui luy fust contraire,
Pour rien que ie luy peusse faire,
Oncques mais ne vis son pareil.
De son fait trop mieux m'emerveil':
Car durement l'ay assailly,
Et n'ay rien fait, fors que failly,
Je suis celuy certainement,
Qui feis pecher premierement
Adam, qui fut le premier homme,
Quand il mordit dedans la pomme,
Dequoy aduint moult grand dommage.
A tous ceux de l'humain lignage:
Et si enseignay la maniere
A Cayn de tuer son frere,
Dont dieu le maudit sur la terre:
Et feis à Pharaon mener guerre,
A tout le peuple de Iudee,
Dont toute Loy fut troublee,
Que leur auoit baillé Moysé:
Mais oncques n'ay peu trouuer guise
Comment ie peusse à ce cop
Faire pecher ce vilain Iob:
Oncques n'est isü de sa bouche
Contre Dieu vn mauuais reproche
Dequoy le puisse accuser,
Et m'a fait long temps amuser,
A tous les diables le commande.

Sathan

Sathan se taist, & fait pause.

Dieu.

Sathan vien ça, ie te demande,
Dont viens-tu si mal esmeu?

Sathan. Ie vien de veoir Iob le chanu,
Que malle mort le puisse abatre.

Dieu. Ie t'auoue de le batre:
Mais à son ame n'attouche.

Sathan. Et si ie le puis accrocher
De son corps seray le boucher,
Et verrez belle triperie.

Lewiathan.

Allons à luy ie vous en prie,
Trop me tarde que ie n'y suis,
Et si empoigner ie le puis,
Renier luy seray son Dieu.

Sathan. Venez, ie vous merray au lieu
Où le vilain fait sa priere:
Frappez fort deuant & derriere,
Sans l'espargner aucunement.

Lucifer. C'est bien dit, allez vistemens,
Et faites tant que l'amenez;
Ou iamais ceans ne reuenez:
Sathan aduise que feras,
Car si tu faulx, tu comparras,
Fay bien sagement ton emprise,
Allez, ie corneray de prise,
Quand vous aurez trouué la beste.

Beith. Allôs foudroyant cômte tēpeste,
Et

Et me luyue qui m'aymera.

Après qu'ils ont trouué Iob, ils disent en le :
bat. nt... Sathan.

A luy, à luy, qui en aura..

Icy batent Iob par long temps, tant que le sang-
chet à terre: adonc Lucifer hurle & brais avec grand
clameur, en maniere d'un chasseur, puis les diables
le l'issent contre terre: poutant presque mort: puis
il dit... Iob..

Hee tresdoux Dieu aide moy.

En ce besoing, en cest esinoy,

Ne m'oublie pas ie 'en prie:

Car ie ne sçay que faire doy,

Et si ie n'ay secours de toy,

Ie suis à la fin de ma vie.

La femme de Iob..

He Dieu ie suis moult esbahye,

Car i'ay ouy trop grand tourmente,

Et n'est aduis que i'ay ouye

La voix de Iob qui se guesmente.

Icy sort de la maison, & quand elle voit:

Iob, en criant dit,

L'assè pauvre ie n ne douiente,

Comment me suis ie tant tenue?

Ie suis bien mauuaise & mesenante,

Que plustost ie n'estoy venue.

A l'aide toutes bonnes gens,

A l'aide tous mes bons amis:

Ne venez veou petits & grands:

DE IOB.

1113

La grand douleur ou Iob est mis,
Venez rous veoir la grand pitié,
Helas onc tel douleur ne vis:
Car ie ne sçay en verité
Congnoistre s'il est mort ou vif:
Il n'a sur luy ne peau ne chair
Qui du tout ne soit despeece,
Bien voy qu'il nous est mescheu
De biens & de corps cest'annee.

Robin.

En regardant par admiration,
Vrayement ie suis en grand pensee
Qui luy peut auoit cecy fait:
Car ie croy qu'à personne nee
Oncques n'a mesdit ne meffait,
Hee tresdoux Dieu omnipotent
Comment pouuez vous endurer
Que ce prend'homme souff'e tant,
Qui tousiours vous veut honnorer.

Le pasteur.

Tenir ne puis de plorer,
Quand ie regarde sa douleur:
Las ie soulois Dieu adorer
Auecques luy à grand honneur,
Hee Iob mon seigneur & mon maistre,
Moult auez de maux en peu d'heure:
Ie pry à Dieu le Roy celeste,
Qu'à ce grand besoing vous sequeure.

Le Messager.

Bien a le cœur dur qui ne pleure,

H

De le veoir si piteusement,
 Pour Dieu leuons le sans demeure,
 Et le menons tout bellement.

Ils le leuent.

Hee Iob monseigneur debonnaire,
 Que i'ay seruy toute ma vie,
 Helas! & que pourray-ie faire
 Si ie pers vostre compagnie?

Icy le portent sus vn fumier.

Loué soit Dieu, ie le mercie
 Des biens & des maux qu'il m'enuoye,
 Sa volonté soit accomplie:
 Car trop endurer ne pourroye,
 Mes grans delits, ma faulx ioye,
 Et mon ignorance apparroist,
 Par mon peché i'ay ceste playe,
 Le nom de Dieu en soit benoist.

La femme.

Helas maintenant on congnoist
 Que vous ont valu vos priere:
 Car tousiours le mal si vous croist,
 Tribulations & miseres:
 Car vrayement en toutes manieres
 Pertes & meschef si vous viennent,
 Pource louez Dieu par prieres,
 Et vous mourrez incontinent.
 Or le louez bien maintenant,
 Et benissez, & adorez,
 Mieux vous sera que souffrir tant,

Et

Et tantost apres vous mourrez.

Iob. Helas petit confort querez;

Qui me reprochez tel diffame,

Bien voy que ma mort querez,

Et parlez comme folle femme.

Si nous auons eu puissance

De la main Dieu premierement,

Et des biens par grand'abondance,

Pourquoy doncques sans desplaisance

Ne prendrons nous en patience

Aussi les maux semblablent?

Dieu les mous a donnez vrayement,

Et puis tolluz entierement,

Ainsi comme il luy'a pleu;

Fait à son commandement.

Je l'en mercy' treshumblement;

Et benoist soit le nom de Dieu.

Robin. Hee Dieu! & moult est deceu

Cil qui en ce monde se fie,

Je m'en suis bien apperceu,

Peu de chose est de nostre vie:

Iamais ie ne cuidassé mie

Que la puissance de mon maistre

Fust en si peu de temps faillie,

Et ne sçay comment ce peut estre.

Le pasteur.

Pourquoy fait Dieu vn homme naistre;

Qui est faict de lymon & d'ordure,

Qui ne peut sçauoir ne congnoistre.

Combien il a de vie feure:
 Car sa ioye trop perdue dure,
 Et trespasse comme le vent,
 Qui en ce monde met sa cure,
 S'en voit deceu le plus souuent.

Le Messager.

Que feray ie d'oresnauant,
 Beau tresdoux Dieu confortez moy,
 Oncques en iour de mon viuant
 Ne cuidoy' veoir ce que ie voy.
 Helas ie sui en grand esmay,
 Quand ie regarde mon Seigneur,
 Que lon a mis a tel arroy
 Estant nud en grand de honneur,
 Qui souloit estre le grigneür,
 Et le plus grand de la contree,
 Et maintenant est le mineur:
 Helas la chance est bien tournee,

La Femme.

Ie suis la plus desconfortee,
 La plus triste la plus iree,
 Que femme qui fut oncques nee:
 Ie doy bien maudire ma vie,
 Las ie n'av robbe ne demie
 Dequoy me puisse arbrier,
 Fors que ceste berne pourrie,
 Qui ne vaut pas vn seul denier.

Le Messager.

Mon cher sire ie vous requier

Pardon

Car on & qu'auecques vous soye,
 Car ie ne vous puis oublier,
 Pour nullé chose que ie voye.

Iob.

Mes chers amis, Dieu vous pouruoye,
 Ne pleurez pas, & ne criez;
 Car vostre douleur croist la mienne:
 Mais ie vous pry pour moy priez,
 Et louez Dieu, & merciez;
 Et Dieu si vous aidera:
 Mais que point ne l'oubliez,
 Iamais ne vous oubliera:
 C'est celuy qui nous iugera,
 Quand le monde sera finé,
 Et pource mon cœur luy dira,

Nunc parce mihi Domine.

Robin.

Oncques puis l'heure que fu né
 Mon cœur ne souffrit telle angoisse,
 Helas mon proces est finé,
 Puis qu'il conuient que ie vous laisse.

Le pasteur.

Hee Dieu madame & ma maistresse,
 Ie vous requier pardonnez moy,
 Et s'il est rien que pour vous puisse,
 De bon cœur ie l'accompliray.

*Icy s'en vont les pasteurs, & prennent congé
 de Iob & de sa femme.*

Iob. Parce mihi Domine.

Mon tresdoux Dieu pardonne moy,

H. 3

Je t'en requiers deuotement.
 Rien n'est de mes iours bien le voy
 Ma vie s'abrege formement
 Pourquoy mets tu si hautement
 Homme mortel à grand richesse
 Et puist tantost à vn moment
 Veux approuuer sa grand proësse
 Helas pourquoy ne me pardones
 Me veux tu du tout debouter
 Puis que licence ne me donnes
 De ma folie transgloter
 Las i'ay peché deuant ta face
 Vray Dieu qui es garde de moy
 Que veux tu las que ie te face
 Pourquoy m'as tu mis contre toy
 Mon cœur si est en grand esmoy
 Car sans toy ie ne puis rien faire
 Helas tu m'a mis contre toy
 Et suis à moy mesmes contraire
 Et pourquoy Dieu doux debonnaire
 N'ostes tu mon iniquité
 Je suis perdu sans tarder guere
 Si de moy ne te prend pitié
 Helas plaise toy regarder
 Comment ie dors en ceste poudre
 Si tu ne m'aydes sans tarder
 Iamais ie ne pourray resoudre.

La femme de Job.

Vray Dieu qui as estably l'ordre

De

De mariage le premier
Afin que lignee en peut soudre
Pour le monde multiplier
De bon cœur ie t'en veil prier
Qu'il te plaise nous secourir
Car autre chose ne requier
Fors tant seulement à mourir
Ie doibs bien la mort requierir
Quant en ce monde n'ay plus rien
Helas il me conuient querir
L'aumosne ou mourir de faim
Ie n'ay ne bled ne vin ne pain
Denier ne maille ne monnoye
Et mon mary qui n'est pas sain
Dont encor plus fort m'esmoye
Helas! i'ay bien perdu la voye
Quand du temps passé me souuient
Les aumosnes donner souloye
Certes querre les me conuient
Jamais ie ne cuidasse point
Me veoir en tel' necessité
Helas ie suis en piteux point
S'il ne prend de moy pitié
Ma ioye ma prosperité
Ma puissance ma grand richesse
Sont tournez en grand paureté
En pleurs en douleurs en tristesse
A Dieu m'amour à Dieu liesse
Car ie ie m'en vois sans arrester

Querant le pain en ma vieillesse
 Helas ce n'est pas mon mestier
 Mais besoing faict vieille trotter :
 I'ay massé mieux estre enfouye
 Quant ie n'ay dequoy conforter :
 Mon mary en sa maladie :
 Seigneurs & dames ie vous prie
 Pour Dieu de moy pitié vous prenne :
 Regardez ma pauvre desuie
 Et du temps passé vous souuienne
 Helas i'ay bien perdu mon regne
 N'a gueres i'estoye grand Dame
 Or suis à honte & vergoigne
 De toutes la plus pauvre femme.

Iob Tacet animam meam.

Ie ennuye trop à mon ame
 De ma vie qui dure tant
 Pource laisseray car i'ay blasme
 De parler de moy nullement
 Mais pleureray amerement
 De mon ame à Dieu diray
 Qu'il me garde de damnement
 Et humblement ie luy diray
 Beau sire Dieu demonstre moy
 Pourquoi me iuges tu ainsi
 Car ie suis perdu bien le voy
 Si vous n'avez de moy mercy
 Mais voulez vous Dieu rebonnaire
 Opprimer de corps & de biens?

M'a

M'auez vous faiët pour me deffaie.
 Moy qui suis l'œuure de voz mains.
 Ne me faiëtes pas pis aumains.
 Que és autres pecheurs feriez
 Vous m'auez faiët à vous me tiens.
 Si vous prie que ne m'oubliez
 Helas aussi voz yeux charneux
 Aussi comme vn homme mortel
 Voz iours voz ans sont ils teux
 Comme ce present temporel.
 Car mes pechex voulez enquerre
 Et en chercher en peu d'espace
 Quand que i'ay meffaiët sur la terre.
 Sans nullement me faire grace
 Helas ie ne sçay que ie face
 La mort si me veut attrapper
 Et rien n'ay meffait que ie sçache
 Mais nul ne vous peut eschapper.

Le Messager

Helas vueillëz vous conforter
 Mon cher sire ie vous en prie
 Car Dieu vous ayme sans tarder
 Qui ne vous obliera mie.
 Et si en vostre maladie
 Vous faut rien que ie puisse faire
 Pour vous seruir mettray la vie
 Iusques à la mort sans contraire
 Car de vous ne me puis retraire
 Ne vous laisser par nulle voye.

H. j.

Halas! mon seigneur debonaire
 Oublier ie ne vous pourroye
 Mais seruir tousiours ie voudroye
 Selon mon pouuoir & effect
 Er pour vous la mort ie prendroye
 Pour vous garder de tout meffait.

Job.

Mains tue Domine fecerunt me.

He tresdoux Dieu voz mains m'ont faict
 Et formé trestout à l'entour
 Et aussi tost m'avez deffaict
 Et tresbucher du premier tour
 Souuienne vous mon createur
 Que faict m'avez de vil matiere
 Et en poudre sans nul retour
 Me ferez retourner arriere
 Vous estes mon Dieu & mon pere,
 Qui chair & peau m'avez donné
 Et m'avez deuant & derriere
 D'os & de nerfs enuironné
 Et si m'avez abandonné
 La vie à misericorde
 Et dés lors que ie fuz né
 Auez mon esprit en garde.

Eliphat.

L'on dit que qui bien se regarde
 Et qui bien se voit peu se prise
 Pour moy le dy car bien m'auise

Il est bien fol qui met sa cüte
 En ce monde que en meins d'une heure
 Tantost est perdu & passé
 Tout ce que d'on a amassé
 Ie le dy pource qu'il n'a guere
 Que Iob estoit tenu à maistre
 Le plus puissant le plus riche homme
 Et le plus grand d'icy à Rome
 Et a perdu en vn moment
 Trestous ses biens entierement
 Par telle guise qui n'a plus rien
 Tant que sa femme quiert le pain
 Ils sont cheuz en grand paureté
 Par mon ame c'est grand pitié
 Vrayement ie le vueil aller veoir
 Et selon mon petit pouuoir
 Si ie puis le conforteray
 Et en allant ie sonneray
 Premier à Baldach sinthes
 Et à Sophar neamatithes
 Lesquels viendront avec moy
 Au besoing voit on qu'est amy
 Ie l'ay maintefois ouy dire.

Icy appelle Baldach à sa maison.

Baldach sinthes mon cher sire
 Ie vous prie entendez à moy
 Mon cœur si est en grand esmoy
 De nostre amy especial
 Iub lequel souffre tant de mal

For

Fortune l'a mis à la lie
Allons le veoir ie vous en prie
Pour luy donner aucun confort.

Baldach finches :

Certainement i'en suis d'accord
Car l'un amy pour l'autre veille
Allons à luy ie le conseille
Car selon que i'ay ouy dire
Il endure moult de martire
Il est sur vn fumier tout seul
A grand honte & a grand dueil.
De tous ses parens n'a celuy
Qui veuille approcher de luy
Et n'a gueres qu'il souloit estre
En Orient Seigneur & maistre
Et est maintenant en reproche
Homme qui soit de luy n'approche
Allons & le conforterons

Et en allant nous parlerons
A Sophar qui avec nous viendra
Car il est homme de raison.

Eliphaz.

Allons doncques à sa maison
Et si luy dirons nostre pensée
Avec nous viendra par compagnie
Je me mets premier à la voye.

Baldach.

Or allons que Dieu nous doint ioye
Et faire chose qu'il luy place.

Ils vont à Sophar. Baldar.

Sophar Dieu vous doint sa grace

Venus

Venus sommes par deuers vous
 Sçauoir si viendrez auec nous
 Conforter nostre bon amy
 Iob qui n'a repos ne demy
 Tant est en grand necessité
 Venez auec nous par amitié
 Pour sçauoir comment il luy va.

Sophar neomatites

Helas ie serois bien mauuais
 Et aurois le sens bien troublé
 Si ie le mettrois en oubly
 Ia Dieu ne plaie qu'au besoing
 Il luy faille ne pres ne loing
 Car ie l'ayme & aymeray
 De bon cœur tant que ie viuray
 Et pour rayson ie le doib faire
 Car tousiours i'ay ouy retraire
 Qui bien aime à tard oublie.

Eliphaz.

Allon à luy ie vous en prie
 Car vrayement selon que i'entens
 Oncques à iour de nostre temps
 Homme ne souffrit telle peine
 Il n'a sur son corps nerf ne veine
 Qui ne soit rompu ne mal mis
 Ses gens l'ont sus vn fumier mis
 Tout seul comme vne beste morte
 Il n'y a qui le reconforte
 Fors que les vers qui le mangent

Et de toute part le rongent
 Oncques tel' pitié ne fut veue
 Le pry Dieu qui forma la nue
 Qu'il luy doint bon allegement.

Baldach.

Il a perdu entierement
 Ioye santé de corps & de biens
 Et ses enfans qui sont estains
 Et mors si trespiteusement
 Tous ensemble en vn moment
 Sept enfans masles & trois filles
 Qui tous estoient beaux & habilles
 Sages courtois & bien apsis.
 Et sur tous auoient le pris
 D'honneur d'estat & de science.

Sopha. Dieu luy doint bonne patience
 Car vrayement ie croy que l'ayme
 L'ay aujourd'huy veue sa femme
 Qui va les aumosnes querant
 A tous ceux qui bien luy feront
 Piteusement se complaignoit
 Et en pleurant elle disoit
 Qu'onques mais elle n'auoit apise
 A viure en telle guise
 Quant ie l'ay veue en ce point
 Si grand douleur au cœur me point
 Que ie me suis prins à plourer.

Elphas. Icy ne veux plus demourer
 Je vois à luy & le verray

Jamais

Jamais au cœur ioye n'auray
 Jusques à tant que ie le voye. [voye
Baldach. Mettons nous tous trois en là.
 Et luy monstrons signe d'amour.

Sophar.

Or allons sans faire seiour
 Car trop ennuye qui attend.

*Il va à Iob & comme il le regarde tout esmer-
 veillé, il dit. Eliphas.*

Hee trespoux Dieu omnipotent
 Veuillez auoir mercy de moy
 Helas! messeigneurs ie le voy
 Or regardez quelle pitié.

Baldach. Le cœur me part en verité
 Quand ie regarde sa douleur
 Helas il n'a sur luy couleur
 Ne rien ou l'on le peüst cognoistre.

Sophar.

Hee trespoux Dieu roy celeste
 N'oublie pas ta creature
 Helas veez cy forte aduanture
 Or ne sçay que ie doy faire.

Eliphas. Hee Iob mon amy debonnaire
 Pour vostre amour mon cœur souspire.)

Baldach.

Helas helas Iob mon cher sire
 Vostre amour faict mon cœur partir.

Sophar.

Or voy ie bien le departir

De

De mon amy que tant aimoye
 Oublier ie ne le pourroye
 Pourcem' enuois auec luy mourir.

*Icy les amis de Job prennent vn peu de cens-
 dres & mettent sur leurs testes comme
 Job dit.*

La iournee puisse perir
 Que ie fus oncques né de mere
 Et celle nuit triste & amere
 Où il fut parlé & sceu
 Que i'auoye esté conceu
 L'heure le temps & la iournee
 Que ie n'asquis soit auortee
 Et des tenebres de la mort
 Soit elle pleine sans confort
 Le iour soit faict tenebre noire
 Sans que iamais en soit memoire.
 Et la nuit puisse estre dicté
 Et de tous esprits maudicté
 Pourquoi suis ie demeuré né
 Pour estre si mal fortuné
 Et qu'au ventre ie ne moury
 Ou que tantost ie ne pery,
 Helas! pourquoy onc me porta
 Ma mere qu'elle n'auorta
 Et fusse hor de ce martyre
 Souuentes fois mon cœur souspire
 Et de larmes est sa viande
 Car ma douleur est si tresgrande

Que

Pource ne me puis conforter
Car la crainte que ie doutoye
Et tout ce dont peur i'auoye
M'est aduenu soudainement.
De mon seigneur suis malement.
Helas & i'ay eu silence
En moy paix & patience
Et tousiours ay dissimulé
Or suis deffaiët & annullé
Et du tout à perdition
Depuis que l'indignation
De Dieu est venue sur moy.
Eliphat. Cher amy Iob quant ie vous voy
Ie ne puis faire bonne chere
Et si en aucune maniere
Commençois à parler à vous
Ie croy que seroye mal de vous
Mais tenir ie ne me pourroye
De parler qu'auenir m'en voye
Helas qu'est deuenue le temps
Que tout le pays estoit contens
De vous & de vostre confort
Il n'y auoit foible ne fort
Qui ne fut par vostre sagesse
Conforté & mis en liesse
Souuienne vous ie vous en prie
Que tout le temps de vostre vie
Sagement vous estes tenu
Et honnestement contenu

Maintes gens conseillé auez
Et conforté bien le sçauiez
Les pauures deconfortez
Auez nourris & supportés
Et de vostre bonne doctrine
Aués tousiours la loy diuine
Exaucee & fait assauior
Et tenue à vostre pouuoir
Et aués mis paix & accord
Là où estoit noise & discord
Et estes tenu le plus sage
Qui soit en tout vostre lignage
Ne qui soit en tout le pays
Et parce tresfort m'esbahys
Et pour les biens de cestuy monde
Qui n'est qu'un abyssme profonde
Ou nul sage ne met sa cure
Vous estes mis à grand rancune
A tel meschef à tel douleur
Il me semble que c'est folleur
Nonobstant que ie cognois bien
Que du corps vous n'estes pas fait
Dont moult grandement me desplaist
Confortés vous donc s'il vous plaist
Et Dieu si vous aydera
Et point ne vous obliera
Car sa puissance est merueilleuse.
Job. Mal est batu qui plorer n'ose
Pleust or à Dieu de paradis

Qu'on

Qu'õncques tous les maux que ie diz
 Et mes pechez du temps passé
 Que i'ay fait dit & pensé
 Füssent mis en vne balance
 Et d'autre part la pestilence
 La calamité & l'ordure
 Que ie souffre & que i'endure
 Pour veoir lequel plus peseroit
 Et ie croy que lon trouueroit
 Que plus grieue seroit la peine
 Que ie souffre que n'est l'araine
 Et tout le sablon de la mer
 Pource mon parler est amer
 Et tout le sospir de mon cœur
 Est remply de dueil & de pleur
 Car ie sens les dars de la mort
 Qui me blessent au cœur tresfort
 A la vengeance du grant roy
 Qui est descendu sur moy
 Helas ie ne sçay que ie face
 Si Dieu ne m'enuoye sa grace
 Je suis à grant necessité
 Si ne luy prent de moy pitié
 Car ie n'attens fors que la mort.

Eliphat. Mon cher amy Dieu vous confort
 Et vous doint bonne patience
 Par sa sainte digne puissance
 Ainsi que mestier en aués
 Car c'est celuy bien le sçaués.

Qu'en nul temps les siens n'oublie.
Mais souuentesfois les chastie
A la fin de les essayer
Et expurger & nettoyer
Dieu qui vous a ce mal transmis
Montrez qu'estes de ses amis
Et qu'il vous ayme & aymera,
Et point il ne vous oubliera
Or pensons bien ie vous pry doncques
Si en ce monde vistes oncques
Si Dieu obliait à la fin
Homme qui l'aimast de cœur fin
Vous mesmes sçauiez bien que non
Mais ceux qui ont mauuais renom
Larrons pillars robeurs de gens
A tous maux faire diligens
Yurongnes & ioueurs de dez
Iceux gens sont de Dieu maudis
Et pour les laisser estre
Sans nullement les molester
Car ceux gens ont prins le chemin
D'aller tout droit à malle fin
Et apres qu'ilz ont bien pillé
Les pauvres gens & exillé
Leurs payemens leur seront rendus
Car ilz seront tuez ou penduz
C'est leur droict & leur payement
Et ne viuent point longuement
Mais s'en vont à damnation.

En

En enfer sans redemption
Bien peu vaut leur pillerie
Leur puissance est tantost faillie
Et tout ce qu'ils ont amassé
En vn moment ont trespaslé
Car pillerie est de tel estre
Que qui pille pillé doit estre
Et les iustes & debonnaires
Qui es faux pecheurs sont contraires
Et ayment Dieu de tout leur cœur
Sont souuent en ducil & en pleur
Et sont pillez & rançonnez
Et batus & emprisonnez
Et souffrent & endurent peine
Trestous les iours de la semaine
Dieu de leurs pechez les nettoye
Par les douleurs qui leur enuoye
Pource ie puis doncques bien dire
Que tous ceux qui souffient martyre
En ce monde soit homme ou femme
Que cest signe que Dieu les ayme
Et s'il vous ayme ne doutez mie
Car qui bien aime bien chastie
Si Dieu vous a donné des pertes
Il a tousiours les mains ouuertes
Il vous doura bonne santé
Et des biens à plus grant planté
Que n'eustes oncques sans doutance
Mais que preniez en patience

Vne chose vous compteray
Tout au long & si vous diray
Vne vision qui m'aduint
Il y a bien xv. iours ou vingt
Qu'il m'est apparu vne chose
Espouuentable & merueilleuse
Et si me dit vne parole
Que ie croy que n'est que friuolle
Merueilleusement me fut dicté
Pource ie l'ay mise & escrite
Sans papier & sans escritoire
En mon cœur & en ma memoire
Bien la retiens en mon oreille
Je vous en conteray merueille
Ce fut à l'heure proprement
Que tout homme naturellement
Par raison doit prendre repos
Quant le siecle du iour est clos
Par vne nuit quant ie dormoye
Et en mon liét couché estoye
Je vey vn esperit passer
Par deuant moy qui delaisser
Me fist & au cœur grand frayeur
Tant que ie tremble de peur
Trestous mes yeux me harissierent
Et les membres me rremblerent
Et apres ie veiz vn image
Merueilleux deuant mon visaige
Lequel ne pouuoie cognoistre

Qui

Qui à moy se veins apparoirs
Et puis ouis vne voix clere
Qui me disoit en tel' maniere
Dy moy si homme pourroit estre
Semblable à Dieu qui le fit nestre
Ou si homme sera plus net
Et plus pur que Dieu qui l'a fait
Car ceux mesmes qui le seruent
Sont variables bien souuent
Et en ses anges par verité
Trouue mal & iniquité
Dont par plus forte raison
Ceux qui habitent en la maison
Qui sont du lymon de la terre
Et ont leur fondement de pierre
Et sont de boue & d'ordure
Formez de leur propre nature
Comment feront ilz iceux
Contre ceux qui sont immortuels
Car du matin à la vespree
Leur vie est tantost finée
Tout cecy ie vey & ouy
Dont ie fus forment esbahy
Considerez le mal & la peine
De toute creature humaine
Pource vous pry tant que ie puis
Comme vostre amy que ie suis
Qu'il vous plaise vous conforter
Et patiemment porter

Vostre grand douleur & misere
Confortez vous en Dieu le pere
Prenez le mal en patience
Ayez en Dieu bonne esperance
Et Dieu qui est tant debonnaire
Qui peut tout faire & deffaire
De tous voz maux vous guerira
Et ses biens vous departira
Et à la vie & à la mort.

Iob. Hee Dieu comment prendray confort
Quant Dieu mon pere en qui ie croy
Est courroucé contre moy
Par mon peché par ma folie
Et ma chair est toute pourrie
Et assechee mallement
Languir me conuient longuement
Mon esprit est si troublé
Et de grans douleurs affeulé
Et les vers qui ma chair mangent
Ne dorment pas mais me rongent
Et me mangent par telle maniere
Que sur mon corps n'a chair entiere
Mes vestemens sont degastez
Tant en va de tous costez
Iamais ne partiray d'icy
Si Dieu ne me prent à mercy
Pour luy diray mes complainctes
Et criant mercy les mains ioinctes.

Il dis

Responde mihi.

Hee

Hee beau tresdonx Dieu respons moy
Quans pechez ay fait contre toy
Et me demonstre ie t'en prie
Quant que i'ay meffaict en ma vie
Helas pourquoy ta face cutes
Et ton ennemy me reputes
Tu demontres ta grant vengeance
Contre moy qui n'ay de puissance
Mais que à vn petit fueillet
Contre le vent cil le cuillet
Et veux poursuiure par rigueur
Moy qui n'ay force ne vigueur
Et en ton liure as escrit
Mes pechez contre mon esprit
Trop mallement mon mal me blesse
Par les pechez de ma ieunesse
Maintenant tu me veux retraire
Et de tout en tout me deffaire
Tu m'as veu aller & venir
Et en ce monde contenir
Et tous les pas que i'ay marché
As visité & encerché.
Helas ie meurs en pourriture
N'oublie pas ta creature
Ie tiens ma vie pour finée
Car i'ay la chair toute mangée
Et pourrie certainement
Comme seroit vn vestement
Lequel est tout mangé de teigne.

Baldac.

Je parleray quoy qu'en aduienne
 Cher sire & amy parfait
 Je vous requier à tout effect
 Que vous ayez en remembrance
 La grant vertu de patience
 Et Dieu si vous aydera
 Et vostre mal allegera
 Si vous auez perdu voz biens
 En ce monde c'est bien du meins
 Car Dieu qui les a voulu prendre
 Est bien puissant de les vous rendre
 Ce ne sont que biens de fortune
 Qui à toutes gens est commune
 Sa rouë de tourner ne cesse
 Les vnz monte les autres besse
 Es vnz donne es autres tout
 Des biens mondains fait ce qui veut
 Sa maniere est trop merueilleuse
 Car aucune fois est ioyeuse
 Et demonstre son beau visage
 Et donne es vns aduantaige
 D'or & d'argent & de richesse
 Et les monte en la hautesse
 Au plus haut degré de sa rouë
 Et puis apres leur faict la mouë
 Et du haut en bas l'entremet
 Car sa rouë sans cesservire
 Contre fortune la diuerse

N'est

N'est fort ne foible qui ne renuerse,
Fol est qui trop y met sa cure:
Car elle est de faulſe nature,
Rebelle, pleine de despit:
Pource vn proverbe nous dit,
De trop grans biens ne t'esfouis,
De tes pertes ne t'esbahis,
Prens le temps comme il peut venir,
Si tu veux sage deuenir,
Vous ſçauiez que rien n'auies
Quand naquiſtes: mais eſtiez
En grand pauureté trestout nud,
Et depuis vous eſtes venu
En grand ri cheſſe & puisſance,
Ce n'eſt pas de voſtre naiſſance:
Car c'eſt par la grace de Dieu,
Quitouſiours vous a bien pourueu.
Pourquoy donc vous doit-il deſplaire,
Si Dieu veult ſa volon té faire?
C'eſt à fin de vous approuuer,
Si iuſte vous pourra trouuer.
N'ayez pas dueil, ie vous en prie,
Si Dieu a fait & accomplie
Son plaifir & ſa volon té.
S'il vous a vos enfans oſté,
Et fait mourir trestous enſemble:
C'eſt pour vous demonſtrer exemple
Qu'il vous aime parfaictement:
Puis qu'il luy plaift certainement

Que

Que vostre fruiet vostre lignie
Tienne dedans sa compagnie
Ilz estoient siens & non pas vostres
Après vous en donnera d'autres
Comme le Seigneur & le maistre
Qui faict les gens mourir & naistre
Vous sçauiez bien si luy eust pleu
Que nulz enfans n'eussiez eu
Par ce est benoist sans doutance
Tout homme qui de sa semence
Peut deuant Dieu vn present faire
Par lequel il luy peusse plaire
Vous auez faict à Dieu present
De voz enfans bel & plaisant
Voz enfans semblent les fourriers
D'un Seigneur qui vont les premiers
A fin de prendre son logis
Quant il s'en va hors son pays
Car ils apprestent vostre lieu
En paradis au pres de Dieu
Et quant du monde partirés
Et par dela vous en yrés
Vous les trouuerés en la voye
Au deuant de vous en grand ioye
Reuestuz de drapz precieux
En chantant chants melodicux
Graces & mercis vous rendront
Et autres de vous se tiendront
Adonc serés en tel maniere

Com.

Comme est l'estoille poussiniere,
Qui la nuit grand lumiere donne,
Pour la clarté qui l'environne:
Aussi vostre ioye sera
Sans fin à iamais durera:
Pource mon amy ie vous prie,
Que ne vous desconfortés mie,
Mais loués Dieu deuotement,
En le merciant humblement:
Car il vous a fait grand honneur
Et demonstré signe d'amour.
Considerés le temps d'Esté,
Le beau rosier qui a esté
Tout l'Hyuer comme vne souche,
Quand il sent l'Esté qui s'approche:
Toute sa couleur est muee,
Par la vertu de la roussee
Du ciel, qui par dessus descent:
Et lors les fueilles luy naissent,
Et apres iettent belles roses,
Odorantes & gratieuses,
Dont tout le iardin resplendit,
Et apres maintefois aduient,
Que le iardinier si s'en vient,
Et voit le rosier qui est beau,
Des roses veut faire vn chapeau,
Tant prend en elles grand plaisir,
Et les cueillit tout à son plaisir,
Mais le rosier point ne destruit.

Pource

Pource qu'il porte si beau fruit,
 En attendant qu'il portera
 Encores fruit & chargera.
 Par ce beau rosier i'entens
 Le bon pere qui en tout temps
 Baille à ses enfans doctrine,
 Et leur apprend la foy diuine,
 Les bons enfans semblent la rose,
 Qui au iardin si est enclose:
 Et du iardinier ie puis dire,
 Que c'est Dieu le souverain Sire,
 Qui ne destruit point le rosier,
 Et ainsi le puis exposer,
 Le rosier ne veult point destruire.
 Ainsi doncques ie puis conclure,
 Qu'encores fruit vous porterés,
 Et des autres enfans aurez,
 Quand la rousée descendra
 Du ciel, qui sur vous s'espandra,
 Et serez tout sain & ioyeux.
 Les faicts de Dieu sont merueilleux:
 Regarde moy vn arbre vert,
 Qui de branches est tout couuert,
 Apres qu'il est esbranché,
 Et qu'il est couppé & tranché,
 Et qu'il a souffert plusieurs coups:
 Quand il sent venir le temps doux,
 Il rend branches toutes nouvelles,
 Et fueilles qui sont aussi belles

Comme

Comme pardeuant les auoit.
 Pource vous prie, comment qu'il soit,
 Que vueillez prendre bon confort,
 Soyez bon champion & fort,
 Et vous armez de patience
 Contre Sathan & sa puissance.
 Du tout en Dieu vous rapporter,
 En bon espoir vous conforter:
 Et Dieu si vous donnera santé,
 Et des biens à plus grand planté
 Que n'eustes oncques en vostre vie:
 Car ie vous promets & affie
 En bonne foy, que Dieu vous aime.

*Iob.**Homo natus.*

Tout homme qui est né de femme,
 Viuant brief temps à grand diffame,
 Est remply de mainte misere:
 Car il s'en est en la maniere,
 Et naist comme la belle fleur,
 Qui se decline chacun iour.
 Comme l'ombre s'enfuit & court,
 Tousiours en tirant en sa mort,
 Et tant seulement ne demeure
 En vn estat vne seule heure.
 He doux Iesus tu es bien digne
 D'ouurir sur luy tes yeux benignes,
 Et le regarder par malice.
 Et veult de luy faire iustice,
 Et l'amener si brieffuement

Aucc

Auec toy en ton iugement.

Helas qui peut faire le monde,

Conceu de semence immonde?

Nul fors que toy ne les peut faire:

Car tu peux tout faire & deffaire.

Mes iours s'en vont comme fait l'ombre,

Tu as par deuers toy le nombre,

Et les mots escripts en ton liure,

Et combien tout homme doit vinre.

Tu as tous mes iours compassez,

Qui ne peuuent estre passez:

Pource te requiers tresdoux pere,

Tire toy va petit arriere,

A fin que j'aye aucun confort:

Car ie suis au liët de la mort.

Ie resemble le laboureur,

Qui au labour va chacun iour:

Car trop me tarde malement,

Que ne suis à l'acheuement

Du grand labour où ie suis mis.

Sophar. Helas Iob beau tresdoux amis:

Confortés vous, ie vous en prie:

Car ie vous promets & affie

Que vous serés remuneré

Des maux qu'aués endure.

Et vostre mal & accident

Monstre signe tout euident

Que Dieu vous aime & aimera,

Et point il ne vous oubliera.

Pay

I'ay tousiours ouy raconter,
Qu'à nul grand bien ne peut monter
Homme qui ne veut son corps offrir
A bien endurer & souffrir.
Et le Philosophe nous dit,
Selon que treuve en escrit,
Que nul ne peut auoir les choses
Qui sont douces & sauoureuses,
S'il ne veut goustier les premieres
Les choses qui luy sont ameres.
Grand douceur il sort de l'amer:
Congnoistre faut auant qu'aimer.
Moult a le tonneau de beaux coups
Auant qu'il soit parfait & clous,
Et qu'il soit suffisant & digne
Pour mettre le bon vin de vigne.
Moult conuient aussi que lon bate
La laine, dont est l'escarlatae,
Et qu'elle soit aux pieds foullee
Et batue fort & preslee
Auant qu'elle soit digne d'estre
Pour faire robbe à vn grand maistre.
Moult est aussi souuent chauffee
Vne belle coupe doree,
Et de plusieurs marteaux batue:
Au feu mise & espandue,
Auant qu'elle puisse estre faite,
Et qu'elle soit digne qu'on la mette
Par deuant le Roy sur la table,

Pour faire seruire honorable.

Bien est bon ouurier qui sçait traire

De terre fin argent & faire,

Et affiner par la science

Le fin or, qu'est de tel' puissance:

Car qui en a, il peut acquerre

Honneurs, possessions & terre.

Par ceste raison ie puis dire,

Que Dieu nostre souuerain Sire,

Qui est le grand maistre des œures,

Et le gouuerneur des orfeures,

Veult faire de terre & d'ordure

Vne coupe d'or fine & pure,

Pour soy seruir en sa maison,

A iamais en toute saison.

Par ceste coupe i'entens l'ame

De tout homme, & de toute femme

Qui aiment Dieu parfaitement,

Et prennent patiemment

Les maux, les tribulations,

Les pertes, les oppressions

Que Dieu le pere qui est es cieux

Enuoye bien souuent sur eux,

Par mortalité, par famine,

Et par guerre qui point ne fine:

Et quand Dieu voit leur patience,

Il prend en eux si grand plaissance:

Car il les retient de sa part,

Et en tous ses biens ont leur part:

Mais.

Mais premierement il conuient
Que le corps & l'ame se tient
Formé de matiere vilaine,
Souffre & endure peine,
Et soit batu & rançonné,
Et à pillarts abandonné,
A fin qu'il soit net & pur,
Comme le fin or & azur.
Et adonc quand il est si beau,
Dieu en fait son propre vaisseau;
Et si en veult estre seruy,
Pour l'honneur qu'il a desleruy.
Par mortalité & par guerre
Dieu forge de bouë & de terre
Auioird'huy maints vaisseaux d'or,
Pour mettre dedans son tresor.
Nous le pouons veoir tous les iours,
Par les maux que souffrent plusieurs:
Car les iustes & debonnaire
Ont auioird'huy le plus affaire,
Et ceux qui veulent maintenir
Pecher & larrons deuenir,
Ne souffrent nulle aduersité:
Mais viuent en auctorité,
Toute richesse leur abonde,
Leur paradis est en ce monde.
De ces gens Dieu ne peut forger,
Car ils mouillent trop le gorgier,
L'on ne peut faire rien qui vaille,

K. 2

Tant font de mauuaife mitaille:
Pource mon amy ie vous prie
Loués Dieu en vostre vie:
Car vous deués auoir grand ioye
De tous les maux que vous enuoye,
Et si vostre corps est blecé,
Et desrompu, & despecé,
Pas n'en deuez estre marry:
Car Dieu vous aura tost guery.
Le corps d'humaine creature
N'est qu'un sac plein de pourriture,
Plus puant que nulle charongne,
Toufiours a la toux & la rongne,
Et est malade bien souuent,
Rien n'en sort qui ne sois puant.
Quand un homme vit en ieunesse,
Et il abonde en richesse,
Il ressemble la branche verte,
Qui de miel est toute couuerte,
Où les mouches se viennent rendre
De toutes pars le miel prendre,
Quand la douceur du miel sentent
Entour la branche en vient tant
De noires, perles & vermeilles,
Et de iaunes, que c'est merueilles:
Et crient, & font grand clamour:
Mais ce n'est mie pour l'amour
Qu'elles ont à la branche de bois:
Mais c'est pour le miel qui est frais,

Et

Et quand les mouches sentent bien
Qu'en celle branche n'a plus rien,
Et que failly est le miel doux:
Adonc elles tournent le dos,
Leur compagnie se depart,
Chacune s'en va de sa part,
De la branche ne font plus compte,
Sans cela laissent à grand honte,
Ceste chose vous pouuez voir,
Et clairement appercevoir.
Regardez-moy les grans Seigneurs,
Qui ont richesses & honneurs,
Princes, Ducs, Contes, Capitaines,
Et ceux qui ont les grans domaines,
Vous verrez en toutes saisons,
Aupres d'eux & de leurs maisons
Tant de gens de diuers offices,
Qui sont si gaillars & propices,
Reuestus de robbes diuerses,
Blanches, noires, rouges & perses.
L'un flate, l'autre rit & chante,
Pource qu'ils viuent de la rente,
Et des offices de leur maistre.
Et maintesfois quand il peut estre
Que leur Seigneur n'a plus de terre,
Par malle fortune & par guerre,
Et qu'il n'a plus de seigneurie,
Chacun laisse sa compagnie.
De tous ses gens n'y a celuy

Qui ne se gabusent de luy
 Et le laissent estre tout soul
 En disant que ce n'est qu'un foul
 Cecy est le gouuernement
 Du meschant monde maintenant
 Pource ie dis qu'il n'est pas sage
 Qui pour les biens & l'heritage
 De ce monde que si peu dure
 Se met à honte & à rancure
 Si vous requier d'amour feal
 Mon trescher amy special
 Louez Dieu de quand qu'il vous donne
 Aiez en vous fiance bonne
 Prenez le mal comme le bien
 Ne vous desconfortez pour rien
 Soiez patient en misere
 Rendez graces à Dieu le pere
 Et Dieu si vous doura victoire
 Et serez avec lui en sa gloire
 Lassus au Royaume des cieux
 Qu'il a promis à trestous ceux
 Qui auront bonne patience.

Job. Hee Dieu me doit bonne patience
 Prendre en gré les maux qu'il m'enuoie
 Car trop en durer ne pourroie
 En ce monde plein d'orphanté
 Face de moy sa volonté
 A luy me rens entierement
 En luy requerant humblement

Qu'il

Qu'il me doint bonne guerison
Et luy diray vne leçon.

Quis mihi hoc tribuat.

He tresdoux Dieu qui m'a fait naistre
Dictes moy que cil pourra estre
Qui m'ottroyera sans tarder
Que d'enfer me vueille garder
Et que tu m'ostes de la voye
A fin que nully ne me voye
Iusques ta fureur soit passee
Et tu m'ordonnes iournée
Que de moy te recorderas
Et d'enfer me deliureras
Car tu sçais bien n'en doubte mie
Quant ie auray perdu la vie
De mort à vie reuiendray
Et au iugement me rendray
Et pource trop fort ie me doubte
Que tousiours attens & escoute
Quel chemin ie pourray tenir
Quant mon heure deura finir
Tu m'appelleras si te plaist
Et de respondre seray prest
Car ie suis l'œuure de tes mains
Ayde moy & me soustiens
Tu sçais bien tout ce que i'ay faict
Et pource si i'ay rien meffait
Ie te requiers en charité
Que tu ayez de moy pitié

K 4

Eliphaz. Par ta sainte misericorde.
Cher amy quant ie me recorde
De la promesse que Dieu feit
A Abraham quand il luy dit
Queluy & toute sa lignee
Mettroit en perdurable vie
Et que d'enfer les ietteroit
Et que paradis leur donroit
Quant me souuient de la promesse
Ie suis ioyeux & en liesse
Car i'ay tousiours bonne esperance
Que Dieu vous donra allegance
Ainsi comme il a promis
A Abraham & à ses amis
Pource veuillez vous conforter
Et du tout en Dieu raporter
Et Dieu qui ne faut ne ment
Vous donra bon allegement
Et si Dieu vous bat & chastie
Merciez l'en ie vous en prie
Prenez exemple à ma requeste
Au lyon qui est forte beste
Car nul n'en ose approcher
Ne aucunement le toucher
Et quand celuy qui le gouuerne
Veult entrer dedans sa cauerne
Pour le faire boire & manger
Il prend vn chien qu'est sans ganger
Et le bat deuant le lyon

Pour

Pour le mettre en subiection
 Et quand le lyon voit qu'on bat
 Le chien il se rend sans debat
 Et se couche & s'humilie
 Pour paeur que ainsi le chastie
 Et aussi par experience
 Dieu nous faict ceste demonstrence
 Car il bat plusieurs en ce monde
 Qu'il ayme d'amour tresparfonde
 A fin que les faux orgueilleux
 Les yreux & les ennieux
 Puissent cognoistre leur folie
 Et amender leur fauce vie
 Car bien soy chastie celuy
 Qui se chastie par autruy
 En ce monde qui est si perilleux
 Les faicts de Dieu sont merueilleux
 Et sa puissance est infin'e.

Iob Loué soit Dieu ie le mercie
 En luy rendant gloire & honneur
 C'est mon createur mon seigneur
 Ie me submetz à son plaisir
 Et autre chose n'ay desir
 Qu'accomplir son commandement
 A luy me rens entierement
 Corps & ame & quant que i'ay
 Ie sçay bien que ie le verray
 Luy sans autre par verité
 Quand ie seray resuscité

Au dernier iour quand il viendra
 Et son grand iugement tiendra
 Mes yeux le verront face à face
 Adonc ne sçauray que ie face
 Ne que respondre ne que dire
 A ce iour plein de dueil & d'ire
 Pource quant me souuient ie tremble
 Car le Ciel & la terre ensemble
 S'esmouueront par grand freour
 Helas i'en aý tousiours grand paour
 Ou pourray ie trouuer refuge
 Quand seray deuant le grand iuge
 Moy qui tant l'ay faict courroucer
 Ne ou me pourray ie mucer
 Et ne sçay fors qu'à luy me rendre
 Et crier mercy sans attendre
 Car contre luy ay trop meffaißt.

Eliphaz. Helas trescher amy parfaict
 Prenez tousiours en vous confort
 Soyez bon champion & fort
 Et vous souuionne de nos peres
 Qui ont souffert tant de miseres
 Le temps passé & de martyre
 Il n'est mestier plus le vous dire
 Car vous le sçaez mieux que nous
 Pource prenez confort en vous
 Las qu'es deuenü la science
 De vous & la grand patience
 Vos enseignemens voz doctrines:

Voz

Voz admonnestemens voz disciplines
 Perdu auez entierement
 Tout confort & enseignement
 Pour vne maille & griefue playe
 Que Dieu maintenant vous enuoye
 Et vous mettez à tel douleur
 Certes mon amy c'est foleur
 Toutesfois de present ie n'ose
 Vous en parler plus nulle chose
 Car y'ay peur de vous desplaire
 Mais s'il est rien que puisse faire
 Pour vous plaise vous le me dire
 Et prest ie suis del'accomplire
 De tout mon cœur entierement.

*Iob.**Spiritus meus.*

Mon esprit certainement
 Se affoiblist trop mallement
 Mes iours s'abregent en peu d'heure
 Et rien qui soit ne me demeure
 Fors seulement que le tombeau
 Sur moy n'a plus ne chair ne peau
 Helas ie croy n'auoir pas faict
 Chose pouquoy soye deffaict
 Et mon œil rend larmes & pleure
 Et en amertume demeure
 Mon tresdoux Iesus aidez moy
 Et si me mets au pres de toy
 Car ie suis prest de me combattre
 Ou qu'il te plaira sans debatre

Mes

Mes iours faillent & mes pensees
 Sont en peu de temps dissipees
 Et nuict & iour point ne repose
 La mort est en mon cœur enclose
 En moy n'a ioye ne delict
 Car en tenebres est mon liect
 Pource i'ay dict à pourriture
 En considerant ma nature
 Mon pere ma mere & ma sœur
 Seront aux vers i'en suis bien seur
 Leur chair que nourrissoient si chere
 Pourrira à grand vitupere
 Helas moy que pourray ie faire
 A toy me rends Dieu debonnaire
 Regarde bien ma patience
 Tu es mon Dieu mon esperance
 Mon seigneur mon pere & mon maistre.

Baldach.

Mon cher amy Dieu vous doit estre
 Tousiours en bonne cognoissance
 Et prendre tout en patience
 Car il n'y a celuy de nous
 Qui ne voulüst faire pour vous
 Iour & nuict & ce que pourrions
 Et pource nous vous supplions
 De cœur affectueusement
 Que vous vueillez benignement
 Louer Dieu & ne vous desplaie
 Du grand mal & de la malaie

Que

Que maintenant vous endurez
Et i'ay fiance que ferez
Briefuement plus sain & ioyeux
S'il plaist au benoist roy des cieux
Et tous les biens qu'avez perdus
Vous seront au double rendus
Pour vn denier en aurez cent
Et ferez encore puissant
Et plus riche de la moitié
Que parauant n'avez esté
Il faut semer premierement
Auant que cueillir le froment
Et ceux qui sement leur semence
En larmes & en penitence
Les cueilliront c'est chose vraye
En exultation & en ioye
Pource mon amy ie m'attens
Qu'encores ie verray le temps
Au plaisir Dieu que vous ferez
De tous voz maux remunererez
Car Dieu le pere point n'oublie
Tout homme qui en luy se fie
I'en parlasse plus à loisir
S'il ne vous vient à desplaisir
Mais i'ay grand peur certainement
De vous desplaire aucunement
Toutesfois accomplir vouldroye
Vostre vouloir tant que pourroye
Du bon du cœur sans demouree.

Job. Pellimee.

Ma chair est toute degastee
 Sur moi n'a que la peau curee.
 Et mes bollicures & mes dens
 Sont rongees dehors & dedans
 Pour Dieu mercy tous mes amis
 Regardez comme ie suis mis
 Mercy vous crie car c'est au fort
 La main de Dieu touche trop fort
 Helas helas i'aperçoy bien
 Que pour moy vous ne faictes rien.
 Mes pechez ne sont pas estains
 Car ils sont en ma face pains
 Si vous supply que tant facez
 Pour moi que soient effacez
 Au moins quand tous maux m'affaillent
 Que vos prieres si me vaillent.
 Je sçay bien que mon redempteur
 Vit & quand viendra le grand iour.
 De terre ie me leureray
 Et à son iugement seray
 Illec le verray face à face
 Si luy plaist par sa sainte grace
 L'ay ceste foy ceste esperance
 Au cœur & en la conscience
 Et tousiours cacher en mon sein.

Sephar.

Mon cher amy vous dictes bien
 Pource ne doubtez point la mort

Mais.

Mais vous donnez ioye & confort
De vous mesmes si vous pouuez.
Et merciez Dieu & louez
Autant du mal comme du bien
Et ne vous souciez de rien
Car Dieu vous a demonstré signe
Que vous estes vn vaisseau digne
Pour le seruir le temps qui vient
Doncques ne vous esmoyez point
Car Dieu si vous a esleu
Et pour son amy receu
Puis qu'il vous enuoye martyre
Ie n'ose plus rien vous en dire
Pour doubte de vous ennuyer
Mais de bon cœur vous vueil prier
Et supplier à tout effaict
Si ie vous ay dit ne meffaict
Nulle chose qui vous deplace
Qu'il vous plaise de vostre grace
Me pardonner entierement
Et au surplus hardiment
Que vous plaira me commandez
Et se rien vous fault demandez
Comme à celuy qui est tout prest
De vous obeyr s'il vous plaist
Car certès iamais ne voudroye
Vous delaisser si ie pouuoye
Mais vous seruir & secourir
Et s'il vous plaist ie vueil mourir.

Ou viure en vostre compaignie.

Iob. Mes chers amis ie vous mercie
Tresgrandement & vous requiers
Qu'il vous plaise pour moy prier
Car si Dieu n'a pitié de moy
Mon cœur si est en grand esmoy
Helas voicy mon pauvre corps
Qu'est mangé dedans & dehors
Sur moy n'a peau ne cher ne nerfs
Que tout ne soit mangé de vers
Prenez exemple & vous mirez
Regardez moy & vous dirés
Que peu de chose est la gloire
De ce monde qu'est transitoire
Regardez mon corps à martyre
Et vous verrez & pourrez dire
Que ceste vie par verité
N'est que vent & vanité
N'a gueres ie souloye estre
Sain & ioyeux & vn grand maistre
Or suis en tel estat venu
Chetif dolent estroit tenu
Ainsi va la voye mondaine
Et passe c'est chose certaine
Prenez à moy tous exemplaire
Des les moindres iusques aux meies
Regardez moy & vous mirez
Car trestous itels vous serez
Itel comme vous estes ay

Et

Et itelz serez comme moy
 Ic ie vous promets & affie.

Eliphat. Mon cher amy ie vous supplie :
 Pardonnez nous à ma requeste
 Nous vous auons cassé la teste
 De parler ainsi longuement :
 Et si vous faut aucunement
 Nulle chose que puisse faire
 Fait sera sans dire au contraire
 Commandez nous ce qu'il vous plaira :
 Et chacun de nous obeyra :
 De bon cœur plus que nul autre.

Baldac. Trescher sire ie suis tout prest :
 Nuit & iour de corps & de biens
 Et vous supplie s'il vous faut riens :
 Dont ie puisse faire finance.
 Dictes le moy sans demourance
 Et de bon cœur l'accompliray
 A mon pouuoir mieux que pourray :
 En priant Dieu par sa bonté
 Qu'il vous vueille donner santé
 Et bonne vie & bonne ioye :
 Ainsi vrayement comme voudroye
 Et que vostre cœur le desire.

Sophar. A Dieu soye Iob mon bon sire :
 Et mon amy especial.
 Je pry Dieu qu'il vous gard de mal :
 Et vous doint bon allegement
 De tous voz maux entierement.

LL

Et vous face par sa pitié
 Ioyeux & en prospérité
 Et viure longuement sur terre
 Et vous doint paradis acquerre
 Et à tous ceux qui vous ayment.

Icy s'en vont ses amis & il leur dit à Dieu.

Iob

Mes amis à Dieu vous commant
 A Dieu vous dy pour tous temps mais
 Car ie ne vous verray ia mais
 Le cœur & l'espiit me faut,
 Et la mort durement m'assaut,
 Helas ie fais en grand esmoy
 Si Dieu ne prent pitié de moy
 A luy me rens à luy me plains
 En luy disant à ioinctes main.

Quare de vulua.

Hee Dieu & pourquoy m'as fait naistre
 Du ventre ma mere pour estre
 En tel douleur comme demeure
 I'aymassé mieux des celle heure
 N'auoir point esté conçu
 Et que mon œil n'eust ia veu
 Car si oncques n'eusse esté
 Point ne fusse ainsi molesté
 Mais fusse comme celuy qui est
 Mis au tombeau si tost qu'il naist;
 Car ie sçay bien certainement
 Que mes iours fineront briefuement

Par

Par ce ie te pry qu'il te plaise
 Me donner vn petit d'espace
 Affin que ie me puisse plaindre
 Auant que ie aille sans reuiendre
 A la terre de desconfort
 Et es tenebres de la mort
 Ou il n'ya ne paix ne liesse
 Fors que douleur pleur & tristesse
 Et tout horreur inhabitans.

Sathan enuierant.

Ha maulgré Dieu ie pers mon temps
 Hau dyables & que feray
 Te cuyde que i'enrageray
 Je suis perdu ie suis hay
 Oncques ne fus si esbahy
 Car ie me semble à celuy qui tent
 Et qui chassé & rien ne prent
 I'attens tousiours & viens & voys
 Et pers mon temps & riens ne foys
 Que mourir puisse il de rage
 Le trefordeux villain sauuage
 Qui tant m'a donné de trauail
 Et tout ne vaut pas vn chief d'ail
 Bien m'a faict muser & attendre
 Et ne sçay par quel bout le prendre
 Si mon faict ne va autrement
 Iamais n'oseray nullement
 Me monstrer deuant lucifer
 Ne retourner en nostre enfer

En malle heure feis l'entreprise
 Si ie ne l'ay par autie guise
 Pourtant encores tourneray
 Pour veoir si tenter le pourray
 Par femme le faut deceuoir
 Autrement ne le puis auoir
 Car par femme premierement
 Homme fut mis à damnement
 Et pour mieux faire la besongne
 Prendray le corps & la charongne
 D'un homme damné sans doubtaunce :
 Et m'en iray sans demourance
 De rechef à luy & scauray
 Encores si riens ie feray
 Et si ie veux à ceste foys
 Ie crieray à haute voix
 Et rendray targe & escu
 En disant que Iob m'a vaincu
 Que Dieu luy enuoye malle estraine
 Tant il m'a faict prendre de peine.

Icy Sathan prend l'habit d'un poure & les instrumens sonnent. & Sathan vient à Iob & le sente.
 Hee Iob celuy qui fit les mores
 Vous doint bon iour & bonnes heures
 Helas mon tresuaillant seigneur
 Moultestes à grant deshonneur
 Iamais ne cuydasse à ma vie
 Vous veoir souffrir tel villennie
 Que tant de biens auez eu.

Vray;

Vrayement vous estes bien deceu
 Puis que Dieu vous a oublié
 En qui vous estes tant fié
 Je le congnois bien maintenant
 Dont me desplaist certainement
 Helas & ou sont tous vos biens
 Je croy que vous n'avez plus riens
 Puis que l'on vous a mis icy.

Iob. I'ay assez de biens Dieu mercy
 Loué soit Dieu omnipotent
 Puis que luy plaist ie suis content
 Sa vouldonté soit accomplie.

Sathan. En l'honneur de Dieu ie vous prie
 Mon trescher seigneur honorable
 Que vous me soyiez homme aydable
 Vostre aumosne ie vous requier
 Vne maille ou vn denier
 Pour l'amour de Dieu nostre pere.

Iob. Tres volontiers & bonne chere
 Quant de par Dieu m'en requerez
 Des biens que i'ay avec moy aurez
 Mon amy or tendez voz mains
 Tenez voyez cy de mes biens
 Vous n'en ferez pas refusé.

Icy luy donne des vers.

Sathan. Je vous en tiens pour excusé
 Icy ne puis rien acquester
 Aller m'en voys sans arrester.

Icy s'en va à la femme de Iob.

Helas ma dame en verité
 Vous me faictes tresgrant pitié
 Dieu vous vueille donner confort
 Car vostre mary vous faict tort
 Qui vous laisse querre l'aumosne
 Or regardez que d'or tant iaune
 Qu'il m'a presentement baillé
 Vrayment ie suis esmerueillé
 Tant il a d'or & de cheuance
 Et par ma bonne conscience
 Ie cuidoye qu'il n'eust rien.

La femme de Iob.

Hélas non car ie le sçay bien
 Pour Dieu ne dictes plus tel' chose
 Par l'ame qui en moy repose
 En ce monde n'a si pource homme. [Rome

Sathan. Par tous les saincts qui sont à
 Ma dame ie vous compte veoir
 Vous mesmes l'avez peu veoir
 Comment il m'a donné cecy
 Maintenant: la sienne mercy
 Et cuydez vous que i'en iurasse
 Par Dieu si ie ne vous aymasse
 Ie ne le vous daignasse dire:

La femme de Iob.

S'il est vray i'en suis bien martyr
 Vrayement plus que nulle autre femme
 Mais ie vous iure par mon ame
 Que ie ne le croyray iamais:

Sathan.

Pardonnez moy ie n'en puis mais
 Ce que i'en d'y n'est que pour bien
 Si voulez vous n'en croyrez rien
 Quant est de moy i'ay beau me taire
 Car au fort ie n'en ay que faire
 Et pource à vous m'en rapporte.

La femme de Iob.

Pleust à Dieu que ie fusse morte
 Helas poure desconfortee
 Ie fus en mal'heuree
 Pour souffrir tant comme ie foy
 Puis qu'ainsi est à luy m'enuoy
 Et luy diray en brief langage
 Ma volonté & mon couraige
 Et s'il veut si pense de soy
 Ne s'en attende plus à moy.

Elle parle à Iob malicieusement.

Ha Iob ie vous suis bien tenue
 Par celuy Dieu qui feist la nue
 Iamais ne cuidasse à ma vie
 Que me fissiez tel' compagnie
 Vous me laissez querre le pain
 Et dicte que vous n'avez rien
 Et vous avez d'or & d'argent
 Tant qu'en donnez à toute gent
 Car deuant moy a vn poure homme
 En avez donné moult grant somme
 Vous ne l'auferiez desdire.

L 4

Iob. Mamie Dieu vous doint mieux dire
 Car vous me blasmez à grant tort
 L'homme accusé est demy mort
 Celuy est bien de Dieu maudit
 Qui vous a ceste chose dit
 Helas c'est bien chose contraire.

La femme de Iob.

Vous pouuez bien crier & braire
 Car par le Dieu qui est sur nous
 Iamais n'auray fiance en vous
 Ne en vostre belle eloquence.

Iob. Dieu me doint bonne patience
 Et vous gard de rentation
 Car selon mon intention
 C'est l'ennemy certainement
 Qui ne vous peut nuire autrement
 Je vous pry ne vueillez pas croire
 Faux parler que tant est contraire
 Tout ce qui reluist n'est pas or.

Il luy monstre les vers.

Regardez veez cy mon tresor.
 Voyez cy mon or & ma richesse
 Dont i'ay entour moy grant largesse
 Et sont les biens que Dieu nous preste.

La femme.

Pour neant vous rompez la teste
 Ce n'est pas ce que vous iurastes
 Dont la foy du corps me baillastes
 Par ce iamais iour de ma vie

N'ay

N'aymeray vostre compaignie
 Vous m'avez fausement trahie
 Helas ie suis toute esbahye
 Et pour perte que vous venist
 Ne pour nul mal que l'on vous feist
 Ne faisiés mauuaise chere
 Vous estes de faulse maniere
 Et pource doreſnauant
 Face pluye ou face vent
 Gouuernés vous comme ſçaurés
 Et pour moy bien ne mal n'aurés
 Si feissiés mieux de vous mourir.

Iob. Hee Dieu vueille moy ſecourir
 Helas mon cœur eſt bien martire
 Quant ma femme ma mort deſire
 A tous mes parens ſuis contraire
 Confortez moy Dieu debonnaire
 Car ie n'ay parent ne amy
 Qui face plus de chere de my
 Ceste vie trop me deſplaist
 Par ce vueil mourir ſ'il te plaist
 Ie ſuis à la fin de mes iours
 Quant les grans ſouſpirs & les pleurs
 De la mort ſi m'environnent
 Et toutes douleurs me viennent
 Tout mon bien en grant mal redonde
 Quant tous mes amys de ce monde
 Et ma femme premierement
 M'ont laiſſé ſi piteuſement

L s

170 LA PATIENCE

Il n'est langue qui peust dire
 Ne aussi clerc qui le sceut escrire
 Le mal la douleur & l'iniure
 Que ie souffre & que i'endure
 Souuent me fault gemir & plaindre
 Et ne sçay à qui me complandre
 Fors qu'à toy mon Dieu mon pere
 Mon esperance singuliere
 Plaise toy de moy secourir
 Car ie ne sçay que deuenir
 Pour le grant mal qui me tourmente.

La femme.

Helas poure femme dolente
 Je doy bien maudire ma vie
 Et estre dolente & marrie
 Quant mon mary par sa meschance
 Ne veut auoir en moy fiance
 Et son secret ne me veut dire
 De toutes les douleurs i'ay la pire
 Vrayement ie me doy bien douloir
 De luy & de son faux vouloir
 Iamais ie ne l'eusse cru
 Si premier ie ne l'eusse veu
 A tard m'en suis apperceuë
 Le faict descouuert la veuë
 Mais puis qu'ainsi est qu'autrement
 Je n'en puis cheuir nullement
 Si ie puis ie m'en vengeray.

Car

Car tout seul ie le laisseray:
 Or pense de luy qui voudra,
 Ou face du mieux qu'il pourra,
 Autre remede ie n'y voy.

Icy elle s'en va à son frere.

Job. He trefdoux Dieu confortez moy,
 Car ie languis trop longuement,
 Sans auoir nul confortement.
 D'une part l'ennemy me chassé,
 D'autre ma femme me menassé,
 Tous me amis m'ont en reproche,
 Plus n'y a qui de moy s'approche,
 Fors les vers qui me mangent,
 Et de toutes pars me rongent.
 Hee Dieu m'as tu oblié,
 Si ie ne suis prou chastié,
 Fay de moy ton commandement,
 Et me garde de damnement:
 Car si ne me prens à mercy,
 Iamais ne partiray d'icy.
 Helas qu'est le temps deuenü,
 Que ie soulois estre tenu
 Le plus riche de ce pays:
 Maintenant suis du tout hays,
 Chacun me rechine & gronde.
 Dieu qu'ay ie meffait en ce monde
 Pour estre si mal fortuné?
 L'aimasse mieux n'estre ia né:
 Car tous les iours de la sepmaine

Je languis & suis en grant peine
 Les grans delits de ma ieunesse
 Sont tournés en pleurs & tristesse
 Hee Dieu qu'est deuenue le temps
 Que toutes manieres de gens
 Me souloient porter honneur
 Et n'y auoit si grand seigneur
 En ce pays fust roy ou conte
 Qui par tout ne fist de moy compte
 L'auoye dominations
 Richesses & possessions
 Sept enfans masles & trois filles
 En tous lieux seruans & habilles
 Lesquelz me faisoient grant ioye
 Toutes les fois que les veoye
 Or est tout perdu en peu d'heure
 Et n'y a plus qui me secoure
 Helas qu'ayie peu meffaire
 Enuers Dieu qui me veut deffaire
 J'ay tousiours eu patience
 Et bonne foy & esperance
 De ce que Dieu m'auoit donné
 Aux pauures gens abandonné
 Helas! & ie suis ainsi mis
 Et n'ay ne parens ne amis
 Qui plus avec moy vueille estre.

Icy se taist en gemissant.

Dieu. Qui est cil qui veut resister
 Contre mes sentences diuines

Qui

Qui est cil qui veut arrester
Mes parolles qui sont tant dignes :
Où est cil qui pourroit par signe
Parler contre ma Maiesté ?
Qui es tu toy qui détermynes :
Contre ma sainte Deité ?
Si tu puis par ta potesté
Du tout sans autre te refaire ,
Leue-toy, soyes appresté,
Rens moy responce ordinaire :
Can grand question deputaire
Auecques toy ie vueil auoir.
Respons moy donc, sans tarder guere ,
Ta volonté ie vueil sçauoir,
Où estois tu dis le voir
Quand ie feis le ciel & la terre,
Lès oyseaux qui volent en l'air ,
Et l'ennemy qui te fait guerre?
Si tu puis science acquerre,
Et me respondre par rigneur:
Adoncques me pourras conquerre,
Et sur moy estre le grigneur.
De moy si veux estre Seigneur
Par dessus moy & ma puissance,
De toy puist penser tout erreur
Et retourner à congnoissance.
Dy moy si par ta grand vaillance
Tu veux à moy prendre bataille,
Respons moy tantost & t'auance.

Et garde bien que tu ne faille.
Pense en ton faict comment qu'il aille,
Responce faut que tu me donne,
En peine es qui te trauaille,
Si ton meffait ne te pardonne.
Dy moy si veux que t'environne
De tours hautes & de chasteaux,
Et si tu veux porter couronne
Quant tu seras mis és tombeaux.
Respons moy s'ils te semblent beaux,
Te pourras tu donner santé?
Car sur toy n'a chair ne peaux
Qui tout ne soit empuenté,
Et si pouuois par ta bonté
Destruire le diable Sathan,
Et le ietter de l'orphanté
D'enfer, luy & Leuiathan.
Considere bien & enten,
Et fonde tes-dits sur raison.
Ren moy bon compte & atten,
Il est le temps & la saison:
Garde toy bien de trahison,
De l'ennemy & son pouuoir,
A fin que dedans sa prison
D'enfer ne te puisse auoir.
Si tu veux qui ie suis sçauoir,
Ie suis o & alpha vrayement,
Et suis celuy pour dire voir
Qui forma tout le firmament.

Iob les mains jointes.

Ha tresdoux Dieu mon sauvement,
 Je suis ta pauvre creature,
 A toy me rends entierement:
 Car tu es le Dieu de nature,
 Si i'ay parlé à l'auanture,
 Comme homme desraisonné,
 Respondre ne puis par mesure,
 Comme cil qui a sens ordonné.
 De douleur suis enuironné,
 J'ay perdu tout entendement,
 Ma bouche i'ay abandonné,
 Qui m'a fait parler follement.
 En signe de repentement
 Je mettray ma main sur ma bouche,
 Et n'adiousteray nullement
 En mes dits vn mauuais reproche.

Dieu. Or entens, car le faict te touche,
 Vray te diray sans tarder guere,
 Tu sçais que nul de moy n'atrouche,
 Tant soit-il saint ne debonnaire.
 Veux-tu à moy estre contraire
 Et enfreindre mon iugement?
 Veux-tu condamner mon affaire
 Par ton grand iustifiement?
 Cuides-tu par ton parlement
 Estre grand & semblable à Dieu?
 Et demourer finablement
 Avec luy, & estre en son lieu?

Si

Si faire le puis par ton vœu,
 Vostoy de robes précieuses,
 Sois fervent comme le feu,
 Laisse tes plaintes rigoureuses,
 Dy moy paroles amoureuses,
 Leue toy sus, & soyes fort,
 Et de tes douleurs merueilleuses :
 Je te pourray donner confort.
 Tu es nauré iusqu'à la mort,
 Tes reins te faut environner,
 Leue toy sus, ie suis d'accord,
 A moy est de te pardonner.
 Je suis celuy qui puis donner
 Et tollir les fruits temporels,
 Et paradis abandonner
 Où sont les biens spirituels.
 Et saches que tous gens mortels,
 Quand ils auront vŕe leur vie,
 Empres la mort seront itels
 Comme tu es, n'en doute mie.
 Je t'ay esprouvé, iet'affie,
 A fin que de toy soit memoire,
 Comme le fin or que lon trie
 Pour donner à tous exemplaie.

Job. Haa mon Createur debonnaire :
 En toy est toute ma fiance,
 Si i'ay peché chose contraire,
 Pardonne moy par ta puissance :
 Né regarde pas l'ignorance :

De:

De ma pauvre fragilité.

A mort suis liuré sans doutance,

S'il ne te prend de moy pitié:

Pour ce te prie en charité

Et par ta grand miséricorde,

Vueilles tollir l'iniquité,

Et le mal qui tant me descorde,

Et si suis lié de la corde

D'auoir murmuré contre toy,

Raison est que ie m'y accorde,

Que ton plaisir face de moy.

Ie t'ay ouy, comme ie croy,

Plusieurs fois, c'est chose certaine:

Maintenant de mes yeux ie voy

Qui m'alegeat de ma grand peine.

Par ce, fontaine souueraine,

Ie me repens amèrement,

En toy priant que de ma peine

Me deliure hastiuement

Ma penitence doucement

En poudre & cendre veux finir,

Si te requier deuotement

Qu'à moy te plaise incliner.

Icy Dieu s'en va, & laisse Iob, & va à Eliphaz.

Toy Eliphaz examiner

Vueil en ma fureur asprement:

Pource qu'as voulu decliner

En tes parolles follement,

Et n'as parlé droictement

M

Comme Iob a fait deuant moy.
 Ne tes deux amis ensuyuant,
 Ainsi que contient vostre Loy:
 Pource doncques aduise toy:
 Vaten, toy & tes deux amis,
 A Iob, qui est en grand esmoy,
 Sur vn fumier, où on l'a mis:
 Ie luy ay maints maux transmis,
 Mais tout a prins en patience,
 Pource ie vueil qu'il soit remis
 En santé & en grand puissance.
 Prenez doncques sans demeurance
 Sept cheureaux, que vous menerez,
 Et sept moutons par ordonnance,
 Desquels sacrifice ferez.
 Et quand par deuers Iob ferez,
 Ensemble sacrificerez,
 Et me ferez oblation
 De priere & deuotion:
 Ie receuray benignement:
 Car ie l'ayme sans fiction,
 Pource qu'il me sert loyaument.

Icy est à genoux regardant Paradis.
Eliphat.

Tresdoux Dieu, Roy du firmament,
 Createur, fontaine de grace,
 Graces te rends treshumblement,
 En tous lieux & en toutes places.
 Il est bien raison que ie face

Ta volonté, sans contredire:
 Pource m'en vois, sans plus d'espace
 A mes deux amis pour leur dire.

Icy va à Baldac & à Sophar.

Baldac Sinthes mon trescher sire,
 Et vous Sophar entendez à moy,
 Chacun de vous tousiours desir
 Le bien de Iob, comme ie croy.
 Sachez mes amis tout de vray,
 Que nous deuons bien mener ioye::

Car ie vous iure par ma foy,
 Que Dieu son salut nous enuoye,
 Et veut que nous prenons la voye
 D'aller tous trois par amitié
 Conforter Iob, qui trop s'esmoye
 En sa grande necessité.

Dieu l'a regardé en pitié,
 Et veut que faisons sacrifice
 De sept cheureaux, en verité,
 Et de sept aigneaux sans malice.
 Et Iob si fera le seruice

A Dieu, & pour nous priera,
 Et sa priere exaucera.

Tous nos pechez pardonnera:
 Car c'est le vray Dieu de nature,
 Qui jamais point n'oubliera
 Ceux qui mettent en luy leur cure.

Baldac. Loué soit Dieu de l'auanture
 Qui ne veut nul temps oublier.

M . 2

Sa pouure humaine creature,
 Chacun l'en doit bien mercier.
 Par ce Eliphath vous requier,
 Allons à luy, c'est bien raison,
 C'est nostre parfait amy cher,
 Dieu luy doit bonne guérison:
 Car il y a long temps & saison
 Qu'il languist trop amèrement.
 I'ay sept cheureaux en ma maison,
 Que ie merray presentement.

Sophar. Et moy sept moutons vrayement,
 Que ie merray sans contredire
 Par amour & confortement,
 De mon amy, que tant desire:
 Et si de sept ne peut suffire,
 De tous mes biens le seruiray.
 C'est mon amy, c'est mon cher sire,
 Que i'ay aimé & aimeray.

Baldac. Iamais ie ne l'oblieraï,
 Temps est qu'au chemin nous mettons,
 Mes sept cheureaux ie meneray,
 Allez querre vos sept moutons.

Sophar. Volontiers; & nous apprestons,
 Dieu nous doit accomplir & faire
 Prières & oblations,
 Par lesquelles luy puissions plaire.

*Icy s'en va querir des bestes, & tandis les
 instrumens sonnent.*
 Iob trescher sire debonnaire,

Dieu

Dieu vous vueille donner santé,
 Et luy plaife sans tarder guere
 Vous ietter de ceste orphanté,
 Et vous doint de tous biens planté,
 Et viure longuement en ioye,
 Et de bien faire volonté:

Ainsi vrayement que voudroye.
 Mon cher amy c'est chose vraye,
 Que nous auons intention,
 Au plaisir Dieu que nous pouruoye
 De faire nostre oblation,
 Tous trois par grand deuotion
 De ce bestial que voicy,
 A fin qu'ayons remission,
 Et que Dieu nous prenne à mercy:
 Car certes Dieu le veut ainsi:
 Si vous priions en charité,
 Confortez vous sans nul soucy:
 Car Dieu si vous a visité.

Baldac. Trescher sire en verité
 J'ay à Dieu parfaite creance,
 Qu'il est esmeu en pitié,
 Et vous doint bonne allegeance:
 Par ce vous pry en toute instance
 Merciez Dieu deuotement,
 Ayez en luy bonne esperance,
 Et guery serez briefuement,
 Et nous voulons presentement
 Ce bestial sacrifier.

En vous priant trescherement
 Que pour nous vueillez Dieu prier
Iob. Helas bien vous doibs mercier

Mes amis Dieu vous vueille rendre
 Voz biens humblement l'en requier
 Et nous vueille de mal deffendre
 Je ne sçay comment pourroit prendre
 Monseigneur en gré mon seruice
 Quant vers luy i'ay voulu mesprendre
 Par mon peché par ma malice
 Car comine desloyal & nice
 I'ay faict courroucer mon seigneur
 Par ce est bien droict & iustice
 Que i'en souffre tel deshonneur

Sophar. Mon amy sauue vostre honneur
 Car ie vous promets & octroye
 Dieu vous monstre signe d'amour
 Puis que tant de maux vous enuoye
 Vous debuez bien auoir grand ioye
 Et mercier Dieu vostre pere
 Car il vous a mis en la voye
 D'aller à la ioye planiere
 Par ce vous requier d'amour chere
 Qu'il vons plaise sans plus d'espace
 Faire pour nous a Dieu priere
 Et que tous noz pechez efface.

Iob. Dieu me doit par sa sainte grace
 Le seruir à sa volonté
 Et faire chose qui luy plaise

Et

Et doit à mon ame santé
Car l'ennemy qui m'a tenté,
Ia si Dieu plaist pouuoir n'aura
Sur mon corps qu'il a tourmenté:
Car mon maistre me gardera.

Elisphat. Voire mon amy & sera
A tousiours mais de vous memoire,
Que Dieu tous ceux couronnera,
Qui de Sathan auront victoire.
Priez doncques le Roy de gloire,
Qu'il vous perdoint benignement,
Et ces bestes sans dilatoire
Sacrifierons doucement.

*Icy sacrifiant au feu, & l'aspergent
au sang.*

Iob les genoux à terre priant.

Vray Dieu qui au commencement
Feis homme & femme à ta semblance,
Et leur donnas entendement
De bien & de mal cognoissance:
A toy fontaine-de-iuence,
Ie me rens prins en ceste place,
Fais de moy à ton ordonnance:
Car ie me soumets à ta grace.
Tourne vers moy ta douce face,
Et me regarde en charité:
Car ie ne sçay plus que ie face,
S'il ne te prend de moy pitié.
Ie suis en grand necessité,

Mon tresdoux Dieu pardonne moy

Oste moy de l'iniquité

Et faicts ta volonté de moy

Tu es mon Dieu en qui ie croy

Mon corps m'ame te recommande

Prens moy à mercy tresdoux Roy

Et ie te vueil gager l'amende

Pardon te requier & demande

A iointes mains mon tresdoux pere

Tu es mon espoir mon entente

Et ma creance singuliere

Oste moy de ceste misere

Ou ie languis & suis en peine

Pres de la mort qui me demaine

Tu es le conduit & fontaine

Dont les ruisseaux courent sur terre

Et toute creature humaine

Peut à seur son sauement querre

Et pource ie te veux requerre

Que tu nous vueilles tous deffendre

De l'ennemy qui nous faict guerre

Et nous cuide tousiours surprendre

Et aussi qu'il te plaise prendre

De mes amis l'oblation

Et leur donner sans plus attendre

De leurs pechez remission.

*Icy parle vertu en paradis, & les anges
chantent. Patience.*

Mes bonnes seurs foy & esperance

I'ay

I'ay ouy la voix sans doubtaunce
 De Iob qui est en grand misere
 En sa douleur a esperance
 En ses pertes patience
 Et en Dieu bonne foy entiere
 Puis que ainsi est ma seur trespere
 Qu'il nous ayme comme ses meres
 Demonstrez luy signe d'amour
 Plus que nul des anciens peres
 Il souffre douleurs trop ameres
 I'ay bien entendu sa clameur
 Au cœur m'a faict muer couleur
 Quant i'ay entendu sa douleur
 Pource qu'à moy tousiours s'encline
 Si vous pry sans faire seiour
 Allons à luy toutes au secour
 Car de prier Dieu point ne fine.

Foy. Patience. ma seur trespere
 Aller nous faut droict comme ligne
 A nostre pere glorieux
 Requestes luy ferons benigne
 Pour nostre amy qui tant s'encline
 A nous servir en trestots lieux
 Il est plaissant & gracieux
 Et de nous trois est amoureux.
 Serui nous a toute sa vie
 Et a esté victorieux
 Prions pour luy le roy des cieux
 Il ne nous refusera mie

M s

Esperance. Mes cheres seurs ie vous affie
 Que de sa douleur suis mœrie
 De tout mon cœur entierement
 Mais toutesfois ie me confie
 En Dieu qui luy donnera ayde
 De tous ses maux bien briefuement
 Je suis à son commandement
 Allons doncques presentement
 Faire pour luy à Dieu requeste
 Le corps de luy entierement
 Est tourmenté presentement
 De Sathan la mauuaise beste.

Patience. Bien deuons de luy faire feste
 Et luy donner confort honneste
 Qu'il a esté en forte bataille
 Et a enduré grand tempeste
 Des les pieds iusques à la teste
 Tant qu'il n'a peau ne chair qui vaille
 Par ce point ne luy feray faille
 Je prieray comment qu'il en aille
 Treshumblement le roy de gloire
 Pour mon amy qui tant travaille
 Et a son pauvre corps si faille
 A fin que de luy soit memoire.

Foy. Ma treschere seur de bonnaire
 Je vous prie que sans tarder guere
 Allons deuant Dieu nostre pere
 Toutes trois requeste luy faire
 Et parler à luy sans nous taire

De

De nous trois toute la premiere. *Patience.*

Icy toutes les vertus se mettent à genoux deuant

Dieu en disant.

Glorieux Dieu haut emperiere

Roy des roys du monde lumiere

Createur & saluation

Veuillez entendre la priere

De Iob qui est en grand misere

Et en grand tribulation

Il vous ayme sans fiction

De cœur de corps d'affection

Et est patient sans malice

Vous sçauiez son opinion

Si vous pry sans dilation

Que luy veuillez estre propice

Il m'a faict plaisir & seruice

Et de patience l'office

En tous lieux a tousiours eue

Volontiers au chemin me misse

S'il vous plaist & plaisir luy feisse

Car point ne m'a mescongneue

De patience pourueu

Pour Sathan ne s'est cheu

Mais-l'a conuaincu en tous points

Desespoir l'a fort esmeu

En luy nullement n'a creu

En moy s'est mis en tous les plains.

Foy Je vous requiers à iointes mains

Mon Dieu mon pere souuerain

Que

Que luy vueillez donner confort
 Je suis bonne foy pour certain
 Seruy m'a de corps & de biens
 Jusques au plus pres de la mort
 En bonne foy s'est tenu fort
 Le faux sathan luy a faict tort
 Mais point ne me veult oublier
 Il a tousiours esté d'accord
 De moy servir sans nul discord
 En tel hom' se doibt on fier
 C'est mon seruant mon amy cher
 Qui m'a seruy sans varier
 Et qui est amoureux de moy
 Pource humblement vous requier
 Qu'il vous plaise le visiter
 Car en luy n'a que bonne foy.

Esperance.

Dieu tout puissant souuerain roy
 Plaise vous entendre vers moy
 Comme vostre pauvre seruante
 Je vous supply que sans desloy
 Vous plaise ietter d'esloy
 Mon amy Iob qui se guesmente
 Le faux sathan de male entente
 L'a caydé oster de ma sente
 Mais oncques ne l'a peu auoir
 Pas bien n'auoit blessé la tente
 Sa texture est feble & lente
 Contre Iob & son bon sçauoir

Il m'a serui de bon vouloir
 Et vit tousiours en bon espoir
 En vous louant de cœur piteux
 Il ne se peut d'un lieu mouuoir
 C'est grand pitié que de le veoir
 Tant est son poure corps hideux.

Dieu.

Tout ce que requerez ie veux
 Pour l'amour de vous i'ayme mieux
 Iob que par deuant ne faisoie
 Car il m'a seruy en tous lieux
 Et a esté victorieux
 Contre Sathan qui le guerroye.

Il dit à ses Anges.

Sus Michel mets toy en la voye
 Descend aual & ne t'esmoye
 Pour remettre Iob en santé
 Messager ie veux que tu soyes
 De luy aller guerir ses playes
 Et le getter hors d'orphanté
 Ses trois seurs le m'ont présenté
 Je le tiens pour représenté
 Et leur octroye leur requeste
 Et vueil qu'il aye par sa bonté
 Biens & honneurs à grand planté
 Et que tous facent de luy feste.

Michel. Glorieux Dieu pere celeste
 Vostre vouloir sans nul arreste
 Accompliray moult doucemene

Bien

Bien est raison que ie m'apreste
 Pour obeyr de cœur honneste
 A vostre saint commandement

Dieu Va & luy dis hardiment

De par moy veritablement
 Que ie l'aime & l'aimeray
 Et luy donray allegement
 De tous ses maux entierement
 Et mon cheualier le feray
 Des biens mondains luy donneray
 Et ses aîs multiplieray
 Encores de cent quarante ans
 Et lignee luy donneray
 Laquelle ie luy beniray
 Car sa femme aura dix enfans
 Pour ce qu'il me sert tout son temps :
 Comme tresloyal combatant
 Et victorieux champion
 Je suis de luy tresbien content
 Va t'en à luy & plus n'attens
 L'oster de tribulation.

Michel.

Vray Dieu nostre saluation
 Mon aydeur mon intention
 Et à vous servir loyaument
 Je m'en vois sans dilation
 Luy donner consolation
 Sans plus demourer nullement
Jcy parle à Gabriel & à Raphael.

Sûs

Sts Gabriel apertement
 Et vous Raphaël aïsement
 Allons tous trois ie vous en prie
 A Iob nostre loyal amant
 Pour luy donner confortement
 Et guerir de sa maladie.

Gabriel. Tresuolontiers en chere lie
 Iray avec vous par compagnie
 De cœur ioyeux sans demourance
 Car au besoing ne faudray mie
 A ceux qui sont de bonne vie
 Et qui sont de nostre alliance.

Raphael. Avec nous viendra patience
 Et bonne foy & esperance
 Car loyaument nous a seruy
 Allons trestous d'une alliance
 Et chantons par bonne ordonnance
 Pour l'amour de Iob nostre amy.

*Icy les anges & les vertus descendent du ciel chan-
 sant & menant grand ioye & vont à Iob.*

Hymnus.

Gloire soit à Dieu qu'est és cieux
 Qui veut donner à Iob santé
 Et en terre paix à tous ceux
 Qui sont de bonne volonté
 Nostre amy Iob a surmonté
 Le faux sathan par ce sera
 En paradis par sa bonté
 In seculorum secula.

Sathan.

*Sathan regardant les Anges, & les
vertus, dit.*

De par le diable qu'est cela?
Au meurtre i'enrage tout vif
Oncques si grand meschef ne vy
Diablen venez tous à mon ayde
Car il conuient que ie m'en fuye
Ie n'ose plus arrester cy.

*Il s'en veut fuyr en criant, & il chet à terre,
& saint Michel le bat & dit, Tu ne
t'enyras pas ainsi.*

Faux sathanas beste sauuaige
Eunemy de l'humain'lignaige
Que te faut il, que viens tu querre
Car icy ne puis rien acquerre
Faux mauuais ennemy Sathan
Fuy t'en d'yci tantost va t'en
De par Dieu ie le te commande.

Sathan. Taistoy car rien ne te demande
Micheli en'ay à toy que faire
Laisse moy tu m'es trop contraire
Car ie ne t'aymeray iamais
Si me fais fort ie n'en puis mais
Car tu sçais bien que i'ay puissiance
De faire à cest homme greuance
En son corps & en tous ses biens.

Michel. C'est voir tu y m's tes mains
Tant qu'il y pert de tous costez
Et luy as tous ses biens oltez

Et

Et faict tous les maux qu'as peu :
 Mais onc pour toy ne s'est tenu
 De louer Dieu qui est en gloire
 Par celuy Dieu fera memoire
 Et tu t'en iras à grant honte :
 Iamais de toy ne fera compte
 Car il t'a de tous points vaincu.

Sathan. Lasche moy ie me romps le cul :
 Ne frappe plus maulgré ma vie
 Tu me tue Dieu te maudie :
 Le diable t'a bien amené.

Michel. Tū seras auant guerdonné :
 De ta peine & de ton labeur
 Batu seras comme vn tabour
 Or tien & s'il ne te suffist
 Si dy que Iob t'a desconfit
 Et que dessus toy est le maistre.

Sathan. Au grant dyable puisse il estre :
 Et qui en ce pays l'amena
 Et la vieille qui le porta :
 Et l'heure que ie le vy oncques.

Michel. Vaten sans plus arrester doncques :
 En enfer à dâmpnation
 A iamais sans redemption
 Et te souuienne bien de Iob.

*Icy Michel va à Iob & Sathan s'en retourne en
 enfer criant. Sathan.*

Or l'ayie belle à ce coup
 Que le grand dyable y auienne
 N.

Ia n'est mestier que ie m'en plaigne
 Et quant Lucifer le sçaura
 Ma peine si me doublera
 Que mauldit soit la villainnaire
 Tant il m'a faiet aujourd'huy battre
 Ie l'ay trouué bien en malle heure.

Michel vient à Iob le conforter.

Iob mon amy Dieu te secoure
 Lieue toy sus au nom de Dieu
 Ne demeure plus en ce lieu
 Dieu nous a deuers toy transmis
 Comme à vn de ses bons amis
 Pour te donner paix & santé
 Et des biens à plus grant planté
 Que tu n'auois par si deuant
 Et si veut que d'oresnauant
 Tu aies santé & liesse
 Et de tous biens à grant largesse
 Car tu as obtenu victoire
 Contre Sathan ton aduersaire
 Et as esté vray patient
 A tous maux à bon escient
 Et pource veez cy patience
 Qui est deuant toy en presence
 Venue pour te conforter
 Et de ta douleur supporter
 Et veez cy empres bonne foy
 Sur laquelle as fondé ta loy
 Toulours as bonne foy tenue

Pat

Par ce deuers toy est venue
 Pour te donner bon reconfort
 Soyez bon champion & fort
 Empres est patience & esperance
 En qui tu as eue fiance
 Pour toy à Dieu faire priere
 Qu'il t'otast de ceste misere
 Ces trois dames pour leur bonté
 Ont ton faict deuant Dieu compté
 Et Dieu qui tout ton faict a veu
 Si t'a pour son amy receu
 Tous tes biens te feront doublez
 De ce ne soyez point troublez
 Et tes amys te feront feste
 Par moy Dieu les admoneste
 Et te meneront ioye & soulas
 Tu es eschappé d'un fort las
 Et as vaincu ton ennemy.

Gabriel. Dieu soit avec toy Iob mon amy
 Bon champion de Dieu le pere
 Esiois toy fais bonne chere
 Car Dieu nous enuoye à toy
 Pour t'oster hors de cest esmoy
 Et si veut que par nous tu soyes
 Guery de trestoutes tes playes
 Et saches que ta femme aura
 Dix enfans qu'elle concepura
 Sept masles & trois belles filles
 Qui seroat plus beaux & habilles

Que ceux que tu soulois auoir
 Cecy ie te fays assauoir
 De par Dieu le souuerain sire.

Raphael. Tu as enduré grant martyre :
 Iob mon amy mais ne te chaille
 Car tu as gaigné la bataille.
 Sathan ton aduerse partie
 S'en va desconfit ie t'affie
 Pource qu'as tenu nostre bende
 Auec nous seras quoy qu'il attende.
 En la ioye de paradis
 Laquelle fut promise iadis
 A ceux qui ont en luy fiance.

Patience. Mon amy ie suis patience :
 Qui suis par deuers vous venue
 Car grandement vous suis tenue
 En vous merçant grandement
 Comme mon tresloyal amant
 Vous auez m'amour conquesté
 Et patient auez esté
 Sur tous autres dire bien l'ose
 Par ie suis de vous amoureuse
 Et vous deliureray de peine
 Or vous leuez en bonné estraine
 Ceste belle robe vous donne
 Et m'amour ie vous abandonne
 Pource qu'il vous souuienne de moy.

Icy vest la robe & foy parle.

Foy ie suis nommee benne foy.

Iob.

Iob mon amy ie vous mercie
 Que tout le temps de vostre vie
 Mauez si loyaument seruy
 Que m'amour auez desleruy
 Ie vous done ceste couronne
 Qui est d'or d'argent & de soye
 Vous la porterez pour enseigne
 Affin que de moy vous souuienne
 En quelque part que vous soyez

Esperance. Mon amy ne vous esmoyez
 Chascun m'appelle esperance
 Qui des vertus meine la dance
 Ie vous donne ce chaperon
 Qui est escript tout enuiron
 Mon nom sur vous vous porterez
 Et tousiours mon amy serez

Icy le meine en sa maison.

Or sus patience ma seur
 Et foy ie vous pry de bon cœur
 Que nous le menons à grant ioye
 Tous ensemble la droicte voye
 Trestout fin droict en sa maison
 Car il est bien temps & sayson
 Qu'il soit osté de ceste place.

*Patience. Elle prend Iob par le bras
 & luy dit:*

Or allons Dieu nous doint sa grace
 Ie suis patience nommee
 Sur toutes vertus couronnee

Maintes gens si me demandent
Et qui ie suis pas ne l'entendent
Et pource vucillez l'entendre
Tous & toutes affin d'apprendre
Vostre vie & gouuernement
Si voulez auoir sauvement
Vous qui auez auourd'huy guerre
Et pillerie sur la terre
Et estes souuent rançonnez
Et batus & emprisonnez
Et auez bien souuent famine
Et mortalité qui ne fine
Pour Dieu mes amys endurez
Car vous estes bien heureux
Et prenez tout en patience
Qu'en que l'on vous faict de greuance
Remerciant le roy de gloire
Car c'est vostre droit purgatoire
Prenez exemple à ce preud'homme
Car ie vous dis en toute somme
Que vous deuez auoir grant ioye
Des pertes que Dieu vous enuoye
Pensez bien es anciens peres
Qui souffrent tant de grans miseres
Et aussi en sainctz & sainctes
Qui ont souffert martires maintes
Auant qu'ils fussent dignes d'estre
Lassus en la gloire celeste
Auecques Dieu qui nous appelle

En

En sa gloire qui est si belle
 Vos grans douleurs & voz grans pertes.
 Ont les portes du ciel ouuertes.
 Et les maux & la maladie
 Que vous souffrez en ceste vie
 Et que Dieu vous trouue souuent
 De tous voz pechez vous lauant
 Par ce mes amis ie vous prie
 Par amour ne m'oubliez mie
 Car à tous ceux me recommande
 Qui veulent estre de ma bande
 Et si vous pri que ne m'oubliez
 Si louez Dieu & merciez
 Et Dieu si vous confortera
 Et sa grace si vous donra
 Apres vostre dueil & tristesse
 Il vous donra paix & liesse
 Et la ioye qui point ne fine.

Il a dit à Iob en sa maison.

Iob mon cher amy debonnaire
 Je vous pry tousiours de bien faire
 Et n'ayez soucy ne esmoy
 Nous sommes trois filles de Roy
 Qui vous aymons & aymerons
 Et tousiours pour vous prierons
 Dieu nostre pere omnipotent
 Vous viurez encores long temps
 Cent & quarante ans pour le moins
 Et aurez la moytié des biens



N 4

Plus que ne souliez auoir
 De par Dieu le vous fais sauoir
 Et vostre femme si aura
 Dix beaux enfans qu'elle portera
 Et par ce ne vous esmouuez
 Ie m'en reuois, à Dieu soyez
 De Dieu viens & à Dieu m'en vois.

Iob. Ha tresdoux Dieu Roy sur les Rois
 Mon createur & mon seigneur
 A toy soit gloire & honneur
 Tu es mon Dieu tu es mon pere
 Qui m'as deliuré de misere
 Et t'a pleu de m'enuoyer
 Trois dames pour me conuoyer
 En la compagnie des Anges
 Ie te rends graces & louanges
 A ioinctes mains treshumblement
 En te merciant doucement
 De ta vertu & de ta grace
 Que tu m'as faict en ceste place
 Loyaument ie te seruiray
 Et pour rien net'oublieray
 Tant que viuray en ceste vie.

Icy vient Satan deuant Lucifer. Satan.
 Hau Lucifer & sa mesnie
 Que faictes vous ie suis venu
 I'ay depuis bien esté tenu
 Et si ay bien esté frotté
 Regardez comme suis crotté

Onc

Onques mais ne fuz à telz nocces
 Michel m'a bien aulné mes bossès
 Le diable m'y auoit mené
 I'ay si bien esté ramené
 Que i'ay laissé & sang & merde.

Lucifer.

Et Dieu te doint la malle perde
 Et est ce quant que tu as faict?
 Tu ne vaux pas vn sanglant pet
 Car tu me deuois amener
 Le villain Iob à prisonnier
 Faux traistre desmesuré
 Tu nous as tous deshonoré
 Que malle froidure & tempeste
 Si te puisse rompre la teste
 Tu es venu à mauuais port
 Car au dernier tu auras tort
 Larron n'as tu point de vergongne
 Pourquoi entreprends tu besongne
 Premièrement sans conseil d'autre?

Sathan.

Et cuidez vous que soit ma faute
 Que le grant diable y ait part
 Je m'en repens mais c'est à tait
 Car si tous les diables d'enfer
 Et vous & voz liens de fer
 Auec toute vostre puïssance
 Y estiez d'une aliance
 Si ne pourriez vous tant faire

N 3

Qu'à nul peché le puissiez traire
 Il est armé de patience
 Et ne craint pas nostre puissance
 Vn estront mort de chien chié
 Je l'ay battu & chastié
 Et rompu par telle maniere
 Qu'il n'auoit peau ne chair entiere
 Et tousiours me suis amusé
 Mais au dernier m'a abusé
 Car venu est, Dieu le maudie
 Michel auec tresgrand compaignie
 Qui m'a tant battu & rollé
 Que i'en suis trestout affollé
 Oncques ne fus si bien batu.

Lucifer. Et encores le seras tu.
 Car tu l'as tresbien desseruy
 Mieux te fut estre mort que vif
 Que t'en reuenir à noz portes
 Quant telles nouuelles aportes.

Il crie & dit:

Hau Leuiathan Cerberus
 Berith belzebuth gargarus
 Et d'enfer toute la mesnie
 Soit bien batu ie vous en prie
 Frappez dessus estroictement
 Sans l'espargner aucunement
 Frappez frappez grans & menuz.

Tous les diables.

Il est vn peu trop tost venu

Char

Chargeons dessus, nul ne se faigne.

Icy tous les diables batent Sathan en vrlant.

Eliphar.

Cher amy Baldach Sinthes,
 Et vous Sophar Neomathites
 Je vous pry faites bonne chere,
 En merciant Dieu nostre pere
 De cœur, de corps, de volonté:
 Car Iob a recouert santé,
 Qui tant a souffert de martyre:
 Mais Dieu qui est souuerain Sire,
 Par son plaisir & par sa grace
 L'a fait tout sain en peu d'espace,
 Et l'a mis hors du pas perilleux.
 Les faictz de Dieu sont merueilleux,
 Il est tout sain & en bon point,
 Et bien guery, n'en doutez point.
 Il a bon medecin trouué,
 Nostre Seigneur en soit loué.
 Par ce mes seigneurs ie vous prie
 Allons tous trois par compagnie,
 Le faire à ses amis assauoir,
 A fin que tous le viennent veoir,
 Et luy mener ioye & soulas.
 Car il est eschappé du las
 De Sathan la mauuaise beste. [nestre

Baldach. C'est bien raison & chose hon-
 Il a souffert de grans miseres
 En maintes guises & manieres.

Er

Et a tout prins en patience
Et pource sera remembrance
De luy à iamais & memoire
Nous y deuons prendre exemplaire
Car lon dit qui bon maistre sert
Pour raison bon loyer en desert
Il s'est tousiours en Dieu fié
Et Dieu ne l'a pas oublié
Allons parler à ses cousins
A ses sœurs & à ses voisins
Et leur conterons leurs manieres
Qui leur seront bonnes & belles
Je sçay bien quant ilz le scauront
Que moult grant ioye en auront
Quant est de moy ie le conseille.

Sophar. Vous dictes si bien que merueille
Loué soit Dieu del'aventure
Or y allons en la bonne heure
Nous deuons bien auoir grant ioye
Car Dieu nous a monstre la voye
Par laquelle pouuons acquerre
Son amour au ciel & en terre
Par les vertus de patience
Ainsi comme a fait sans doutance
Le preud'homme Iob nostre amy
Qui a conuaincu l'ennemy
Allons doucques & leur dirons
Sa femme nous y trouuerons
Quant les nouuelles elle scaura

Sa

Sa ioye elle renouellera,
 Son pleur, sa douleur, sa tristesse
 Seront muez en grand liesse,
 Et son cœur deuiendra ioyeux.

Eliphat. Or allons donc parler à eux,
 Que Dieu nous doint telle chose faire,
 Que nos œuures luy puissent plaire
 En tous lieux & en toutes places.

Baldac. Or allons, que Dieu par sa grace
 Nous doint à tous parfaite ioye.

Sophar Mettrōs nous tous trois en la voye
 Sans plus tarder, ie vous en prie.

Icy vont aux parens de Iob.

Eliphat. Dieu gard toute la compagnie
 De tout mal & d'encombrement. [ment,

Le frere de Iob. Amé, & vous semblable-
 Et vous croisse bien & honneur.

Eliphat. Seigneurs louez nostre Seignr,
 Car nous vous apportons nouuelles,
 Qui sont gracieuses & belles:
 C'est de Iob qui est releué
 De tous les maux qui l'ont greué,
 Dieu luy a enuoyé sa grace,
 Et l'a guery en peu d'espace,
 Il est aussi sain & haité
 Commet parauant auoit esté,
 Ie le vous promets & affie.

Baldac dit à la sœur de Iob.

Dame louez Dieu de bon cœur,

Car

Car ie vous promets & affie
 Qu'il est tout sain n'en doutez mie,
 Dieu veut qu'il soit de ses amis,
 Car ses anges luy a transmis,
 Pour le ietter hors de misere:
 Si vous pry faites bonne chere,
 En louant Dieu deuotement.

La femme de Iob.

Helas mes seigneurs & comment
 Pourra il estre si tost guery
 Mon bon seigneur & mon amy?
 Car vrayement oncques ne naquit homme
 Qui souffrist tant de maux comme
 Il a souffert en peu d'espace.

Sophar. C'est par la vertu de la grace
 De Dieu le pere omnipotent,
 Qui n'oublie point en nul temps
 Tous ceux qui ont en luy fiance,
 Et qui prennent en patience
 Les aduersitez & miseres
 Qu'ils souffrent en maintes manieres:
 Mais ie vous pry sans point tarder
 Qu'au chemin vous vous mettez
 Pour le venir veoir briefuement,
 Car ie vous iure vrayement
 Qu'il est ioyeux & en bon point
 La merci Di. n'en doutez point,
 Ceci ie vous fais assauoir,
 Qui l'aimera le vienne veoir.

Venez

Venez le veoir tous les parens,
Et ses amis, petis & grans,
Freres & sœurs, cousins germains,
Et luy apportez de vos biens,
Pour luy donner confort & ioye.

Le frere de Iob.

Plus tenir ie ne me pourroye
Que ie n'aille à luy en present,
Et luy porteray mon present,
Et benoist soit le nom de Dieu,
En ciel, en terre, & en tout lieu,
Qui de sa grace & volonté
Après le mal donne santé:
Il fait viure, & si occist:
Ses amis frappe & guerist,
Et il voit tout pres & loing,
Et tient tout le monde en son poing:
Par ce le deuons mercier
Du bon du cœur sans varier,
Autant des maux comme des biens.

La femme de Iob.

Ie louë Dieu à iointes mains,
En le merciant humblement
De tous ses biens entierement:
Car i'ay à mon cœur si grand ioye,
Que dire ie ne le pourroye,
Ie m'en vois rendre à mon amy
Plus n'attendray iour ne demy,
Mon cœur est hors de tout esnoy.

Tous

Tous mes amis venez avec moy,
 Bñouyſſez vous ie vous prie,
 Et venez en ma compagnie
 Pour luy faire feſte & honneur.

Le conſin de Iob.

Loué ſoit Dieu noſtre Seigneur,
 Qui ne veut nul temps oublier,
 Ceux qui l'aiment ſans deſſier:
 I'ay telle ioye de ſa nouuelle,
 Que treſtout mon cœur ſautelle,
 Iamais ne cuidaſſe en ma vie
 Qu'il guerift de ſa maladie,
 Et du mal que ſon corps auoit:
 Mais Dieu qui tout ſçait & tout voit,
 A regardé ſa patience,
 Et luy a transmis allegance
 De tous ſes maux entierement.
 Dame ſçachez certainement
 Avec vous iray luy faire feſte,
 Et ſi luy donneray vne beſte:
 Sçauoir eſt, vne belle ouaille,
 Et vn anneau d'or en l'oreille,
 Que Dieu vucille par ſa puiſſance
 Luy donner bonne recourance
 De tous biens par ſon plaifir. [deſir]

La ſœur de Iob. Certainement i'ay grand
 De l'aller veoir, & luy porter
 De nos biens pour le conforter,
 De maintenant ie luy donne.

Vncc

Vne brebis, qui est belle & bonne,
 Laquelle ie luy porteray:
 Et empres ie luy donneray
 Vn anneau d'or bel & plaissant,
 Dequoy ie luy feray present,
 En le releuant de tout bien,
 Quand que i'ay est sien, non pas mien:
 Car aimer le doy de bon cœur,
 Par raison: car ie suis sa sœur:
 Et par ce iamais n'auray ioye
 Iusques à tant que ie le voye,
 Et que de son estat ie sache

Le frere de Iob. Je luy dōneray ceste vache
 Pour multiplier son auoir,
 Auancōns nous, allons le veoir,
 Trop me tarde que ie n'y suis. [puis,

La sœur de Iob. Je vous suplie tant que ie
 Ne faisons plus cy de demeture:
 Car mon cœur souspire & pleure
 Desirant le veoir briueuement,

Le cousin de Iob.
 Quand vous plaira certainement
 Je suis tout prest quand vous voudrez.

La sœur de Iob.
 Par moy point vous ne demourrez,
 Or allons de par Dieu le pere.
*Ils vont à la maison de Iob, & portent les bestes à
 la maison, & rencontrent le messager par-
 lant à la femme de Iob.*

Le messagier:

Helas madame & quelle chere,
 Que Dieu vous doint ioye & honneur,
 Veistes vous pieça mon seigneur,
 Pour Dieu dites moy quels nouuelles.

La femme de Iob.

Mon cher amy bonnes & belles,
 Il est en bon poinct Dieu mercy,
 Entre nous qui sommes icy
 Allons deuers luy pour le veoir.

Le messagier:

Par vostre foy dites vous veoir,
 Vous me faites tout resiouyr,
 Je ne pourrois iamais ouyr
 Meilleures nouuelles pour moy.

Le frere de Iob.

Il est ainsi en bonne foy
 Mes amis ne vous doutez point,
 Il est tout sain & en bon point,
 Par la vertu au Roy des cieux:
 Allez & dites à tous ceux
 Que vous trouuerez en la voye,
 Qu'ils viennent pour luy mener ioyes,
 Et leur dites hardiment
 Qu'il est en bon poinct vrayement,
 Sain & ioyeux & bien guery.

*Il s'en va, & le messagier dit.**Le messagier.*

Et par mon ame ie m'en ry,

Et

Et le cœur me vole au ventre.
 De la ioye qui en moy entre,
 Je ne me pourroy tenir
 Que qu'il m'en doive aduenir,
 De danser & de faire feste,
 Et de chanter à haute teste,
 Puis que mon maistre est releué
 Du grand mal qui l'atant greué,
 Je m'en vois porter les nouuelles
 A tous ceux & à toutes celles
 Qui tiennent la bande de nous.

La femme de Iob.

*Ils entrent en la maison de Iob avec ses parens;
 en le saluant humblement.*

Mon seigneur ie merensà vous,
 En vous suppliant qu'il vous plaise.
 Me pardonner de vostre grace
 Si loing de vous me suis tenue.

Iob en baisant sa femme.

M'amie bien soyez venue,
 Et toute vostre compagnie,
 Dieu vous doint à tous bonne vie,
 Ainsi vraiment que ie voudroye. [ioye
Le frere de Iob. Mon frere Dieu vous enuoye
 Et vous doint honneur & confort:
 Quelles nouuelles, estes vous fort,
 Estes vous guery tout outre.

Iob. Ouy, Dieu merci & la vostre,
 A vostre bon commandement.

O. 2.

Le cousin de Iob.

Mon cousin quelle chere comment
 Estes vous sain & en bon point?

La sœur de Iob.

Mon frere ne vous esmoyez point,
 Mais oubliez dueil & tristesse,
 Et vous donnez ioye & liesse:
 Car Dieu vous a monstré signe,
 Que son bon amy estes tresdigne,
 Il vous a remis à santé:
 Et apres vous दौरa planté
 De tous biens, i'en suis certaine.
 Et veez cy vne bonne estreine,
 Vn anneau d'or que ie vous donne,
 Et cest' brebis qui est tresbonne
 Que Dieu vous doint croissiance,
 Et viure en santé longuement.

Le frere de Iob.

Et moy aussi semblablement
 Vous donne ceste vache preins,
 En accroissement de tous biens,
 Et prie Dieu que par sa grace
 En ce monde riche vous face,
 Et de sa benediction
 Vous doint fructification,
 Que lignee puissiez auoir
 Les enfans de vos enfans veoir,
 Et puissiez paradis acquerre,
 Et viure longuement sur terre,

En

En ioye & en prosperité.

Le cousin de Iob.

Mon cher cousin par amitié
 Je vous pry faiçtes bonne chere,
 Et merciez Dieu nostre pere:
 Car au plaisir Dieu ie m'attens
 Que vous serez en brief temps
 Plus riche que ne fustes oncques:
 Pource resiouyſſez vous doncques,
 Et veez cy du commencement,
 Vne brebis presentement
 Que i'ay à mon col apportee,
 Laquelle ie vous ay donnee,
 Auecques ceste orcolle d'or,
 En accroissant vostre tresor
 Car ie vous vueil aussi donner,
 Et vous plaise me pardonner
 Si ie ue vous ay visité,
 Et si pluſtoſt ne ſuis venu:

Iob. Je vous ſuis grandement tenu,
 Je vous mercie plus de cent fois
 De vos biens que vous m'avez faits
 Je pry'à Dieu que les vous rende,
 Par ſa grace qui eſt ſi grande,
 Bien vous deuons tous mercier..

La femme de Iob.

Mon cher ſeigneur ie vous requier
 Qu'il vous plaife benignement
 Me pardonner entierement,

O 3

Si i'ay dict ou faict en nullé place
Nulle chose qui vous desplaïse
Ie sçay bien que le temps passé
Vous ay grandement courroucé
Mais si i'ay parlé par folie
Pardonnez moy ie vous en prie
Ie vous requiers de cœur parfaict.

Iob. Chere amie Dieu vous pardoint
Car de bon cœur ie vous pardonne
Et m'amour ie vous abandonne
Vous deuez bien auoir fiance
En Dieu & prendre en patience
Trestous les maux qui vous viennent
Car vous pouuez voir maintenant
Comme ie suis par la Dieu grace
Sain & ioyeux en peu d'espace
Et n'agueres que i'estoye
Ainsi comme mort & n'auoye
En ce monde cy amy cher
Qui de moy voulsist approcher
Car tous ceux qui me regardoient
A la mort si me iugeoient
Par ce bien paroist qu'en peu d'heure
Et en peu de temps Dieu labeure
Ie luy rens graces humblement
Que par son doux confortment
M'a ietté hors de desconfort
Et des grans souspirs de la mort
Ou i'ay languy & souffert peine

Et

Et m'a faict ma chair toute saine
Comme i'estoye par deuant.

Le frere de Iob.

Certes celuy est peu sçauant
Qui ne sert Dieu sur toutes choses
Car ses vertus sont merueilleuses
Et iamais ne veut oublier
Ceux qu'il ayme sans defier
Par exemple le pouuons voir
A nous mesmes pour dire voir.
Fol est qui en Dieu ne se fie
Peu de chose est de nostre vie
Car pour vn iour qu'est de liesse
Il en est deux de grand tristesse
Tantost ioyeux tantost marry
Tantost malade puis guery
Et la vie de cestuy monde
Plus de la moitié si abonde
En douleurs & enfermetez
En craintes & en pauuretez
Qui trop s'y esbat n'est pas saige
Car c'est vn dangereux passaige
Nous le pouuons veoir tous les iours.

Le cousin de Iob.

Ainsi va le monde tousiours
Et en peine & en trauail
Et comme l'ombre du Soleil
N'arreste point mais va & court
En tirant tousiours à sa mort

O 4

Par ce le meilleur que ie voye
 En ce monde c'est auoir ioye.
 Et faire bien & aimer Dieu
 Et le seruir en chascun lieu
 Afin qu'avec luy puissions estre
 Lassus en la ioye celeste
 Par sa saincte misericorde.

Le messagier.

Icy vient courant aux pasteurs.

Compaignons mettez vous en ordre
 Et tous ensemble vous tenez
 Baudour & ioye demenez
 Entre vous qui souliez estre
 Seruiteurs de Iob nostre maistre
 Par moy à vous se recommande
 A tous ceux qui sont de sa bande
 Et mande que vous l'aliez veoir
 Cecy ie vous fais assauoir
 Et vous iure pour tour certain
 Qu'il est bien guery & tout sain
 Et en bonne prosperité.

Robin. Je ne sçay si dis verité
 Mais vrayement tu me fais grand ioye
 Toutes fois croire ne pourroye
 Que soit ainsi comme tu dis.

Gaston. Pleust or à Dieu de paradis
 Robin que la chose fust telle
 Et si m'eust cousté ma gonnelle
 Mon chaperon & mon pourpoint.

Le

Le messagier.

Je vous iure n'en doubtez point
 Qu'il est ainsi comme ie compte
 S'il n'est vray si me faictes honte
 Je le vous iure par mon ame
 Car ainsi le m'a dit ma dame
 Nostre maistresse & ses amis
 Lesquels m'ont deuers vous transmis.
 Je les ay trouuez en present
 Ou chascun porte son present
 Et m'ont enchargé de vous dire
 Que l'alliez voir sans contredire
 Tenez vous en pour assuré. [iure

Le pasteur. Je t'en crois puis que tu en
 Et conseille sans plus attendre
 Que nous allions à luy nous rendre
 Pour l'eslouyr & conforter
 Mais nous n'auons que luy porter
 Ne dequoy nous luy puissions faire
 Aucun present pour luy complaire
 Car nous n'auons chose qui vaille. [chaille

Gaston. Vous dites vray mais ne vous
 Je vous diray que nous ferons
 Et comment nous gouvernerons
 Nous en yrons par ordonnance
 Tiestous en vne belle dance
 Et robin si ira deuant
 Sonnant comme le plus sçauant.
 Et dira yne belle note

O. s.

218. LA PATIENCE

Et nous remenerons la bote

Et danceros gaillardement. [serment

Le messagier. C'est trestbien dit par mon

Et verrons qui mieux dancera

Et qui mieux se trespouffera

Quant nous serons trestous ensemble

Il n'y aura riens qui ne tremble

Quant est de moy ie suis legier

Et iolis comme vn chandelier

Pource la dance meneray

Et tout le premier m'en iray

Afin d'eslouyr la feste. [leste

Le pasteur. Or sus doncques sans nul mo-
Ie suis prest de ioye mener

Et bien la dance commencer

Et aussi en ceste presence

Ie vous diray la houpedance

Pouce l'amour de la compaignie.

Gaston. Sonne mon amy ie t'en prie

Et chanterons qui m'en croira

Quant nostre maistre nous verra

Il en deura bien ioyeux estre.

Le messagier.

Allons trestous veoir nostre maistre

Chantant & dançant par la voye.

Icy le messagier commence à dancer & les autres

semblablement & entrent en la maison de Iob

en grand liesse.

Mon cher seigneur Dieu vous doint ioye

Hon

Honneur & planté de monnoye
Et à vous tous grands & menuz.

Iob. Mes amys bien foyez venuz
Ie prie à Dieu deuotement
Qu'il nous doint à tous sauueement
Et faire chose qui luy plaise.

Robin. Et benoïste soit la iournee
Mon cher Seigneur dont ie vous voy
Sain ioyeux & en bon arroy
Car si Dieu me doint ioye
La chose que plus desiroye
Et s'il est rien que puisse faire
Pour vous monseigneur debonnaire
Plaise vous le me commander
Et ie le feray sans tarder
Comme vostre loyal seruant.

Le pasteur.

Ie loue Dieu de cœur seruent
Car maintenant ie puis bien dire
Que ie voy ce que ie desire
Mon cher Seigneur pardonnez nous
Si venus sommes deuers vous
Sans vous apporter de noz biens
Car en verité n'auons riens
Fors le pauvre corps qui est prest
A faire tout ce qui vous plaist
Nuiet & iour sans defaillir mie.

Iob. Mes chers enfans ie vous mercie
Ie vois bien vostre bon vouloir

Pour

Pour ce ne m'en dois pas doloir
 Je vous ayme c'est bien raison
 Et vous retiens de ma maison
 Comme parauant souliez estre
 Trestous ensemble: *Il respondent.*
 Grand mercis monsieur nostre maistre
 Dont il vous plaist nous receuoir.

Le frere de Iob.

Celuy a bien peu de sçauoir
 Qui en Dieu a peu de fiance
 Et qui ne prent en pacience
 Sans mal dire ne murmurer
 Les maux qui conuient endurer
 Et tout mal & affection
 Et des pechez remission
 Chascun peut bien voir clerement
 Que Dieu ayme parfaictement
 Tous ceux qui ont aduersitez
 Tribulations pauuretez
 En ceste vie qui peu dure
 Fol est qui trop y met sa cure
 Et encores est il plus fol
 Qui prent en soy courroux & ducil
 Pour tribulation qui vienne
 Et pour ce à tous souuienne
 De Iob & de sa patience
 Que vous pouuez voir en presence
 Car certes la vie d'un homme
 S'en va aussi leger comme

Fleur

Fleur de foin qui est assechée
Du matin iusqu'à la vespree
Et la ioye de cestuy monde
N'est qu'un abisme profonde
C'est nostre droict pelerinage
Qui trop s'y esbat n'est pas sage
C'est un passage moult perilleux.

Le cousin de Iob.

Les faicts de Dieu sont merueilleux
Chascun de nous le peut bien voir
Et clerement appercevoir
Je le dy car ie voy icy
Mon cousin qui est Dieu mercy
Sain & ioyeux chascun le voit
Et n'a gueres qu'il n'y auoit
De trestous ses amis celuy
Qui voulsit approcher de luy
Par ce que trestous disoient
Qui la douleur regardoient
Qu'en luy iamais n'auoit resort
Fors que les sospirs de la mort
Or maintenant par la Dieu grace
Il est guery en peu d'espace
Et aussi est sain & haicté
Comme deuant auoit esté
Et desia est riche & puissant
Et tous ceux qui le cognoissent
Viennent à luy luy faire honneur
Comme à leur souuerain Seigneur

Par

Par ce doncques puis ie bien dire
 Que les douleurs & le martire
 Que Dieu nous enuoye souuent
 De tous noz pechez nous lauent
 Et si deuons auoir grand ioye
 Des douleurs que Dieu nous enuoye
 C'est vn grand bien n'en doubtez mie
 Car qui bien ayme bien chastie
 Nous le voyons par exemplaire.

La sœur de Iob.

Esouissez vous mon cher frere
 Car à iamais sera remembrance
 De vostre bonne patience
 Dieu vous a voulu approuuer
 A fin que fussiez le miroer
 A tous les viuans de sur terre
 Qui ont de grans maux en la guerre
 A vous chascun se doit mirer
 Qui veult viure faut endurer
 Tout homme qui bien pancera
 En vostre vie & la sçaura
 Trouuera consolation
 Sans point de dissimulation
 Mais que de vous bien luy souuienne
 Pour nulle douleur que luy auienne
 Ne se mettra à desconfort
 Car en Dieu prendra bon confort
 Pour ce luy deuons faire feste
 Tous ensemble grand & honneste :

Et

Et grand reuerence & honneur
En merciant nostre Seigneur
Qui par sa grace & volonté
Vous a donné bonne santé
Et confort & ioye transinis..

Iob.

Esioüillez vous mes amis
Tous & toutes par compagnie
Auecques moy ie vous en prie
Tous mes amis generallement
Qui m'aymez de cœur loyaument
Esioüillez vous comme moy
Et ne soyez plus en esmoy
Car Dieu a mon corps visité
Et m'a regardé en pitié
Et du ciel iusques à la terre
A voulu de ma vie enquerre
Et m'a ses anges enuoyé
Qui m'ont grandement festoyé
Et m'ont resioüy de les veoir
Et de par luy m'ont faict sçauoir
Qu'il me mande que ie seroye
Plus riche qu'estre ne souloye
Et que les biens que i'ay perdus
Me seront au double renduz
Et aussi que ma femme auroit
Dix enfans qu'il me donneroit
Par vraye generation
Et de sa benediction.

Amon.

A mon corps tout enluminé
 Et estre vers moy tant incliné
 Qu'il m'a mandé dont le mercie
 Que ie viuray en ceste vie
 Encores cent quarante ans
 Benoist soit son nom en tous temps
 Honnoré & glorifié
 Car il nem'a pas oublié
 Pouce mes amis ie vous prie
 Prions luy tous sans plus d'espace
 Qu'il nous doint tousiours bonne vie
 Et nous maintienne en sa grace
 Nous qui sommes en ceste place
 Tous ensemble gaudeamus
 Afin que noz pechez efface
 Chantons Te Deum laudamus.

*Cy fine la patience
 de Iob.*







